


تجلد صالح الدين
تكون ٢٢١٧٧



89278
S56uA
C1

بوئنة السبائي



ام رتبة

مسرحية : فكاكية : في ثلاثة فصول

الناشر مكتبة الخانجي

للمؤلف

أطيف

الطبعة الأولى } الناشر: دار التوزيع والطباعة والنشر
سنة ١٩٤٧ } طبع في شركة فن الطباعة
الطبعة الثانية } الناشر: مكتبة الخانجي
سنة ١٩٥١ } طبع في شركة فن الطباعة

الطبعة الأولى } الناشر: دار التوزيع والطباعة والنشر
سنة ١٩٤٧ } طبع في شركة فن الطباعة
الطبعة الثانية } الناشر: مكتبة الخانجي
سنة ١٩٥١ } طبع في شركة فن الطباعة

نائب عزرائيل

الطبعة الأولى } الناشر: مكتبة الخانجي
سنة ١٩٤٨ } طبع في شركة فن الطباعة
الطبعة الثانية } الناشر: مكتبة الخانجي
سنة ١٩٥٠ } طبع في شركة فن الطباعة

اثنتا عشرة امرأة

الطبعة الأولى } الناشر: دار النشر العربية
سنة ١٩٤٨ } طبع في دار الأحد بيروت : لبنان
الطبعة الثانية } الناشر: مكتبة الخانجي
سنة ١٩٥١ } طبع في شركة فن الطباعة

خبيايا الصدور

الطبعة الأولى } الناشر: مكتبة الخانجي
سنة ١٩٤٨ } طبع في شركة فن الطباعة
الطبعة الثانية } الناشر: مكتبة الخانجي
سنة ١٩٥٠ } طبع في شركة فن الطباعة

يا أمة ضحككت

الطبعة الأولى } الناشر : مكتبة الخانجي
سنة ١٩٤٩ } طبع في شركة فن الطباعة
الطبعة الثانية } الناشر : مكتبة الخانجي
سنة ١٩٥٠ } طبع في شركة فن الطباعة

اثنا عشر رجلا

الطبعة الأولى } الناشر : مكتبة النهضة
سنة ١٩٤٩ } طبع في مطبعة السعادة الكبرى

أرض النفاق

الطبعة الأولى } الناشر : دار الفكر العربي
سنة ١٩٤٩ } طبع في شركة فن الطباعة
الطبعة الثانية } الناشر : دار الفكر العربي
سنة ١٩٥١ } طبع في شركة فن الطباعة

في موكب الهوى

الطبعة الأولى } الناشر : مكتبة الخانجي
سنة ١٩٤٩ } طبع في شركة فن الطباعة

من العالم المجهول

الطبعة الأولى } الناشر : دار الفكر العربي
سنة ١٩٥٠ } طبع في شركة فن الطباعة
الطبعة الثانية } الناشر : دار الفكر العربي
سنة ١٩٥١ } طبع في شركة فن الطباعة

هذه النفوس

الطبعة الأولى } الناشر : مكتبة الخانجي
سنة ١٩٥٠ } طبع في شركة فن الطباعة
الطبعة الثانية } الناشر : مكتبة الخانجي
سنة ١٩٥١ } طبع في شركة فن الطباعة

إني را حلة

مبكي العشاق } الطبعة الأولى } الناشر : دار الفكر العربي
سنة ١٩٥٠ } طبع في مطبعة الاعتماد

بين أبو الريش } الطبعة الأولى } الناشر : مكتبة الخانجي
وجنينة ناميش } سنة ١٩٥٠ } طبع في شركة فن الطباعة

أغنيات } الطبعة الأولى } الناشر : مكتبة الخانجي
سنة ١٩٥١ } طبع في شركة فن الطباعة

أم رتيبة } الطبعة الأولى } الناشر : مكتبة الخانجي
سنة ١٩٥١ } طبع في شركة فن الطباعة

مفرد الطبع والنقل والتمثيل محفوظة للمؤلف

الصورة بريشة الأستاذ الفنان

عبد محمد حسن

الأهداء

إلى أمي العزيزة :

« الست أم يوسف »

أهدى مسرحية « أم ربيعة »

لا أحاول أن أرد بها جميلاً سابقاً . فجميلها أجل من أن يرد .
ولكنني أرجو أن أهب لها لحظات ضحك تسرى بها عن
نفس بكية ، فياضة الدمع ، هامية المآقي ما

برسوف السباعي

للمؤلف

تحت الطبع

الشيخ زعرب وآخرون

صور طبق الأصل

تمثيلات قصيرة

آثار في الرمال

نفحة من الإيمان

هذا هو الحب

أساطير الأولين

السقامات

موته لله

قلب بين الأطلال

تطلب كتب المؤلف من :

مكتبة الخانجي بالقاهرة .

المثني ببغداد .

المعارف ببيروت .

مقدمة

هذه محاولة في كتابة المسرحية .

لقد أمتعتني كتابتها ، إذ كنت أشعر وأنا أغلق باب الحجر لآخلو
بنفسى للكتابة . أنى لم أخل بها وأنى لم أكن فرداً . بل كنت محوطاً
بمجموعة أبطالها المضحكين الهازلين .

كنت أضحك وأنا أكتب .

قد أكون مجنوناً .. وقد أكون مغروراً ..

ولكنى أؤكد لكم إننى أحببتها وأحببت أبطالها ، وأن كتابتها لم
تكلفنى أى جهد ولا مشقة ، بل كنت فى كتابتها كالسامر فى جلسة سمر .

ولقد سألتى بعض الأصدقاء أن أعرضها للتمثيل على المسرح ، ولكنى
فضلت أن أضعها أولاً فى كتاب .. لأنى أثق فى كتمى وأحب قرأتى ، وأشعر
بينهم بالطمأنينة والغبطة ، لأن بينى وبينهم رابطة أقوى مما بين كاتب وقارى ..
بينى وبينهم انسجام وصدقة وحب .

وثمة شىء أريد أن أقدم له .. وهو أنى كتبتها باللغة العامية .. إذ من
الجنون أن أحاول إنطاق أبطالها بالعربية .. فأرجو من أنصار اللغة العربية
أن يصيبنوا شوبه ، ويتساحوا معى قليلاً . فالمساح كريم .

وأرجو بعد كل هذا ألا تخذلنى دأم رتيبه ، فتضحك القارىء كما
أضحكتنى .. فإن فضلت فليعذرنى .. لأن إبهامه قد يكون يسيراً .. أما
إضحاكه فهو أمر جد عسير .

أشخاص المسرحية



سنية
خادمة



أم رتيبة
شقيقة عبد الصبور



عبد الصبور
مدرس خطاير بي



سيد أفندي
خطيب أم رتيبة



أم سيد
جارة أم رتيبة



زينهم
خادم




الأستاذ محبوب
تلميذ عبد الصبور



الأستاذ زكي
تلميذ عبد الصبور



الشيخ جاد
صديق عبد الصبور



المنظر : [صالة في بيت عبد الصبور أفندي بها منضدة اللاكل وأريكة وبوفيه . . في المواجهة شباك يطل على حارة ضيقة ويقابله شباك المنزل المقابل وهو منزل سيد أفندي . وعلى اليمين بلان يؤديان الى غرف النوم وعلى اليسار باب يؤدى الى السلم وباب يؤدى الى المطبخ .
تفتح الستار على أم رتيبه وقد جلست على الأريكة وأطلت بنصفها الأعلى من الشباك وأمسكت يدها جبل تدلى منه سبت . وسنية تجلس أمام طبلية وتخرط اللوخية] .

المشهد الأول



[أم رتيبه — سنيه]

أم رتيبه [للبائع في الطريق] — يا راجل اختشى على
عروضك وخط كان بطاطايه .. هوأ إيه ياختي ده .. هوأ انت
بتوزن ذهب ، الله يرحم زمان كانت الواحده تشتري حمل
البطاطه بتلاته ابيض .. إوعى بقى شيل إيدك خليني اطلع
السبب .. ما انت أصلك كده دايمأ وشك عكر ، وكل
ما احلف ما اشتري منك .. أرجع برضه أقول يابت نفعيه
دا راجل غلبان [تأخذ في جذب الحبل ورفع السبب] .

سنيه [منهكة في الخرط .. تلوك لبانة بين شدقها وتغنى] —
سابقه عليك النبي تسمع وتحضني يا عبده ، لا والنبي يا عبده .
أم رتيبه [تفحص البطاطا وتمسح بالبائع] — مش بقول
لك إنك راجل غشاش وضلالى . خد غير لى البطاطايه المعفنه
دى .. طب بس انكتم وانسد مانيش مغيره حاجه .. خد

آدى صاغ حار و نار فى جتتك [تضع النقود فى ورقه و تقذف بها
من النافذة] .

سنيه [مستمرة فى غنائها] — سايقه عليك النبي تسمع
و تقرصنى يا . . .

أم رتيبه [ملتفتة اليها مقاطعة غنائها] — هس اخرسى
يابت بلاش مسخره و قلته حيا . إيه الكلام اللى بتقوليه ده .
مين داللى عايزاه يقرصك ؟

سنيه — يوه . دا عبده يا ستى .

أم رتيبه — إخرسى جاكى قطع لسانك من جوا
اللغايلغ . . هوأ سيدك عبده بتاع حاجات من دى .

سنيه — وهوه يا ستى يعنى ما فيش حد اسمه عبده غير
سيدى عبد الصبور . أهو فيه عبده المكوجى ، و عبده
اللبان .

أم رتيبه — وكان لك عين تقولى كده يا ببحه . .
يا قليلة الحيا .

سنيه — يا ستى أهو كلام . . إحنا خسرانين حاجه ،
أنا بقالى سبع سنين سايقه عليهم النبي . . لاحد حضن
ولا حد قرص .

[يفتح الشباك الذى فى البيت المقابل و تبدو فيه أم سيد]

المشهد الثاني



[أم رتيبه — سنيه — أم سيد]

[سنيه تعاود الحرق ، والفناء ، ومضع اللبانه]

أم سيد — العواف ياست أم رتيبه .

أم رتيبه — يعافيكى ويعافى بدنك .

أم سيد — إزاي بسلامته سى عبد الصبور أفندى . .

مش بخير؟

أم رتيبه — بخير ياختى الحمد لله ، وازاي سى سيد أفندى؟

أم سيد — والنبي يسأل عليكى دائماً .

أم رتيبه — سألت عليه العافيه ، بقاله مده ما حدش

يدشوفه ، ولا يسأل على سى عبد الصبور ولا حاجه ،

ولا كأننا جيران ، ولا الشباك فى الشباك .. يا اختى دا النبي

وصا على سابغ جار .

أم سيد — والله ياستى أم رتيبه .. أصله مشغول

اليومين دول ، والدنيا تلاهى ، ويادوبك بيبجى من الشغل

يحط راسه ينام ، وصحته مخستكه شويه مابقاش زى الأول .
كان زمان عليه عافيه زى الحصان . . دلوقت مابقاش
يستحمل حاجه أبدأ ، وطول النهار شكوى م الشغل ومن
الناس .

أم رتيه — ربنا يكون فى عونہ . [بسم على الباب
الخارجى طرق فتنادى على سنيه] — شوفى مين يا بت [تم تعاود
الحديث مع أم سيد] ما تفضلى شويه يا ست أم سيد ، أنا
خلاص ماورايش حاجه . . الملوخيه اتخرطت والفرخه
على النار . . مش ناقص غير أسقط الموخيه فى الشوربه ،
والتقلية حاخليها بعدين . . أصلى متعوده ما أطشهاش
إلا وسى عبد الصبور داخل ، والنبي تيجى ندردش شويه ،
أصل أنا زهقانه اليومين دول ونفسى متضايقه .
أم سيد — بس بسلامته سى عبد الصبور زمانه
جاي دلوقت .

أم رتيه — لسه بدرى عليه . . دا مايجيش إلا الساعه
اتنين . . لسه واخذ على مواعيد الشغل . . اللى فهشى
ما يخلشى . أهو راح المعاش لكن برضه كل يوم الصبح
ياخذ الشنطه تحت باطه ويخرج ، ويفضل يسرح
ما يرجعش إلا الساعه اتنين زى الموظفين .

أم سيد — طيب يا ختي أنا جيا لك حالا .
 [تختقي أم سيد داخل الشباك]
 [يطرُق الباب مرة ثانية . . وسنية مستمرة في الحرط والغفناء .
 ومضع اللبان] .
 أم رتيبه [ملتفتة في غضب] — إنظرشت والا إيه . .
 قلت قومي شو في مين . . جاكي خابط في ودانك ، كفايه
 عليك الغنا ، وسي عبده .
 سنيه [تهنئ متناقلة] — خليه مرزي على الباب ، يعني
 مستعجل على إيه . . جايب القليعه ، والا جايب الديب
 من ديله . . مش جايب بشكله كسبره ، [تفتح الباب] خش .
 خلاص . . الدنيا طارت ؟ مش قادر تصبر ؟
 [يدخل زينهم الخادم مندفعاً ويضع قرطاساً صغيراً ويصيح في عجلة
 وهو بهم بالخروج] .

المشهد الثالث



[أم رتيبه — سنيه — زينهم]

زينهم — خدوا الكسبره أهه . . الراجل قال ما فيش
 حاجه إسمها بشكله اليومين دول ، جبت بالتعريفه كله ،

بنسكه آل ، فيه حاجه اسمها نكله . . أنا نازل بقى .

أم رتيبه [تغادر الشباك وتصيح بزينهم] — تعا هنا ياللى
تنقصف رقتك . . رايح فين ؟

زينهم — مش وقت شرح . أصلى مستعجل قوى ، فيه
خناقه على باب الحاره .

أم رتيبه — وانت مالك بقى ومال الخناقه .

سنيه — سيديه ياستى يمكن ياخذ له بطحه فى نافوخه ،
تَرِيحْنَا مِنْهُ شُوِيَه . . .

زينهم — أنا رايح أتفرج . . دى خناقه هاييله ، زكيه
الملدنه بتاعة الفول النابت مرقدّه الحجاج وحش الجزار على
الرصيف ، وبتخبطه كل دماغ واختها . . بتخلى الشرار
يطلع م الرصيف ، والناس ملهومين عليها مش عارفين
يخلصوا الراجل من إيديها أبدأ .

أم رتيبه — خش انجر ياواد بلاش مسخره ، مالنا
احنا ومال زكيه الملدنه والمعلم وحش ، إمشى ياللا دق
الكُسْبِرَه .

زينهم — الحق علىّ ، أنا برضه استاهل اللى ماوقفنش
أتفرج عليها قبل ماجيب الكسبره . . عملت نفسى بنى آدم
وقلت ياواد روح الاول ودّى الكسبره لِحَسْنِ سَتِك

تكون مستعجله عليها ، وبعدين ارجع اتفرج ، برضه أنا
الحق على . ابقى مره إذا جبتلكم حاجه بعد كده دوغرى .
سنيه — خش انجر دق الكسبره بلا قلبه دماغ .
زينهم — أسكتى انتى لحسن والنبي أحطك ع الطليله ،
واخرطك زى الملوخييه اللى قدامك [ملتفتاً الى أم رتييه فى توسل]
أروح ياست قبل الخناقه ما تخلص ؟

أم رتييه — قلت لك خش ، يعنى خش .
زينهم — طب خلىنى اتفرج عليها م الشباك [يندفع الى
الأريكة مدياً بجسده من الشباك صائحاً بسرعة] .. أعم باينين ..
أدينى شايفهم كويس .. زكيه فوق .. الوحش يفلفص ،
يفلفص ، كويس وحش . مسكها من شعرها .. مسكته من
شنبه .. الوحش ييشد .. زكيه بتشد .. ها .. شد ..
شد .. شد .. يا خساره طلع فى إيدها .

أم رتييه وسنيه — هو إيه ؟
زينهم — شنب الوحش ، طلع فى إيد زكيه ، الوحش
لوحده ، والشنب لوحده .. الوحش من غير شنب ، زكيه
بشنب ، زكيه طبقت فى زمارة رقبتة ، الوحش يصرخ ..
زكيه فأعته دماغ ، ودماغ تانيه ، وتالته .. الروسيات بترف
زى المدفع الرشاش .. الوحش انفتح حاجبه .. الوحش

سسخ . . . وُل زكيه ، تعيش زكيه ، فتوة الناصريه .
أم رتييه [تهجم على زينهم ونجره من قفاه] — إنزل من
على الكنبه جاك نازله في قصابك . . أنا مش قلت لك ميت
مرّه ماتطلعش على الكنبه برجليك اللي زى الطين .

زينهم — برافو زكيه . . أنا كنت عارف انها حاتغلب ،
يعنى نابك إيه يا وحش غير ضياع شنبك ، عشان تبطل الغابه
[ملتهتأ الى سنبه] آدى النسوان والا بلاش . . مش زيك
يا قرعه .

سنيه — خليه يتلم يا ست ، لحسن والنبي أعمل فيه اللي
انعمل في الوحش .

زينهم [مصفقاً بيديه مفتياً] — دانا باحبك ، بس شايله
السمنه في الزلعه^ك .

سنيه — أسكت أحسن لك !

أم رتييه [وهي تجلس على الكنبه وتأخذ في تفصيم راس توم] —
امشى دق الكسبره .

زينهم [يأخذ الكسبره ويتجه الى المطبخ منشداً] — والله
بحبك بس شايله السمنه في الزلعه^ك [يختبئ داخل المابغ ويسمع
صوته قائلاً] — بكره الماتش الأصلي المعتبر . . زكيه ضد

على الذكر، والله حقها تلعب كوره .. يا خسارتك يا زكيه في
القول النابت ، دانت عليكى سمانات رجلين ، ولا ابو حجاجه .

المشهد الرابع



[أم رتيبه — سنه]

أم رتيبه — يا الله يابت ياسنيه ، شهلى شويه ، كفايه
خرط بق ، إنت حاتخليها إيه ؟ عصيده ؟ . إحنا عايزين
نوضب الصاله عشان ستك الحاجه أم سيد جايه ، والا عاجبك
كده الكركبه اللي احنا فيها ؟

سنه — خلاص أهو ياست ، خرطتين بس ، ياسلام
عليكى ياست ، دانت عايكى ظهر مكسم وزى الزبده ..
يا خسارتك ياستى فى قلة الجواز ، هم الرجاله انصابوا فى
عينهم والا عميوا ؟

أم رتيبه [تتحسس نفسها فى حزن] — قلة بخت ياسنيه
يابنتى .. قليلة البخت تلاقى العضم فى الكرشه .. واحنا حتى
العضم مش لا قيئه .. رضينا بالهم والههم مش راضى بينا .

سنیه - یاستی ربنا یسهلها ویرزقک بان الحلال .
 أم رتیه - یابنتی إذا کان علی . . اهو مسهلها ، وإذا
 کان علی ولاد الحلال أم کثیر . . لکن الدور علی سیدک
 عبدالصبور الی معقدها فی وشی . . وقاعد لی زی قرد
 قطع . . کل ما ییحی عریس یطفشه ، لما تمس حالی ومیل
 یحتی وخلا رقتی بین النسوان زی السمسمة . . هو أنا
 یابنتی قادره أوری وشی لحد . . خمسہ وأربعین سنه
 وأنا قاعده استنی ابن الحلال . وکل ما ییحی ابن الحلال
 یصدہ بوشه العکر وکلامه الی زی السم . . واهی السنه
 بتفوت ورا السنه . والعمر بیضیع ولا من دری ولا من
 شاف ، وادینی حاعیش وأموت وحدانیه . . من غیر
 لا ولد ولا بنت ، وبس بالاسم أم رتیه ، أم رتیه ،
 الله یحجمها خالتي أم حمیده بنت الشیخ معوض فضلت
 تقاطع علی وتنق بلسانها الی زی العقرب ، وتقول لی
 یام رتیه ، یام رتیه ، وأنا لسه بنت ما طلعتش من
 البیضه ، آل إیه عشان حلت إن انا اتجوزت وخلفت
 بنت إسمها رتیه ، ومن یومها ما شفقتش الجواز إلا فی حلم
 القرشانه النفاقه أم حمیده .
 سنیه - یوه ، یاستی ماترعلیش نفسک ، دانت لسه

صبيه في عز شبابك ، والجايات أكثر م الراحات .
أم رتيه — ماهو بكره الجيات يبقوا رايحات ، والا
يعنى تفكرى الجيات حتبقى أجعص م الراحات ، هو
عبد الصبور أفندى تستعصى عليه حاجه أبدأ ، بكره
يضيع الجيات زى ما ضيع الراحات ، ياما ضيع على
فرص .. هم اللى خطبوني شويه يابنتى ياسنيه ؟ دانا كان ليّه
شئ ورئه .

سنيه — والنبي ياستى باين عليكى كنت بنت حنت ،
تلعبى بالبيضة والحجر .. كام واحد والنبي ياستى خطبوكى ؟
أم رتيه — ما تفكر نيش بقى يابنتى باللى مضى وتجري
ريق . هو انا أنسى سى على العطار إالى كانت دكانه قدام
بيتنا لما كنا ساكنين فى حوش آدم ، وكان طول النهار
عينه ماتتور بش من الشباك وأنا واقفه ورا الشيش وواخده
بالى . كان راجل ولا كل الرجاله . باين عليه العز والنعمة
خدوده مورده ، والدم حاينط من وشه ، وطابع الحسن
فى دقته ، يساع فنجان ، وإيده متخخه ويضه زى الفل ،
وعاوج اللاسه والجليه سكروته عليه تشف وترف ، والبلغه
الفاسى فى رجليه بتضوى .. قصده ما طولشى عليكى ياسنيه
يابنتى .. كان حايتجن على كل ما يشوف إيدى تتمدم الشباك

والا يلحنى بانشر الغسيل فوق السطوح .. لغاية ما في يوم
العصرية سمعت نقر على الباب .. بافتح أشوف مين لقيته سي
على .. أنا شفته قدامى حسيت روحى ساخت ، سألته عايز
مين قال عايز يقابل سي عبد الصبور .

سنيه — وهوّا يعنى ما كنش فيه غير سي عبد الصبور
اللى يقابله ؟

أم رتيبه — يعنى حايقابل مين تانى ، هوّا أنا ليّه حد
غيره . ما احنا اتريننا يتامى لالى غيره ولا له غيرى ..
أهو طول عمرى ما شفت لى أب ولا أم ، وكل اللى لى
فى الدنيا هوّه عبد الصبور . قضيت عمرى فى خدمته .
وهوّا الارضى يتجوز ولا يخلينى أتجوز .

سنيه — وبعدين ياستى عمل إيه سي على ؟

أم رتيبه — دخل أودة المسافرين ودخلت أصحى
سى عبد الصبور عشان يقوم يقابله ..

سنيه — وبعدين . ؟

أم رتيبه — دخل يقابله ، ودخلت أععمل القهوة ،
وأنا قلبى بيدق ، ويدق ، أصلى كنت حاسه ، وعارفه .

سنيه — يوه ياستى وهى الحاجات تحفى .

أم رتيبه — أيوه والنبي ما تخفاش أبدأ .. عقبال

مادخلت أعمل القهوة وقلت للبننت تحيه - الخدامه اللى كانت
 عندنا قبلك - تدخلها . . بصيت لقيت سى على خارج بير طم
 ووشه أحمر زى الجزره ، ووراه سى عبد الصبور بوشه
 الأصفر اوى الناشف اللى زى جريد النخل . . يقول له :
 مع السلامه ياسى على . . ما كانش يتعز . . الراجل خرج
 من بير السلم وأنا مسكت سى عبد الصبور ، قلت له هوّا إيه
 دا اللى ما كانش يتعز ؟ . فقال لى طلبه . . قلت له هوّا عايز
 إيه ؟ . قال لى : جاي يخطبك . . قلت له : وبعدين ، قال لى :
 ولا بعدين ولا قبلين . قلت ما كانش يتعز يعنى بالعربى
 رفضت . سألته ليه ، قال لى دى حاجات ماتفهمهاش انت .
 سببى لى انت الحاجات دى أنا أدرى بيها . الستات دايماً
 قلايات العقل ، لازم يسيبوا الحاجات اللى عايزه تفكير
 وتديير للرجاله ، أمال الرجاله اتخلقوا ليه . . المقصود
 فضلت ألح عليه واحاوره واداوره لغاية ما عرفت السبب .
 سنیه - إيه هو بقى ياست السبب ؟

أم رتييه - قال لى أن الراجل تخين قوى وأنا تخينه
 قوى ، وإن أولادنا ، مش حايقوا بنى آدمين :
 حايقوا فيلهً والا بالقليل أوى . . حلايف .
 سنیه - له حق والنبي ياستى .

أم رتيبه — إخرسى جاكى قطع لسانك ، دا انا كنت
جبت أولاد زى القشطه .. المقصود قعد يجيب دلى فى سبب
ورا سبب ، مره يقول إن مافيش سرير يستحملنا ، ومره
يقول لى إن فيه خطوره على من جواز العطارين عشان
حافظل آكل حلبه ومفتقه وحاجات م اللى بتسمن ، لغاية
مايجى على وقت أطق أموت ، ويكون هو السبب عشان
وافق على الجواز ، وبالطريق ده سددها فى وش الراجل .
سنيه — والنبي برضه ياستى له حق .. مين يعرف

لو كنت اتجوزت سى على العطار كان جراك إيه ؟
أم رتيبه — طب و ابراهيم أفندى العقر ، العرضحالجى
اللى قد الدنيا ؟

سنيه — ماله ياستى ، برضه طفشه ؟

أم رتيبه — وطفش أبوه .

سنيه — ليه بقى ؟

أم رتيبه — عشان اسمه العقر .. العقر .. مايقدرشى
بسلامته يناسب واحد اسمه العقر ، أصله هو اللى بسلامته
إسمه عدل قوى ، عبد الصبور عبد الغفور عبد الشكور
المقرز ، ياختى لو كان الواحد يشوف عيبه ما كانش عايب
على الناس أبداً ، إلا المصيبه إن البنى آدم من دول تلاقه

بحج . . . يعنى ما يعيبش على الناس إلا بالحاجه اللى فيه . . . يعنى
تلاقى التخين يقول لك يا سلام على فلان ده ماله تخين كده
يا ساتر يا رب ، وتلاقى تقيل الدم ، يقول لك أما فلان ده
عليه دم ياباى ، وسى عبدالصبور المقزقز ما يقدرش يناسب
واحد اسمه العقر .

سنيه — وعلى كده طار العقر ؟

أم رتيه — العقر ، والسالموطى بتاع المصبغه والشيخ
عدي ربه خادم الحسين ، والحاج صميده اللبان ، والشيخ
إبراهيم عبداللاوى الملتزم ، وزكى افندى شندى بتاع
المانيفاتوره .

سنيه — كل دول خطبوك وطاروا ؟

أم رتيه — طاروا ياسنيه يابنتى ، طاروا كلهم ، والعمر
بيطير يوم ورا يوم ، يعنى إيه فائدة عيشة الست لما تخش
الدنيا وتخرج منها من غير ما تتجوز ، تبقى قيمة العيشه إيه لما
الواحد ما تعملش الحاجه اللى انخلقت عشانها ، ربنا مش
خالق الدنيا رجاله وستات عشان الرجاله يتجوزوا الستات .
الست عملها ربنا عشان تتجوز وتجبب أولاد ، وأنا ضيعت
عمرى مع سى عبد الصبور ، لاجواز ولا ولاد .

سنيه — الصبر طيب يا ستى !

أم رتيبه - أيوه . . الصبر طيب ، وهو البني آدم العاجز ، قدامه إيه غير الصبر ؟ أهو يعزّي نفسه بأن الصبر طيب ، وهو مجبور على الصبر ، رضى والا مارضيش ، صابر ، صابر . . لكن عشان يستحمل الصبر يقوم يقول إن الصبر طيب ، هوّه فيه يابنتي أمّ من الصبر .

سنيه - ربنا كريم ياستي بكره يفرجها .

أم رتيبه - أيوه يابنتي كريم ، أنا برضه لما أقعد أراجع نفسي ، وأقول الحمد لله على السرّ ، الحمد لله ، على اللي اذّاه لنا ربنا ، دامدّينا حاجات كثير ما حناش حاسين بيها ، أصل الواحد ما يحسش اللا بالحاجه اللي مش معاه ، لكن الحاجه اللي معاه ما يعرفهاش أبداً ، ما يعرفهاش ولا يحس بها إلا لما تضيع منه ، يقوم يعرف إنه كان معاه حاجه ، إحنا دائماً نسخط عشان ربنا مادّناش ، لكن ما بنحمدوش على إنه إذّانا ، مع إنه يابنتي دائماً بيدّينا .. أنا بعض ساعات أقعد أفكر أقول مش برضه ربنا عوضني ، يعني هو انا لو كنت اتجوزت ، كنت حلاقي واحد يرعاني ويحن عليّ ، زى سي عبد الصبور ، أهو حقيقي ، بنغزه ، ومهفوف ، وما نيش عارفه آخذ منه لا حق ولا باطل . . لكن برضه مريحني وموكلني ، وكاسيني . . ولو قلت آه ، يقول ورايا ميت آه .

سنيه — أيوه والنبي ياستى ، سيدى عبد الصبور مافيه
زيه أبدأ ، ولو انه اليومين دول طالع لى فى حاجه جديده
ماهيّاش عاجبانى أبدأ ، ربنا يستر عليه منها .

أم رتبيه — مش حكاية دراسة الأرواح ، وتحضير
الأرواح . . ربنا يكفيننا شرها ، إلهى يورينى فيك يا شيخ
هاب ، إنت اللى جرّيت رجله فيها ، هوّه لا كان يعرف
أرواح ، ولا عفاريت . طول عمره غرقان فى الخط العربى ،
والأقلام البسط ، واليفط ، وكراريس المشق ، من يوم
ما عرف سى هباب الطين ، وهو ماورا هوش غير الأرواح .
سنيه — ربنا يستر عليه ياستى ، أنا والنبي بخاف عليه
لما يخش الأوده ويقفلها عليه ، ويقعد يقرأزى القطط .

أم رتبيه — تكونش الأرواح دى هى اللى خسرت
أخلاقه ، وخلته على دى الحال ؟

سنيه — والنبي ياستى أنا مش راضيه افسر ، دا بقى
ما ينطقش ، وحكاية الصراحه اللى طالع لى فيها اليومين دول
كرّهت فيه طوب الأرض .

أم رتبيه — أهو كان زمان برضه طالع فى حكاية
إنه يقول للأعور أعور فى عينه . لكن أهو برضك كان
عنده شيويه خشا ، لكن اليومين دول خلاص ، ماتعرفى

إيه اللي جراه . العجز . والالهبابه الأرواح اللي طالع فيها .
سنيه — تصدق يا ستى امبارح كان طالع على السلم قام
قابل إدريس افندى اللي ساكن فوقنا ، الراجل يبسلم عليه
بأدب ، بصيت لقيت ده من غير مناسبه . . بيقول له
يا إدريس افندى انت ماسمعتش على أزمة الزيت اللي فى البلد .
الراجل قال له أى والله ، الله يكون فى عون الناس ، فرد عليه
سى عبد الصبور بشخط ، وقال له يكون فى عونهم ازاي
وأمثالكم عمالين يحوشوا الزيت .. الراجل استعجب قوى
وقال أنا ياسى عبد الصبور .. أنا والله ما عندى نقطة زيت
فى بيتى .. قام قال له ما عندكشى فى بيتك نقطة زيت .. لكن
عندك فى طربوشك كيلو زيت ، لو كان كل واحد زيك
يعصر الخمسه ستى الزيت اللي فى طربوشه كانت انفكت
أزمة الزيت .

أم رتييه — يا عيب الشوم ، قال الكلام ده كاه
للراجل ، ياما أنا خايفه يعمل كده مع سيد افندى وأمه ،
أهى دى تبقى المصيه السودا .

سنيه — وهو ماله وما لهم ؟

أم رتييه — أصلى ما خبيش عليكى يا سنيه ، أنا شايفه
اليومين دول من ست أم سيد ريق جلو ، ودايماً تقول

إن سيد أفندی بیسأل علیّ ، وقلبي حاسس ، إن فيه حاجه
فی ضمیرها ، وعینی الیمین بترف ویدی الشمال بتاکنی وعمری
ما بتحصل لی الحاجات دی إلا لما یکون فيه خیر جای .

سنیه — خیر یاستی خیر ، خیر إن شاء الله .

أم رتیه — أنا حاسه إن سید أفندی ناوی یخطبني
قريب ، وحاطه إیدی علی قلبي ، لاسی عبد الصبور یلخبط
الدنيا ویطیره زی ما طیر اللی قبله ، وهو الیومین دول
زی مانتی شایفه حاله مبرجل .

سنیه — ربنا یستر .

[یسمع دق علی الباب] .

سنیه — تعالی شوف الباب یازینهم .

زینهم [من المطبخ] — قومی افتحی ، أنا مش فاضی .

سنیه — إنت مش خلصت خلاص دق الکسبره ،

بتعمل إیه عندک ؟

زینهم — وانت مالک أنت ، بقرا ، حد شریکی .

سنیه — إنت بتعرف تقرا ؟

زینهم — أهو بتعلم ، بفک الخط .. مالک انت ومالی ،

زین وفتحہ زا ، ره وفتحہ را ، عین وفتحہ عا ، زرع ،

کویسه دی والا لا ، یا خسارتک یا زینهم فی قلة التعليم
کان زمانک واخذ اللسانس .

[الباب بدق مرة أخرى]

أم رتیه [فی غیظ] — قومی یابت اتحرکی وافتحی
الباب ، إنفتحت فی راسک طاقه ، کفایه علینا نقعد نسمع
خناقکم طول النهار ، حقه بطلوا ده واسمعوا ده .
[تفتح سنیه الباب .. وتدخل أم سید]

المشهد الخامس



[أم رتیه — أم سید]

أم رتیه — یا مرجه یا مرجه .. أهلا ، وسهلا ،
الدنيا نورت یا ست ام سید .
أم سید — الله ينور علیکی ویشرف مقدارک .
أم رتیه — خطوه عزیزه .
أم سید — ربنا یعزک یاختی .
أم رتیه — أهلا وسهلا .. أهلا وسهلا .. اتفضلی
یا ستی الحاجه .. تعالی هنا علی الکنبه جنب الشباك ..

داحنا زارنا النبي .. قومي يابت ياسنيه فزّى .. لى الملوخيه
 واركنى الطبلية وانشلى الفراخ من الشوربه واسقطى فيها
 الملوخيه .. قومي كده اتحركى ، عدم المؤاخذه ياستى الحاجه .



[أم سيد]

أم سيد — خدى راحتك ياختى .

أم رتييه — واد يازينهم ، تعال انجر لم عروق الملوخيه
 دى ارمها فى صفيحة الزباله .. بلا زرع ، بلا ضرب ،
 زرعوك زرع بصل ، وضربوك على نافوخك بالصرم ..
 آل بعد ما شاب ودّوه الكتاب .. ما تأخذنيش ياستى
 الحاجه على النكشه اللي احنا فيها .. أنا أصلى ما عنديش

خدامين . . أنا عندى نوايب . ، عندى كواين .
أم سيد — ياختى وهمّ الخدامين بقوا خدامين . . دول
بقوا أسياد .

[يدخل زينهم وفى يده كتاب القراءة الرشيدة]
زينهم [الى سنيه مشيراً بأصبعه الى الكتاب] — شايفه يابنت
يا سنيه راسمين أمك وأبوكى فى كتاب القراءة .

سنيه — صحيح يا زينهم؟ ورنى كده؟
زينهم — أمم ، أم قويق ، وأبو جلامبو .
سنيه — بتنكك ياروح أمك ، جاتك نيله ، جاتك نيله
حزّم ، لم ياخويا العروق لم ، أم قويق وأبو جلامبو ، والله
ما فيه أبو جلامبو غيرك ، يا مصدى ، يا معفن ، يا مقشف
يا مجنزر .

أم رتييه — إتلى يا بت إنت وهوّا ، انتوا لسانكم
ما يدخلش بقكوا أبدأ ، ما تتعبوش م الخناق ، ما يتهدش
جيلكم ، فوت لم العروق ووضب الصالة ، واتى اعمل قهوه
لستك أم سيد . . تشربها إيه يا حاجه؟

أم سيد — خليها على الريحه ، والا احسن خليم يجيولى
الكنكه والسبرتو والبن وأنا اعملها هنا ، أنا أصل دايماً
أحب أعمل قهوتى يايدى .

أم رتييه — تسلم إيديكي باسقى الحاجه ، أمرك [الى سنيه]
هاتى عدة القهوه يابث هنا قدام ستك ، إشهلى شويه . أنستينا
يا ست الحاجه ، إزاي بسلامته سيد افندى ؟

[يخرج زينهم وسنيه]

أم سيد — والنبي حاله مش عاجبنى اليومين دول أبدأ ،
شايفاه مش رايق كده ، وصحته مخستكه ، وبان عليه الهم
والتعب .

أم رتييه — ياختى بعد الشرعنه ، يمكن يكون استهوى .
أم سيد — أبدأ والنبي ياختى ، دا حتى دايماً محرّص
على نفسه .

أم رتييه — أهو من باب الاحتياط برضك ، حقتك
تعملى له كاسات هوا والا اعملى له بالقدره ، أنا حابعتك
القدره اللى عندى ، وقتيلة الزيت تحطها على ضره مرتين
تلاته تمص كل البرد اللى عنده وتشد وسطه وتصلب جتته .
أم سيد — والله يا ست أم رتييه أنا متيأ لى الحكايه
مش حكاية برد ، دا باين عليه مهموم ، ومتضايق ، وزى
اللى فيه حاجه شاغله باله .

أم رتييه — ومتضايق ليه ومهموم ليه ؟ ربنا ما يجيب
لاهم ولا ضيق .

أم سيد — أنا افكرته في الأول مهموم من حاجه
في شغله ، وقلت يمكن حد ضايقه والا داس له على طرف .
أم رتيه — ماعاش اللي يضايق سيد أفندي والا يدوس له
على طرف .. دا راجل أمير ، وزى السكره ، يضايقوه ليه
ياختي ؟

أم سيد — قلت يمكن حد مسه بكلمه كده والا كده ،
أهو الأمر ما يسلس ، والا يكون هوّا عمل غلطه ، أصل
اليومين دول الشغل بق متعب قوى وهوّا مايرحمش نفسه .
أم رتيه — الله يكون في عونك ، وياخذ بيده .
أم سيد — أصل المعمل كبر قوى ، والإنتاج بيكثر ،
والأصناف بتزيد ، وكل الشغل متوقف عليه وحده ،
مفيش في البلد خير غيره .

أم رتيه — باين عليه ياختي ، باين ، هوّا فيه حد زى
سى سيد أفندي !

أم سيد — من يومه والنبي يا ست أم رتيه .. خمس
وأربعين سنه وهو الخبير الوحيد في المعمل ده .. ما وئش
ولا كئش ، لما انحرق وانكوى .. حاجه تلهب ياختي ..
مين يقدر يستحمل غيره ؟

أم رتيبه — ربنا يحميه ياختى .

أم سيد — يحميه أكثر من كده ، دالولا إنه راسى
ع الشغلانه دى ، كان زمانه بقى حريقه ، كان زمانه لقلب
و فرقع وانفجر .

أم رتيبه — يالطيب .. يالطيب يارب ، ياختى بلاش
الشغلانه الوالعه دى ، ما بلاش معمل المفرقات ده .

أم سيد — معمل إيه ؟

أم رتيبه — المفرقات !! مش بيشغل خير فى معمل
مفرقات ! ؟

أم سيد — مفرقات إيه ياختى ، سلامة عقلك .

أم رتيبه — أمال معمل إيه ياستى الحاجه اللى ييلهله ده ؟

أم سيد — معمل طرشى يا حبيبتى .

أم رتيبه — معمل طرشى ؟

أم سيد — أيوه معمل طرشى ، خير فى معمل طرشى .

ماله ؟ وحش ؟

أم رتيبه — لا ياختى مش وحش أبداً ، اسم الله عليه

ربنا يحميه .

أم سيد — يوه ما بلاش ياختى حكاية يحميه دى ، هوّا

ناقص حمو .

أم رتيبه — أبدأ ياختى أبدأ .. ربنا يبرد جوفه ،
ويسقع مصارينه . وبسلامته سى سيد افندى الخبير يعمل
ليه فى معمل الطرشى ؟

أم سيد — ياختى قلت لك خير ، هو اتى ما بتفهميش ؟
أم رتيبه — أيوه ياختى فاهمه وعارفه .. خير ..
والخبير دا بسلامته يعمل ليه ؟

أم سيد — يدوق .. هو الأمر الناهى فى المعمل كله ..
ما فيش عينه طرشى تخرج م المعمل إلا لما تفوت عليه ..
لا لفت ، ولا خيار ، ولا جزر ، ولا كرنب ، ولا أرنيط
ولا فلفل ، ولا بنجر ، ولا لمون ، ولا حاجة تخلق فى عالم
الطرشى والمخللات ، إلا لما يحكم عليها هوّه ويوافق على
خروجها .

أم رتيبه — ويحكم عليها ازاي ياختى ؟

أم سيد — يعنى يشوفها ناقصه شطه . ناقصه خل .
دلعه .. حادقه . حاميه .

أم رتيبه — ما شاء الله . ماشاء الله . عيني عليه بارده

[يدخل زينهم حامل معدنات القهوة و يضمها على منضدة صغيرة أمام أم سيد]
زينهم [لأم سيد] — أجيبلك ميه سقعه والامية دقه ؟
أم رتيبه — اقصر لسانك جاك قطعته . ميه دقه لما

تلهب جوفك . عدم المؤاخذه ياست أم سيد . . أصله
دائماً مسحوب من لسانه ، فوت امشى إنجر على المطبخ
قول للبت سنيه تاخذ بالها من حلة الرز لحسن تشيبتها
زى ماشيبتها امبارح . [ملتفتة الى أم سيد] أيوه ياست الحاجه
بقى بسلامته مافيش عينه طرشي تخرج من المعمل إلا لما
تفوت عليه ؟

أم سيد — أبدأ ، قبل البرميل من دول ما يخرج
للبيع لازم ياخذوا التصديق منه بالخروج ، هوّ الوحده
الآمر الناهي ، مافيش قرن فلفل يعدى من غير إذنه .
أم رتييه — ياسلام ، ياست أم سيد ، كل ده بيعمله
سيد افندى ، ربنا يزيد من سلطانه ، وبقاله كتير في
الشغلانه دى ؟

أم سيد — من يومه ياختى .. من يوم ماوعى على الدنيا
وهو خير مصر الأول في صناعة الطرشي .. عليه لسان في
دوق الطرشي مينزلش الأرض .

أم رتييه — ماشاء الله ماشاء الله . والموهبه دى جات له
منين ياختى ، خلقه كده من عند ربنا ، ولا ورائه ؟
أم سيد — أبدأ والنبي ياختى ولا ورائه ولا حاجه ،
دا حتى أبوه الله يرحمه ماكانش له في الطرشي أبدأ ،

وما كانش يحب غير الحاجات المعسله ، زى العصيده ،
والمفتقه ، والعسل والطحينه .

أم رتيبه — أمال المحروس سيد أفندى ، خد الموهبه
دى ازاي ؟

أم سيد — بالتمرين . . بمضى المده .

أم رتيبه — إزاي ياختي ؟

أم سيد — المسأله ابتدت معاه وهوّا لسه فى اللغه ،
أصلى لما كنت برضّعه . . لبني نشف ، فبقيت أديله لبن
اصطناعى ، فليله من ذات الليالى صحى يصرخ بالليل وكنت
متعوده دايمًا أول ما يصحى أروح ماده قزازه اللبن فى بقه
يروح راضع شويه وتنه نايم ، فى الليله دى مديت إيدي
على الترايزه وأنا مغمّضه وعينيّ فيها النوم مسكت البزازه
لقيتها فاضيه ، فأعدت أحسس لقيت الكبايه اللى فيها اللبن
جنب البزازه رحتم دلها فى البزازه وحطها له فى بقه ،
راح مقربها لآخرها وراح نايم .

أم رتيبه — بالهنا والشفا ، صحه وعافيه على سيد أفندى
اللبن كويس ومغذّى .

أم سيد — ما كانش لبن ياستى أم رتيبه .

أم رتيبه — أمال كان إيه ياختي ؟

أم سيد — مية لفت .

أم رتيبه — يوه ياندامه ، ومنين جتك مية اللفت ؟
أم سيد — أصلى كنت محضره كباية مية لفت أشربها
على الريق ، وكنت حاظه الكبايتين جنب بعض على
التراييزة فلها مديت إيدي بالليل جت في مية اللفت .
أم رتيبه — ياختي بره وبعيد ، وجرا إيه لسيد أفندي
بعد كده . . مات ؟

أم سيد — تقي من بقك سبع تفات . . بعد الشر عنه .
أم رتيبه — ألفت بعد الشر ياخالتي الحاجه ، جرا له
إيه طمنيئي ؟

أم سيد — صبح لايه ولا عليه ، زى القرد المسنسل
ومن يومه ياختي وهو راسه وألف سيف . . مايدوق اللبن
أبدأ ولا يحطه على لسانه ، كل رضاعته مية لفت ، مية جزر
مية بنجر .

أم رتيبه — بسم الله ماشاء الله .

أم سيد — قولى معدته اتحرشت ولسانه اتودك ،
وأول ما ابتدا يمشي ويلعب مع ولاد الحاره ، كنت
دايماً تلاقيه يحب الطرشجيه ، فتبصى تلاقى أولاد الحاره
ياخدوا مصروفهم يشترخوا بيه قصب والا مصاصه

والابراغيت الست ، وهوّا من دون الولاد ياخذ مصروفه
إن كان مليم والا نكله ، وتنه راجح على الطرشجي الملى على
باب الحاره .. يفضل يقربع فى مية لفت ومية دقه لما
يقول بس .

أم رتبيه — ياسلام عليك ياسيد أفندى ، من يومك
وانت ابن كار .

أم سيد — أهو تنه كده ، يقربع فى مية اللفت
والدقة ، تقوليش غاوى .. لغاية مابدا الاحتراف .

أم رتبيه — وإزاي ياختى ابتدا الاحتراف ؟

أم سيد — فى يوم من ذات الايام راح عند بتاع
الطرشى ، وقال له ادبنى بمليم مية لفت وبمليم مية دقة ، الراجل
مدّله إيدته بكوز مية اللفت قربهه ، ومدّله إيدته بكوز مية
الدقة شرب شفطتين ورجعه ، الراجل قال إيه مالها ، قال له
وحشه مش مضبوطه .. قال له ليه .. قال له ناقصه شطه والخل
بتاعها مغشوش .. أنا عايز تجيب لى من البرميل الثالث الملى
على إيدك الشمال ، أيوه البرميل ده .. الراجل فرّغ الكوز
وملّاه من البرميل الملى قال عليه ، راح مقربهه وقال له
أيوه ، أهى دى تمام .. الراجل استعجب ، خد شفطه من
البرميل ده ، وشفطه من ده ، استعجب أكثر ، لقي كلام

الولد مضبوط وهو السه مطلعشى من البيضة عمره لسه سبع سنين ، راح مرجع له النكله ورقع الصبي بتاعه علقه ، وقال لسيد إسمع ياواد ، إنت تيجى كل يوم هنا تاخذ لك كوزين مجاناً ، وبعد جمعه كان سيد بيشتغل فى دكان الطرشى ، قاعد على كرسى مايعملش حاجه أبداً غير الدوقان ، ويفضل على كده كثير خمسة وأربعين سنه .

أم رتيه — ماشاء الله . . ماشاء الله .

أم سيد — الدنيا اتغيرت ، والمحل كبر واتسع ، وحاله راج ، وبقى معمل كبير أد الدنيا ، وسى سيد هو هوه ، مالوش شغله غير انه يقعد على الكرسى ، ويدوق ، خمسة وأربعين سنه ، وهو حافظ مركزه ، خبير مصر الأول فى صناعة الطرشى .

أم رتيه — أدها وأدود ، وهو حد يقدر على كده غيره .

أم سيد — عشان كده بقول إن ضيقته وعكنته اليومين دول مش ممكن تكون م الشغل .

أم رتيه — أمال يعنى فكرك تكون من إيه ؟

أم سيد — والله ياختى أنا بقول إن فيه حاجه شاغله باله .



[سيد أفندي]

أم رتبه — زی إيه؟
 أم سيد — بقی یاست أم رتبه إنت موش غریبه وأنا
 مش حاخې علیکی ، بقی أنا طول عمری أقول له أنا نفسی
 أجوزك وافرح بك ، وهو كل ما أجیب له السیره دی
 ألاقیه كشر ولوی بوزه ، وقال لی أنا مش عاوز أتجوز . أنا
 مبسوط من عیشتی كده ، لكن الیومین دول ، شایفاه كده
 لما یجیب له سیره الجواز ، مایكشرش ولا یلویش بوزه ،

وحتى في بعض ساعات هوّا يقعد يقوللى ، والله يام ياريتنى
سمعت كلامك واتجوزت من زمان أهو الواحد ضيّع عمره
فشوش ، ودلوقت لو حب يتجوز مايلاقيش اللي ترضى به .
أم رتييه — ليه ياختى ألف من ترضى به ، هوّا فيه
أحسن من سيد افندى ؟

ام سيد — برضه أنا قلت له كدا ، لكن لقيت زى
ما يكون فيه حاجه في فكره عايز يقولها لكن مش قادر ،
زى ما يكون كدا مكسوف ، مستعيب ، خايف .
أم رتييه — وياختى مش قادر ليه ، هي الحاجات دى
عيب ، والا حد يختشى منها؟

أم سيد — المقصود . . فضلت آخذ منه وادى ،
وحاوره وداوره ، لغاية ما ابتدا يفضفض باللى في قلبه .
أم رتييه — وطلع إيه ؟ ! !

أم سيد — كله من هنا ، وكله من هنا ، قال لى .
أم رتييه — قال لك إيه ؟
أم سيد — يوه ياختى يا ست أم رتييه ، صبرك على ،
خلينى آخذ نفسى ، هي الدنيا طارت .

أم رتييه — على مهلك أوى ياختى ، خدى نفسك
بالراحة خالص . . هيه . . قال إيه ؟

أم سيد — كلبه من هنا ، وكلبه من هنا ، يا سيد قول
 ماتحبش عليّ أنا مش غريبه ، قال لي يام أنا نفسي أحش دنيا
 ومش لاتي حد يوافقني ، قلت له يا بني الدنيا الواسعه دي
 كلها مافهاش حد يوافقك ، بصيت لقيته وطاراسه في الأرض
 وقال لي بوشوشه ، فيه واحده بس يام ، واحده مافيش
 غيرها ، هي النص الثاني بتاعي ، النص اللي قعدت طول
 عمرى أدور عليه ، انتي مش عارفه إن البني آدم منا زي
 ما يكون لفته وانشقت نصين وانه طول عمره يفضل
 تعبان لغاية مايلاقي نص اللفته الثانيه ، ياختي هو قال لي كده
 وأنا اتاخبطت .. لفته إيه وخياره إيه .. قلت له إيه الكلام
 الفارغ اللي بتقوله ده يا سيد يا بني ، إنت يا بني عاوز تتجوز
 والا بتدور على نص لفته ، هو البني آدم دا ما يقنعش ..
 مافيش حاجه تملأ عينه أبداً .. كل اللفت اللي انت غارقان
 فيه طول عمرك وبعدين تقول لي إن ناقصك نص لفته .

أم رتيه — ياست ام سيد مش قصده نص لفته ..
 نص لفته .. دا قصده نصه الثاني .. أصل كل واحد كده
 لازم له نص يكمله ، يعني أنا ناقصني مثلاً ، نص كرنبه .
 نص بطيخه .

سنيه [مقبله من المطبخ تحمل معلقة وطبق] — وأنا يا ستى
ناقصنى إيه ؟

أم رتيه — نص حيه ، والا نص عقربه .

زينهم [من داخل المطبخ] — وأنا يا ست ؟

أم رتيه — نص نعل ، يامر قع يابولوزه ، يافرده شمال ،
شوف شغلك بقى وبلاش لماضه ، حاكم دايمآ تتداخل فى اللى
مالكش فيه .

سنيه [تمد يدها بالمعلقة] — شوفى حدقها كده يا ست ؟

أم رتيه [بمد أن تذوقها] — أهى كويسه ، بس هدسى

الوابور شويه من تحت حلة الرز [موجهة الحديث الى أم سيد]
فهمت بقى يا ست ام سيد ؟ أهو ده قصده .

أم سيد — ماهو برضه قال لى كده ، فهمنى إن نص

اللفته بتاعته ، يعنى الست اللى نفسه فيها .

أم رتيه — ولقاها ؟

أم سيد — أيوه يا ستى لقاها ، بس ما طلعش لفته أبدآ

طلعت زى ما بتقولى كرنه ، كرنه بحالى .

أم رتيه — حقيقى . . حقيقى كرنه ؟

أم سيد — ياخى اصبرى ، مالك مسر وعه كده .

أم رتيبه — وبعدين ياخالتي أم سيد لما قال لك إنه لقي
نص اللفته . . قصدى نص الكرنه ؟

أم سيد — قلت يا بنى ، وهو نص اللفته برضه يوافق
نص الكرنه ؟

أم رتيبه — يوه يا حاجه ، مانوافقش ليه ، قادر ربك
يجمعهم سوا فى برميل واحد .

أم سيد — ماهو برضه قال لى كده .

أم رتيبه — من فهمه وتقديره ، وبعدين ياخالتي أم سيد
قال إيه ؟ ما طلبش نص الكرنه ؟

أم سيد — طلبها ياختى ، وقاللى يا ام أنا خايف أحسن
ما ترضاش بى ، قلت له ازاي يا بنى يا سيد ، دا انت أدها
وأدود ، قال لى طيب روحى جسى النبض ، لقيت الحكايه
مش عايزه بد ، أخذت بعضى وتنى جايا لك ، إيه رأيك
ياختى ؟

أم رتيبه — رأيى ؟ آل رأيى آل ، ياسلام ياست ام
سيد دا انت خليتى جتتى تنمّل ، دا انا طول عمرى أحب
اللفت ، أموت فى اللفت ومية اللفت .

أم سيد — أصيله والنبي ، أصيله ياست ام رتيبه . .
أنا برضه كنت عارفه إن أملى مش حا يخيب فىكى أبدا .

زينهم [يدخل وفي يده مقشه] - اسمعى يابت ياسنيه .
أنا على الكنس واتتى عليكى المسح .

سنيه [وفي يدها جردل المسح] - لأ كل واحد منا عليه
أوده كنس ومسح ، إنت أصلك ضلالى ما عندكش ذمه . .
ما بتقرطش على المقشه ، وتسبب كل التراب ، ولا بتمدش
إيدك تحت الكنبه ، وادوخ أنا بعدك فى المسح .

زينهم - يا سنيه ياختى ما تبقيش منا كفه ، انا حاقش
لك كويس خالص ، وأمد إيدى زى ماتتى عايزه ، أمد
إيدى تحت الكنبه ، وتحت الملايه ، وتحت القميص ، بس
ما تبقيش تقولى شيل إيدك .

سنيه - شاهده ياستى على قلة الأدب ؟

أم رتبيه - إخرس ياواد يازينهم ، واختشى على دمك
وخلى عندك تريه .

زينهم - خرس ، هوّه انا ما أعرفش أتكلم كله
فى البيت ده ؟

أم رتبيه - كلبتك اجنابك [لام سيد] خطوه عزيزه
ياست ام سيد . . داحنا زارنا النبي . . دا يوم المنا ،
دا يوم الهنا .

أم سيد - خلاص ياستى ام رتبيه ، موافقه .

أم رتيبه — موافقه وبس ، وهو انا ألاق أحسن من
سيد افندی .

أم سيد — استينا ؟

أم رتيبه — استينا .

أم سيد — طيب واخليه يجي يقابل سي عبد الصبور
إمتي ؟

أم رتيبه [في نزع] — عبد الصبور ! . يا مصيبي ،
يا وقتي ، يا خيتي ، يا نيتي .

أم سيد — ليه ياختي كفا الله الشر ؟

أم رتيبه — يافرحه ماتمت خدها الغراب وطار .

أم سيد — يوه ياندامه .. حصل إيه ياختي ماتوجعش
بطني ؟ ..

أم رتيبه — عبد الصبور .. مفرق الأحباب ، وهادم
اللذات . يا خيبة أملك يا ام رتيبه . ياميلة بختك يا ام رتيبه .

أم سيد — هو إيه أصله ياختي ده ، ما تقوليلي إيه
الحكاية وقّعت قلبي ؟

أم رتيبه — مافيش فايده يا ام سيد .. ما دام حايدخل
فيها سي عبد الصبور باظت وانفر كشت ، أنا كنت ناسياه

خالص .. کان رایح عن بالی .. الفرحة نستنی إن فیہ شیء
إسمه عبد الصبور ، وشه یقطع الخیره م البیت .

أم سید — یاختی لیه بس ، داسی عبد الصبور باین
علیه عاقل وابن حلال .

أم رتیه — عاقل فی کل حاجه .. ماعدا الحکایه دی .
مفیش فایده .. أنا عارفه مافیش فایده .

أم سید — طب بس فهمینی لیه ؟

أم رتیه — أهو کده ، خلقته کده .. طبعه کده ..
شغلته إنه یضع منی العرسان . الی خلاه رفض العشرین
عریس الی فاتوا .. یعنی حایستعصی علیه سی سید .

أم سید — یاختی قادر وکریم .. مین یعرف . یمکن
ربنا یدی سره و یعقله ، وینخلیه یوافق .. هوّا فیہ حاجه
بعیده علی ربنا ؟

أم رتیه — مش بعیده علی ربنا ، لکن بعیده علیّ
أنا حاسه و عارفه .

أم سید — طیب خلیها علی الله یاختی ، اسکتی انت
وربنا حاجیها سلیمه ، إن شاء الله المره دی حاصیب ..
أنا قلبی حاسس کده .

أم رتيبه — يسمع منك ربنا ، ولو إني عارفه إنه
مايرضاش يسمع الحكاية دى أبدأ .

أم سيد — ماتقوليش كده يا أم رتيبه . . أستغفر الله
العظيم من كل ذنب عظيم . . بكرة كل حاجه تتصلح .. أخلى
سيد يبجى يزوره إمتى ؟

أم رتيبه — ياما أنا خايفه م الزياره دى .

أم سيد — ياختى جمدى قلبك ، ماتخافيش ، كل حاجه
حاتبجى سليمه ، هو سيد فيه حاجه تتعاب .. دا على الفرازه ،
أدب وأخلاق ، وكال وذوق ، هوأ فيه أحسن من كده ؟
أم رتيبه — ما هم اللى فاتوا كلهم كانوا كويسين ، لكن
كان بيطلع فيهم القطط الفطسه .

أم سيد — لا . بس اطمنى ، دا مش حايلاقى فيه
عيب أبدأ ، إن شاء الله ربنا حيتمم بخير .

أم رتيبه — من بقك لباب السما ، ربنا يهديه ويكمل
سيد أفندى فى عينه ، بس على فكره ياست أم سيد لازم
نعمل استحرصنا على كل حاجه ، عشان المقابله تتم على
خير ، وعشان مايحصلش حاجه تعكر مزاج مى عبدالصبور
ويخسر لنا الشغلانه .

أم سيد — إلی انت عایزاه منا یاست ام رتیبه نعمله .
بس امری .

أم رتیبه — أول كل حاجه ، إسم سى سيد افندى
الكامل إيه .. لحسن یكون فيه حاجه كده والا كده ، أصله
یہتم بالاسم أوى .

أم سيد — اسمه السيد افندى بنجر .
زینهم [ضاحكاً] — بنجر .. ها ، أو .
أم رتیبه [بیأس] — بنجر ؟ یادی المصیبه الحمرأ .
أم سيد — ماله بنجر .. وحش ؟

ام رتیبه — لأ حلو .
زینهم [مصفقاً یدیه مفازلا سنیه] — حلو . یا حلو .
مش حاتتجوزینى بقى یابت یاسنیه ، أموت ولارحش التمن .
سنیه — یاخویه إلهى تموت وتروح التمن ، یا بجمح
یا ضلالی ، أنا أتجوزك انت .. خلاص الدنيا خلصت من
الرجاله لما أتجوزك انت .

أم رتیبه [تضرب كف على كف] — حلو ، حلو أوى ..
یا خسارة الجوازه ، یامیلة بختك یا أم رتیبه .
أم سيد — یاختی .. هو إیه أصله ده .. میلة بختك لیه
بس .. هو إسم بنجر عیب ؟

أم رتيبه — اللى مارضى بالعقر يرضى بالبنجر .
أم سيد — ياستى هوّه ماله ومال الإسم .. هوّه الاسم
يبعض .. كل واحد حر فى اسمه ، بنجر ، خيار ، جزر .
أم رتيبه — ما فيش فايده ياست أم سيد . مش ممكن
مش ممكن .

أم سيد — وعلى العموم الاسم ده فى إيدينا .. ده
حاجه سهل .. من بكره يروح المحكمه الشرعيه يغيره .
أم رتيبه — حقيقى ياست أم سيد ؟ ممكن يغير اسمه ؟
أم سيد — مش ممكن ليه ؟ ممكن قوى .. هوا يعنى كان لرق .
أم رتيبه — ما لرقش ولا حاجه . بس هوا يعنى
حايرضى يغير اسمه ؟

أم سيد — يرضى قوى .. عشان خاطر عيونك . من
بكره يروح يغيره ، وبعد بكره يكون هنا من غيره ..
مبسوطه ياستى .

أم رتيبه — كتر خيرك ياست أم سيد . ماعد مكيش أبدا .
أم سيد — خلاص .. اتفقنا . بعد بكره أقول له ييجى
يقابل سى عبد الصبور ؟

أم رتيبه — خلاص أوى . بس قولى له . يستحمله
ولا يزعلش منه . يعنى إن قال له كلبه كده والا كده

ما ياخذش على خاطره . قولى له ياخده على أد عقله .
حاکم هوّ الیومین دول . عقله یعلم به ربنا .

[یسمع طرق علی الباب بمعا] .

أم رتیه [مرتبه] — یوه . دی دفته . یاتری إیه إلی
جابه بدری کده ؟

[یطرق الباب ثانیة]

أم رتیه — طیب . طیب . افتحی یابت یاسنیه . تعالی
بنا یاست أم سید نخش فی أودة الضیوف .

أم سید — لا یاختی أنا حاقوم بقی عشان أشوف ورايه
إیه . وأسیک یمکن یکون سی عبد الصبور عایز حاجه .
[تفتح سنیه الباب ، ویدخل عبد الصبور . . أم سید تغطي
وجها بالملائة]

عبد الصبور — إیه ده . هوّ انتو نایمین نومة أهل
الکھف . ساعه وأنا عمّال أخبط ما حدش راضی یفتح ..
انظر شتم .

أم رتیه [مشیه إلی أم سید] -- خالتی أم سید جارتنا
یاسی عبد الصبور .

عبد الصبور — طیب . طیب . مش وقته دلوقت .
قوموا یاللا من هنا . اخلولنا الصاله بسرعه . . عشان

خاطر عندنا جلسه مستعجله . عندنا حاجه خطيره عايزين
نشوفها .. ياللا اتفضلوا .

أم رتيه — يوه .. هو انت دايماً كل حاجتك
مستعجله ، جلسة إيه اللي حاتعملها هنا؟
عبد الصبور — جلسة أرواح ، يعني حاتكون جلسة
إيه ، جلسة مجلس وزراء .

أم سيد [تلتف في ملامتها وتمض] — طيب ياست أم
رتيه أستاذن انا .. خليك بعافيه .. إن شاء الله بعد
بكره زى ما اتفقنا؟

أم رتيه — إن شاء الله ، بس ماتنسش اللي قلت لك
عليه ، إوعى يجى بيه ؟

أم سيد — ماتخافيش ياختي ، اطمنى . حطى في بطنك
بطيخه صيفى ، أنا أخليه يغيره ويغير أبوه ، ما يكونش
عندك فكر أبدأ .

[تنصرف أم سيد ، وتودعها أم رتيه حتى باب البيت]

المشهد السادس



[عبد الصبور — أم رتيبه — سنيه — زينهم]

عبد الصبور [صائعا] — زينهم، يا حلوف، يا بجم،
يالوح... إنت فين؟

زينهم [من داخل المطبخ] — يا ستار يارب... أدحنا
جينا للشخط والنظر، [بنتم طويل] حاضر.

عبد الصبور [مستراً في نوره لسنيه وأم رتيبه] — واتم
واقفين كده ليه؟ يا الله اتلححو شويه ما فيش وقت. الجلسه
حانتعقد الساعة ١٢، والساعة دلوقت اتناشر لإربع، عايز
الصاله تكون جاهزه حالا [مشيراً الى أكوام عروق الملوخيه
وقصر التوم والبطاطا] باللاشيوا البلاوى المتلتله على دماغكم دى.
عروق ملوخيه وفصوص توم، إيه الحاجات الأرضيه دى...
عروق ملوخيه وتوم وبطاطا... إحنا رايمين نحضر أرواح، أرواح
سماويه، أثريه، إتناوا عايزين الأرواح تنزل بين الملوخيه

والبطاطا والتوم ، دى تبق فضيحه فى عالم الأرواح ، دى تبق
نكبه ، دى تبق كارته .

أم رتيه — ليه يا خويا بس ، نكبه وكارته على إيه ،
يمكن أرواح تحب البطاطا .

عبد الصبور — أرواح تحب البطاطا؟ إنتى يا وليه
مجنونه؟ بتخرفى؟ أنا طول عمرى أقول إن عقلك على
قدك ، أرواح تحب البطاطا؟

أم رتيه — ليه؟ عيب؟ قباحه؟ مالها البطاطه؟ . دى
حتى بطاطه حمرا من بطاطه سيدى جابر زى الشهد .

عبد الصبور — بطاطا ، بطاطا . . إنتى يا وليه جنسك
ليه . . أرواح تحب البطاطا؟

أم رتيه — لا . . تحب الألامزيه ، يعنى هو انت
ضامن إن الأرواح اللى حاتنزل أرواح من جاردن ستى
والا من الزمالك ، يمكن برضه تكون زى حالتنا كده
من حوش آدم .

عبد الصبور — أرواح إيه يا شيخه اللى حاتنزل من
جاردن ستى ، والا من حوش آدم ، دى نازله من طبقات
الآثير ، من العالم الآخر المجهول ، أرواح يا وليه ، أرواح



[أم رتييه — عبد الصبور]

أم رتييه — أرواح والا بستليه ، أنا مالي .. تنزل من
مطرح ما تنزل .

عبد الصبور — تنزل من السما ، لا تاكل بطاطا ،
ولا المازيه ، دي أرواح ، عارفه يعني إيه أرواح ؟ يعني
مثلا لما تطلع روحك ..

أم رتييه — [مقاطعه] برّه وبعيد ، تف من بقك سبع
تفّات ، إيه الكلام دا اللي بتقوله اللي زي السم .
عبد الصبور — ياستى بقول مثلا ، مثلا ، وعلى كل

حال إنتي زعلانه ليه ، ماهي مسيرها تطلع ، وتنطلق حره في
 طبقات الأثير ، وربنا يتوب عليها من السجن اللي هيه فيه .
 أم رتيبه — سجن ؟ فين ياخويا السجن دا اللي هيه فيه؟
 عبد الصبور [يشير الى جسدها] — ده .. ده .. السجن
 السفلى ، الدينوى ، الجته اللي زى جته الحنازير ، اللي زى
 كيس الغسيل .. بكره تفارقه وتنطلق منه .. وتمشى في
 السموات السبع حره . تطير زى الفراشه ، تصورى إنك تبقى
 ظايره زى الفراشه .. خفيفه لطيفه ، بترفر في باجنحتك ،
 مش أحسن من البرميل اللي انت محشوره فيه .. مش أحسن
 من القدره اللي عمّاله تدبّي فيها أكل . بطاطا ، وتوم ..
 وملوخيه ، ومفتقه ، وتكلفتها في خرق وهلاهيل ، إيشي
 قميص وإيشي لباس وإيشي شراب ، والنهارده بردت
 وبكره سخنت ، ومره طلع لها خراج ، ومره وقعت
 انكسر لها إيد والارجل .. مش هي دي الجته اللي اتى
 مسجونه فيها ، واللى مورياك الويل والعذاب . مش أحسن لك
 تفارقها .. مش أحسن إن روحك تطلع منها ؟
 أم رتيبه — روحك انت اللي تطلع .. أنا عاجباني جتتي .
 إذا كان مش عاجباك جتتك الناشفه المقدده .. اطلع انت
 منها . أهو باب السما واسع ، آل جتتي آل .. مالها جتتي ؟

عوجه . . عارجه . . خمسة وخميسه ، وحصوه في عين اللي
مايصلي على النبي .

عبد الصبور — لسه بدرى عليكى عشان تفهمي . .
لسه قدامك كثير . كثير خالص ، ومين يعرف يمكن
ماتفهميش أبدأ . اللي زيك انتي مش ممكن يفهم ، ومش
ضروري يفهم ، وعلى كل حال ده مش وقته ، ياللا ياللا ،
شيلوا البلاوى دى . الناس زمانهم جاين . . وله يازينهم
الكلب يابوز الإخص ، انت مش عايز تيجي والا إيه ؟
زينهم — ماتصبر على شويه ، والا أجيلك كده
زى مانا .

عبد الصبور — تعال بسرعه ، إحنا مستعجلين .
[زينهم يدخل متردداً ، فلا يكاد عبد الصبور يرى وجهه حتي يفرغ
ويصيح به وهو يصرخ عليه] .

عبد الصبور — إرجع . إرجع تاني . إرجع بقول لك ،
مقدرش أبص في وشك ، شكلك يبيلبشني . وشك نحس .
عينيك كلها سفاله . . نظراتك كلها مكر ولؤوم . . إرجع .
إرجع أحسن لك . . أنا قلت لك ميت مره ماتخشش علي
بوشك مكشوف ، غظيه بسرعه . ياساتر . يامغيث .
زينهم [يتراجع] — ماقلت كده ، ما عجبكشى .

أم رتيبه — مالوا ياخويه وشه؟ مش خلقة ربنا؟ مش
زي وش البني آدمين اللي في الشارع.؟ حقه بطلوا ده
واسمعوا ده.. آهو ده اسمه كهن.. اسمه بدع.
عبد الصبور — خبوه . خبوه بسرعه . أنا قلت له
مايطلعيلش بوشه مكشوف أبدأ .

زينهم [من المطبخ] — فين يابت يا سنيه الوش؟ . الله
يخرب بيتك .

سنيه [تخرج من احدى الحجرات] — بلاش زعيق كده .
دور عليه عندك في صفيحة الزباله [عبد الصبور] الطرطور
والعبايه وعلبة النشوق والمنشه جاهزين على الكنبه .
أحضر لك الطشت؟

عبد الصبور — لأ مش دلوقت ، أنا مش حاقلع
دلوقت ، لسه ورايه جلسه ، وجاي لى ضيوف .

[زينهم يدخل وقد ارتدي وجهاً من الوجوه الورق المضحكة] .
أم رتيبه — كده يعجبك ياسى عبد الصبور؟ كده حلو؟
دلوقت ماييلبكش ولا حاجه ، راحت السفاله والחסاسه؟
عبد الصبور — أيوه كده ، كده أحسن كثير ، كده
كويس خالص .

[تخرج سنيه من احدى الحجرات وتأخذ في لم عروق الملوخيه]

أم رتيبه - حكمته !! [تدخل في إحدى الحجرات] .
عبد الصبور - يا الله يازينهم جهز الترايزه للشغل ،
شيل المفرش وامسحها كويس ، وجهز الكبايه ، وورص
الكراسي ، إنت عارف التوضيب كله ؟

زينهم - عارفه ، عارفه ، إوعوا بقى وسعوا لنا عشان
نشوف شغلنا ، إوعى كده يابت ياسنيه . . وإبعدي
صدرك من سكتي لحسن زاحم الدنيا [بأخذني تجهز للنضدة
ورص الكراسي حولها] .

سنيه [وهي تجمع في عروق اللوخيه والبطاطا] - سامع
ياسيدي يقول إيه ؟

عبد الصبور - أنا مش قلت لك ياواد يازينهم اقصر
لسانك الزفر عنها ، يعني أعمل إيه فيك أكثر ما انا ملبسك
وش ، ألبسك كامه ؟ أربط لسانك ؟ مش حرمتك ميت
مره شغل البصبصه ، وزوغان العين .

زينهم - وانا اعمل لها إيه . . إذا كانت زاحمه الطريق
بصدرها ، مش تلبه شويه ، بص له كده واحكم شوف مين
فينا الغلطان ؟

عبد الصبور [يلتفت الي سنيه] - أيوه حقيقي ، لك حق ،

لَمَّى صدرك يابت واحتشمى جاكى خابط في نافوخك ،
أنامش قلت لك ميت مرّه بطلى المسخره دى وقلة الحيا ؟
سنيه — يوه يا سيدى .. وانا اععمل ايه ما هوته اللى
طالع كده خلقه ربنا .

عبد الصبور — أيوه حقيقى .. خلقه ربنا ، معذوره ،
حانعملى ايه .. الله يكون فى عونك ، ربنا ياخذ بصدرك ..
ياللا ياواد يازينهم اشهل شويه ، الكبايه فين بتاعة كل مره ؟
[سنه تنهى من جمع عروق الملوخيه وقشر التوم وزينهم بنتهى من تجهيز
المضدة واحضار الكوب الفارغة]

عبد الصبور — أول مايجوا الضيوف تعملى قهوه
ياسنيه وتدخليها ، وبعدين مش عايز اشوف خلقه حد منكم
أبدأ .. سامعه ؟ . قولى لستك كده ، وانت ياواد يازينهم
تقف على باب المطبخ لحسن يمكن نعوز حاجه .. وتلم
لسانك .. ولاتتداخلش فى اللى مالكشى فيه ، واوعى
تقلع الوش .

زينهم — علم ياسى عبد الصبور علم ، حافظ كل حاجه .
[يسمع صوت أقدام تقترب من باب الشقه ثم صوت طرق على الباب]
عبد الصبور — بس .. بس .. ياللا يابت ياسنيه شلى
اللى فى إيدك ده واطلعي بره [يتجه الى الباب ويفتحه] .
[يدخل الشيخ جاد الله ، والأستاذ زكي حنجل ، والأستاذ محبوب
الور الذي يرتدي بدلة سوداء وكرافته سوداء] .

المشهد السابع



[عبد الصبور — جاد — زكي — محبوب]

عبد الصبور — أهلاً وسهلاً .. [ينظر الى ساعته] الساعة
اتناشر وتلات دقائق ، يعني جيين متأخرين تلات دقائق ..
لكن معلش .. خشوا وخلص ، إبقوا خدوا بالكم من
المواعيد بعد كده .

الشيخ جاد [يخرج ساعة الجيب] — الساعة عندي اتناشر
بالضبط .

عبد الصبور — ساعتك مخزّفه .. لكن قلنا خلاص ..
إتناشر .. إتناشر إلاتلاته .. إتناشر وتلاته .. مش مهم ..
يالله خدوا مطار حكم على الترايزه لحسن ماعندناش وقت ،
عازين نخلص الجلسه .. وننتهى بسرعه .. أمال فين علوان
افندي ؟

زكي — اعتذر .. علشان راح ياخذ حقته .

عبد الصبور — حقنة إيه؟

محبوب — حقنة كلب .

عبد الصبور — ليه؟

محبوب — حماه عضته .

الشيخ جاد — مسكين .. أنا طول عمرى أقول له على

الويله دى إنها سمرانه ، مكانش مصدقنى .. يستاهل .

عبد الصبور — يا اللالا يا جماعه بق ااعدوا كل واحد

ياخذ مطرحة .. زينهم .. زينهم .. هات ورقة التحضير

من على المكتب .

[يدخل زينهم من المطبخ الى احدي الحجرات .. ويدهش الجميع

من منظره ، ولكن عبد الصبور يهدثهم قائلاً]

عبد الصبور — إسمعوا كلامى .. كده أحلى كثير .

[زكى يضع طربوشه على الشماغه ويضع محبوب طربوشه بجواره .

زكى — إبعد طربوشك لحسن يتلخبط مع طربوشى .

محبوب — أى والله أنا حاسس برضك إنهم حايتلخبطوا

سوى وما حدش فينا حايعرف طربوشه إنهو .

زكى — أقول لك [يأخذ طربوش محبوب ويجذب زره فيقطعه

ثم برده له قائلاً فارتياح] دلوقت نعرف نميزهم كويس ..

طربوشك اللى من غير زر .

[زينهم بدخل ويقف لمشاهدتهم]

محبوب [بنفعل ثم يجذب زر طربوش زكي فيخلمه] — نبقى خالصين .

زكي [متأسفا] — كويس كده ؟ . أم حايته لخبطوا تاني
[بهم بأن يأخذ طربوش محبوب لينزع خوصته ولكن زينهم يتداخل
في الأمر] .

زينهم — ليه ؟ وعلى إيه ؟ . انتوا حانعملوا زي الاتنين
البرابره اللي اشتري كل واحد منهم معزه وخافوا لا المعزتين
يتلخبطوا مع بعض .

محبوب — وعملوا إيه ؟

زينهم — ولا حاجه . . عثمان بص لمحمدين ، قال له
يا مهمدين . . المئزه بتأقي ها تتلبيط ما المئزه بتامك . . إيه
الأمل . محمدين بص لعثمان ، وقال له دي بسيطه هالص
يا أتمان . نقطع ودن واهد منهم . تبقى اللي بودن بتأقي
واللي بتنين بتأتك ، عثمان بص لمحمدين وهز راسه بانبساط
وقال له ياسلام أليك يا مهمدين وألى أفكارك النيره دي
هاجته تمام هالص ، وعنها وراحوا قاطعين ودن معزه من
المعزتين . . كان فيه واحد ابن حلال واقف بيتفرج عليهم
حب يلخبطهم راح مسهيمهم وقاطع ودن التانيه جم كل واحد

ياخذ معزته لقوهم الاتنين بودن واحده ، بصوا البعض
كده وهزوا دماغهم بزعل ومصمصوا شفائفهم وعثمان قال
لمحمدين ، وبأدين إيه الأمل . . المثيز اتلخبطوا تاني ؟
محمدين قال له . . يا سلام يا أتمان ، ودا هاجه تزال ،
نقطع رجل واحد واللى بتلاته يبقى بتأنى واللى بأربعه يبقى
بتأتك ، بص عثمان لمحمدين وهز راسه بمنتهى الإعجاب
وقال له يا سلام يا مهمدين . أما أليك هته دين مخ ، وعنها
وراحوا قاطعين رجل معزه من المعزتين ، ابن الحلال
كان واخذ باله برضه خلاهم يتلفتوا كده وراح قاطع
رجل التانيه ، وبعدين جه كل واحد ياخذ معزته اتلخبطوا
تاني . عثمان قال لمحمدين ، وبأدين بأه يامهمدين دى حاجه
تلهبط هالاص . محمدين قال له ولا يكون أنك فكر ،
وعنها وراح خازق عين واحده ، ابن الحلال سهام تاني
وخرق عين التانيه . فضلوا على كده محمدين يقطع رجل
وابن الحلال يقطع رجل ، لغاية ما المعزتين صفصفوا
خلاص ، ما بقاش فيهم حاجه أبدأ ، والآخر قعد محمدين
على الدكه وهز رأسه بزعل كده وقال لعثمان ، أقول لكش
يا أتمان . عثمان قال له إيه ؟ محمدين قال له أهسن طريقه
أشان آدم اللهبطه . إنت تاهد البيضة وأنا آهد
السوده .

الشيخ جاد [مقهها] — يا سلام على الذكاء .. وعلى المخ
النضيف .

زكى — طب ودلوقت حاتعمل إيه فى الطرايش ؟
زينهم [يمك أحد الطرايش ويقذف به من الشباك] —
حاجه بسيطه قوى ، دلوقت مافضلش غير طربوش واحد ،
أظن مش ممكن يتلخبط .

عبد الصبور [هائجاً تائراً] — إيه دا يا حلوف يا ابن
الحرام .

زينهم — أعمل لهم إيه ماهى أصلها حاجه تلخبط خالص .
زكى [يأخذ الطربوش ويلبسه غير أنه يسقط على أذنيه] —
ده مش طربوشى .

زينهم — خلاص .. يبقى طربوشك اللى تحت .
[يجلس الأربعة حول المائدة]

عبد الصبور — أظن دى أول جلسة أرواح تحضرها

ياشيخ جاد ؟

الشيخ جاد — تقريباً .

عبد الصبور — يعنى إيه تقريباً ؟

الشيخ جاد — سبق قبل كده أن أنا رحمت مع أمى الله
يرحمها عند الشيخ الكومى فى سيدنا الحسين .. أصل الأسياذ
كانت تعبها ، وكان واحد منهم متسلط عليها اسمه الويشى

وبعدين الشيخ الكومى طلعه وطلع على جتته البلا الأزرق
بعد ماجتئاله راس هدهد وفرخه باربع أجنحه ، ومره تانيه
حضرت معاها الزار عند سيده الكوديه ، واللى كان عليها
برضه هوّه الويشى نفسه .

عبد الصبور — زار إيه ، وكودية إيه ، وويشى إيه ،
دا اللى كان على امك .. دا شغل دجل ، شعوده ، نصب
واحتيال ، يضحكوا ييه على المهافيف والمخايل ، احنا هنا
مش بندجل ، ومش بنعمل شغل مسخره من اللى كان بيعمله
الشيخ الكومى اللى بتقول عليه ، إحنا هنا مش حانجيب
العفريت اللى كان على امك الله يرحمها .. إحنا حانجيب أمك
نفسها . فاعم والالآ ؟

الشيخ جاد — أمى !! أمى نفسها !! أمى أنا ؟ يا شيخ
قول كلام غير ده ؟

عبد الصبور — أمال احنا جاين هنا ليه ، يا بجم ، دى
جلسة تحضير أرواح ، يعنى حاتنزل الأرواح من السما
السابعة ، هنا عندنا ، نتكلمها وتكلمنا ، أى روح عايزين
نجيها نقدر نجيها ، ومن ضمنها روح المرحومه أمك ،
والا يعنى فاكر انها جعيصه ؟

الشيخ جاد — ولا جعيصه ولا حاجه .. بس هيته

كانت دائماً دماغها ناشفه ، الله يرحمها كانت عنيده خالص
يمكن تعصلج معاكم شويه .

عبد الصبور — مافيش حاجه هنا اسمه عنيد ولا دماغه
ناشفه ، إحنا حانجيهها ونجيب أبوها كان ، أنا دلوقت حالا
أجيبها لك يا شيخ جاد .

الشيخ جاد — حالا !! حالا ؟! من غير راس هدهد
ولا ديك برجل واحده؟

عبد الصبور — دا كلام فارغ ، دا نصب يا شيخ جاد ،
دا احتيال ، قلت ميت مره ، إحنا هنا حانز لها بمنتهى
البساطه أنت شايف الكبايه اللي قدامك دي ؟

الشيخ جاد — طبعاً شايفها ، بس يعني بقول
زينهم [مقاطعاً] — ليه . . هيه المرحومه كانت حبايه

في كبايه تطلع وردايه والا إيه ؟

عبد الصبور — اسكت انت يا زينهم الكلب .

زينهم — طب عن إذتك . . أقلع الوش بقى لحسن
حافظس ؟

عبد الصبور — إوعى ، إوعى . إياك .

زينهم — هو إيه أصله ده ! عاوز أشم نفسى شويه يا عالم !

عبد الصبور [في غضب] — روح جوا المطبخ شم نفسك

شويه وتعالى ، [الى الشيخ جاد] خد بالك بقى باشيخ جاد .
شايف الكبايه دى ؟

الشيخ جاد - شايفها .

عبد الصبور - أهو دلوقت حانخطها فى وسط الترايزه
ونخط تحتها الورقة المدورة دى اللى مكتوب عليها الحروف
الهجائية كلها والأرقام من ١ إلى ١٠ ومكتوب عليها لا ونعم
ولا أجيب ، من باب مساعدة الأرواح .. فاهم ؟

الشيخ جاد - ولا أنا فاهم حاجه .

عبد الصبور - لك حق .. فهمك على قدك .. زى
اسم الله عليها اختى أم رتيه .

الشيخ جاد - يا أخى أنا مش فاهم إيه دخل الأرواح
بالكبايه ، وإيه دخل الكبايه بالحروف الهجائية والأرقام ،
وإيه دخل لا ونعم ولا أجيب ، فى مساعدة الأرواح ..
فهمنى . اشرح لى .

عبد الصبور - حاشرح لك وأفهمك كل حاجه ، بس
إدبنى عقلك الوسخ شويه ، حاول إنك تفهم .. دلوقت تلاته
مناحايخطوا صوابعهم السبابه على حرف قاع الكبايه وهى
مقلوبه ، يعنى كده ، بشويش خالص ، مجرد لمس .

الشيخ جاد - وبعدين ؟

زكى - ولا قبلين .. الكبايه حاتحرك ، يمين وشمال ،
وتنقل من الحرف ده إلى الحرف ده ، وتحدد لنا الكلمات

الى حاجاب بها على الأسئلة بتاعتنا ، فاهم ؟

الشيخ جاد - ولا انا فاهم حاجه .

عبد الصبور - بعد دا كله مانتش فاهم ؟

الشيخ جاد - حهلك شويه يا سى عبد الصبور ، مالى
أنا ومال الكبايه لما تتحرك يمين وشمال ، وإيه دخل الكبايه
عشان تجاوب لنا على أسئلتنا ، وأنا ليه حاسأل الكبايه ،
بس فهمونى يا اخوانا ، إيه حكاية الكبايه ؟

محبوب - ماهى الروح هى اللى حاتحرك الكبايه .

الشيخ جاد - يعنى الروح جوا الكبايه ، أمى أنا ؟

الست صالحه ؟ حاتخش جوا الكبايه [يضحك بشدة] أمى

أنا جوه هنا . . [مشيراً الى الكوب ، ومستمرأ فى الضحك]

وبرضك تقول لى فاهم والا لا ، طبعاً مش فاهم .

زكى - ليه يا شيخ جاد ، الله لايسيتك ، مانتش فاهم ليه ؟

الشيخ جاد - أمى أنا جوا الكبايه ؟ [يضحك بشدة] .

عبد الصبور - أيوه أملك جوا الكبايه ، فيها إيه .

كثيره . معضله .

الشيخ جاد [مستمرأ فى الضحك] - أصلك لو كنت شفت

أمى ما كنتش قلت كده ، دى مرّه حيننا ندخلها فى أوده
ماعرفناش ، انحشرت بين الأربيع حيطان ، تقوم بسلامتك
عايز تدخلها فى كبايه [مستعراً فى الضحك] .

عبد الصبور — شيخ جاد ، يا شيخ حلوف ، يا شيخ
قرد ، يا عرة المشايخ .. أمك الله يرحمها ، حاتنزل بروحها
مش بجسمها ، حاتنزل كده زى الفراشه ، تشف وترف ،
مش حاتنزل بالبراشوت زى صناديق الذخيره والتموين ،
أمك اللى كانت بتتحشر فى أوده ، بقت دلوقت زى النسيمه
الظايره . أمك اللى كانت ما تنفدش من الباب ، بقت تنفد
من الحيطه ، تنفد من السقف . أمك اللى كانت فى العش ..
طارت .. فاهم ؟

الشيخ جاد — ولا أنا فاهم حاجه .

عبد الصبور — عنك ما فهمت ، أمك حاتجيك دلوقت
وخلص .

محبوب — سيك منه بقى يا أستاذ عبد الصبور ..
بلاش تضيع وقت ، ياللا بينا نبتدى .

عبد الصبور — أهم حاجه عايز سكون تام .. لا كله
ولا حرکه .. عايز نفوسكم تصفو وتفكيركم يسمو ، عايز
بعد عن الماديات ، وارتفاع إلى السماويات والروحانيات ،

كلنا نركز أذهاننا في الأرواح التي حانستدعيها . في الأشياء
السامية الصافية الأثيرية غير المنظورة . اتتو التلاته كل واحد
يمد السبابه بتاعه ويحطه على طرف الكبايه . . أيوه كده ،
لمس . . مد صباعك يا شيخ جاد ماتخافش . . الكبايه مش
حاتلسعك . سكون عميق . مالك بتترعش كده ليه يا شيخ جاد ؟
الله يخرب بيتك ؟

الشيخ جاد [مرتمشا] — هيه نزلت ؟

عبد الصبور — إيه هي اللي نزلت ؟

الشيخ جاد — روح امي ؟

عبد الصبور — روح امك لانزلت ولا طلعت ، لسه

مافيش حاجه لغاية دلوقت ، مافيش داعي للرعشه دي ،

والخوف ده ، انت إيه ؟ جنسك إيه ؟

زكي — شد حيلك يا شيخ جاد ، شد . . دا حتى عيب

عليك ، إنت عمرك ما قابلتش روح ؟

الشيخ جاد — أبدأ . . أبدأ .

محبوب — أديك حاتقابل .

الشيخ جاد — ما هو ذا اللي مخوفني ، أنا طول عمري

أخاف م الضله والعقاريت .

عبد الصبور — إنت مهفوف ، لسه برضه بتجيب سيرة

العفاريت ، إحنا هنا مش حانطلع عفاريت ، مش حانحضر
جن ، حانستدعى أرواح ، أرواح ، يعنى لو كنت بسلامتك
مت ، كنا جنبناك ، بغياوتك وسخافتك كده زى ما انت ..
الشيخ جاد — طيب .. طيب .. ماتزعلش كده ..
أدى صباعى أهه .

عبد الصبور — بشوئيش . ماتحطش صباeck أوى كده
دا مش طبق على لوز ، دى روح ، خلى إيدك خفيفه . لمس
يدوبك لمس . مفهوم ؟

الشيخ جاد — مفهوم .

عبد الصبور — أيوه كده . دلوقت . كل واحد يسبل
عنيه . وياخذ شوية شهيق طويل . وبعدين زفير .
أطرد معاه كل الأرضيات اللى فى نفسك والشوائب
والرواسب المادية اللى فى ذهنك . عايز صفاء وسمو . مفهوم
ياشيخ جاد ؟ ماتفكرش فى حاجه غير الأرواح والساويات .
الشيخ جاد — والترب والقرافات والأموات . فاهم .
فاهم .. أنا الدمعه قربت تفر من عيني .

عبد الصبور — دا اللى أنا عايزه . مش عايز ماديات
أبدأ . أبدأ . ودلوقت تحبوا نبتدى بمين ؟ انهى روح تحبوا
نستدعيها الأول ؟

زكى — نبتدى بروح أم الشيخ جاد .
 عبد الصبور — فليكن . أمك اسمها إيه يا شيخ جاد ؟
 الشيخ جاد — صالحه . . وشهرتها أبو جليبو .
 عبد الصبور — صالحه وخلاص . مافيش داعى لاسم
 الشهره دلوقت . وخصوصاً انه أرضى خالص . واسم أبوها ؟
 الشيخ جاد — النمى . . المفش .
 عبد الصبور — كفايه النمى مافيش داعى للمفش دى .
 زمانه فش فى السما وشبع فششان . اسم أمها ؟
 الشيخ جاد — أنا فاكر ؛ إنت حانفتحلها محضر ؟ مادام
 ناوى تجيها ابقى اسألها هي .
 عبد الصبور — اسم امها يا شيخ جاد . . أنا مش
 بهزر معاك .

الشيخ جاد — والله ما اعرف . . أنا فاكر إن أبويا
 كان يقول لها أمك . . أم قويق . . يبقى لازم اسمها أم قويق ،
 وعلى كل حال لما تنزل تبقى تتأكد مادام داشى مهمك أوى .
 عبد الصبور — صالحه بنت النمى وأم قويق
 [ناظرأ الى السقف] يا ست صالحه ، أرجوك تتفضلى
 شويه .

الشيخ جاد [ناظراً الى السقف في ذعر] — هي حاتفضل
من السقف ؟

زكى [بزغده بكوعه] — اثبت ياشيخ حنش .. اثبت
ما تضحكشى علينا الأرواح .

الشيخ جاد — طيب بس فهموني يا ناس ، فهموني ،
حاتيجي منين ؟

محبوب — دلوقت تشوف ، حط صباeck واسكت ،
ودخل لسانك جواً بقلك .

عبد الصبور [مستمراً في النظر الى السقف] — يا ست
صالحه ، اتفضلي شويه من فضلك ، إبنك جاد عايزك .
الشيخ جاد — أيوه يا ام ، عايزك يا ام .

عبد الصبور [بزغده] — اسكت انت ، صوتك وحش
قوى ، يطفش الأرواح .

الشيخ جاد [هامساً] — أمال أعمل إيه ؟
عبد الصبور — حط صباeck على الكبايه واسكت ..
وفكر في امك ، تفكير سماوى نقى .

الشيخ جاد — إيه ياخويا اللخبطة دى ، إيه أصله ده ؟
محبوب -- لخبطة إيه ياشيخ قرد ؟
الشيخ جاد -- مانتاش سامع يقول لى إيه ؟

زكى - ماله؟ يقول لك إيه؟ يقول لك ففكر في املك
تفكير سماوى مرتفع .

الشيخ جاد - وهوّه دا معقول بس ياناس؟
عبد الصبور - مش معقول ليه يابلا .. مش معقول
ليه؟ .

الشيخ جاد - عشان التفكير السماوى المرتفع مش
ممكن يجتمع مع أمى فى مخ واحد .. لأنى لما بافكر فى أمى
بتصوّر ها قاعده قدام الماجور وبتطب فى العجين ، طب -
طب - أو ماسكه المنفضه وبتنفض فى الكليم ، طاخ طاخ ،
أو طابته فى زمارة رقبة أبويا ، وعلى دماغه ، دى ، دى ..
بالذمه يبقى ده فيه إيه من السماويه والارتفاع .

عبد الصبور - طب بس ، بس .. إيه الأصوات
المنكره دى .. دى أصوات تطفش سما بجالها .

الشيخ جاد - وأنا مالى ، ماهى دى الأصوات اللى كانت
بتعملها فى حياتها ، عايزنى افكرها ازاي أمال ، ماسكه كأنجه
وبتضرب تقاسيم حجاز ، تن ، تن .. ماسكه مروحه
وبتهوى بها بخفة ودلال ، هس ، هس .. عايزنى أتصورها
بترقص بصاجات ، تم ، تم .

عبد الصبور - ليه لآ؟

الشيخ جاد - لأ ، [تصورها انت ، أصلك ماتعرفهاش
أنا عارفها كويس ، دلوقت تنزل لك بالحنجل والمنجل . .
وتشوف ، وتقول ياريت اللي جرا ما كان .

زكى - وبعدين معاك يا شيخ جاد ، الوقت حا يروح
واحنا ماعملناش حاجه .. أرجوك تسكت ، اسكت خالص
وسيدنا على امك .. واحنا نجيبها لك من تحت طقاطيق السما ،
بس انسدا انت .

الشيخ جاد [يضع كفه على فمه] - هاب ، سكت أنا .
عبد الصبور [مستمراً في النظر الى السقف] - يا صالحه
يا بنت النمس وأم قويق ، أرجوك تتفضلي شويه .. كلمتين
ورد غطاهم [ينظر الى الكوب الذي لا يتحرك . ثم يستمر] -
يا لله بقى ياست صالحه إحنا مش فاضيين لك ، عندنا
شغل [يبدأ الكوب في فلقلة خفيفة] .

زكى - بس . بس . أهي جت .

عبد الصبور [هامساً لثلاثة] - سكون ، ولا حرکه ،
[ناظراً الى الكوب] أهلا وسهلا .. العواف ياست صالحه .

الشيخ جاد [مرتشاً] - هي نزلت . هي فين ؟ هي فين ؟
محبوب [يضربه بكوعه] - اثبت . اثبت يا شيخ جاد .
[الكوب يأخذ في الحركة يمينا وشمالا في اتجاه الحروف المختلفة]
عبد الصبور [يقرأ الحروف ويجمها ويقول بيظه] -

الله يعافى بدنك . . [مخاطباً الروح] حضر تلك الست صالحه
بنت النمس بنت أم قويق ؟

عبد الصبور [الكوب بتحرك وعبد الصبور بقرأ] لا . [عبد الصبور
لروح في دهشة] الله أمال أنت مين ؟ [قارئاً] أنا صالحه قاصين
[متحدثاً للجماعة] صالحه قاصين ؟ !! هي أمك اسمها صالحه
قاصين يا شيخ جاد ؟

الشيخ جاد [مرتجفاً] — أبدأ . . أبدأ ، ولا امي
ولا اعرفها .

عبد الصبور [لروح] — عدم المؤاخذه ياست صالحه ،
الظاهر إن فيه غلط حصل . . [قارئاً] يعني ما حدش عايزني
[لروح] مانستغناش ياست ، لكن إحنا في الحقيقه كنا عايزين
الست صالحه النمس أم الشيخ جاد ، عشان كان عايز يسألها
على كام سؤال . [قارئاً] تاني مره تبيق تاخذ بالك وتطلب
الروح كويس . . دى مسخره وقلة حيا . . [لروح] متأسفين
خالص . . عدم المؤاخذه . . [قارئاً] يعني أمشي ؟ [لروح]
اتفضلي من غير مطرود ، بس إذا كنت تسمحي ولو فيها
رذاله تبعتي لنا الست صالحه النمس [قارئاً] من عنيتي [لروح]
تسلم عنيكى [للشيخ جاد] راحت تجيبها .



الشيخ جاد — تفكر حاتلاقيها
يعنى ؟

عبد الصبور — ما تلاقياش
ليه ؟ . ضرورى تلاقيا .

الشيخ جاد — أصل الله يرحمها
[الشيخ جاد]

كان لها غطسات كده فى الغوريه ، وتحت الربيع وسيدى
أبو السعود . ما حدش يعرف يعتر لها على أثر ، ربنا
يسهل وتلاقيا .

[الكوب يأخذ فى الحركة] .

عبد الصبور — بس . بس . سكون [لروح] أهلا وسهلا
حضر تلك مين [قارئا] برضه صالحه قاصين [لروح] أمال ما بعيتش
الست صالحه النفس ليه ، ما لا قيتياش ؟ [قارئا] لا . . لقيتها
[لروح] أمال ما بعيتياش ليه ؟ [قارئا] ما قدرتشى تيجى [لروح]
ليه كفى الله الشر ؟ تعبانه والا حاجه ؟ [قارئا] لا إيدها مش
فاضيه [لروح] مشغوله يايه ؟ [قارئا] بزماره رقبه أبو جاد .
الشيخ جاد [مانحأجأة] — هى ما فيش غيرها ، هى بعينها .
فيش حد إيدته مشغوله برقبه أبو يا غيرها ، طول عمرها
طابقه فيها ، مش مخلياها تفلص ، هى بعينها . . إزيك يام ؟
عبد الصبور [ناثرا] — أسكت يا شيخ هباب ، انسد ،

لحسن تطفش الروح [لروح] لا مؤاخذة ياست صالحه . . ده
الشيخ جاد ، أصل عنده شوية خبل ، عقله على أده ، لسه
ما تعلمش الأدب والصلاح في حضرة الأرواح ، لا مؤاخذة
[الكوب بتحرك وعبد الصبور بهز رأسه آسفاً] . معاك حق ،
معاك حق ، هوا كده برضه زى ما بتقولى .

الشيخ جاد — بتقول إيه؟

عبد الصبور — بتقول إنك مدبّ ، وغبي ، وقليل
الأدب . زى أمك .

الشيخ جاد — غورى غارك حنش ، وليّه هزؤ
ما تختشيش ، أنا اللي مدبّ وغبي يا بوز الإخص يا وش
النحس . . ما سمعتكيش أمى كانت فصصتك وفرّجت
عليكى اللي ما يتفرّج . أم . أم .. عاجبك يا ام . الحقينى
يا ام . انزلى بسرعه يا ام . الوليّه بتشتمنى .

عبد الصبور — عيب يا شيخ جاد ما يصحش إ عقل . .
ما تفضحناش قدام الأرواح .

[الكوب بهز بشدة والترايزه تتأرجح وتمايل] .
عبد الصبور [مزعجاً] — يانهار اسود ، الظاهر إن
أمك نزلت لها زى القضا المستعجل ، تلاقهم دلوقت
مسكوا فى بعض ، والخناق شغال والضرب نازل يرف .

الشيخ جاد [فرحاً] — ول يا ام .. إديها يا ام ..
كان يا ام . ركبه م اللي بالك فيهم ، أيوه كده ، كان دماغ ،
يا سلام عليك يا ام .

[الكوب مستمراً في الاهتزاز بشدة ثم يطير من المنضدة متهمها] .
عبد الصبور [صانحاً في عجلة] — وله يا زينهم ، كبايه تانيه
بسرعه يكملوا فيها الخناقه .. ياللا يا زينهم .. الخناقه حامييه
قوى .. بسرعه يا وله ..

[زينهم يتقدم بكوب آخر ويضعه على المنضدة .. فيضمون عليه
أصابعهم ولكن الكوب لا يتحرك] .

عبد الصبور — الظاهر إن الخناقه خلصت .

الشيخ جاد — لازم صالحه قاصين هربت .

عبد الصبور — استنوا كده لما نشوف حد منهم
موجود ؟ سكون . سكون . ارتفاع عن الماديات وسمو
عن الأرضيات ، سمو . سمو . سماويات . روحانيات .

الشيخ جاد — سماويات إيه بس يا سي عبد الصبور ،
هوّا بعد اللي حصل بيق فيه سماويات ، بلاش تضييع وقت
يا شيخ ، أسألها باختصار .. مين انت ؟

عبد الصبور — انت مين ؟ [يقرأ] مين إيه .. يا عؤمر ..
انتوا حاتلوا والالا أضلها الكو ، وأدشدشلكوا الكبايه

على نفوخكو ونفوخ اللى يشددلكو [للشيخ جاد] لا . .
دى حاجه ماتنطقش أبداً . . دى روح شلق قوى .
الشيخ جاد — هى أمى مافيش غيرها [ماتحاً بأعلى صوته]
إزيك يا ام ، سلامات يا ام ، وحشتينى يا ام [عبد الصبور]
اطلع انت منها بقى وسينى منى لها .

عبد الصبور [فى توره] — دى بقت حاجه هزؤ خالص .
دى مابقتش جلسة أرواح ، دى بقت جلسة أودباتيه .
[الكوب بهنز بشدة] طب بس خلاص اسكتى . حقتك علينا ،
عدم المؤاخذه . . انفضل ياسيدى كلها . كلم ست صالحه
النس .

الشيخ جاد — سلامات يا ام ، عامله إيه فى السما يا ام ؟
عبد الصبور [يقراً] — برضك ما شيه بالذراع زى
ماكنت فى الأرض ، مافيش روح تقدر تدوس لى على
طرف ، مدوِّخام روح روح . . لو كنت شفت العلقه
اللى هبدها لصالحه قاصين كنت عرفت إن امك برضه راجل
زى ماهيه .

الشيخ جاد — وازاى أبويا .
عبد الصبور [يقراً] — مدوِّخنى فى السما زى ما كان
مدوِّخنى فى الأرض . . فلا تى وبصباص وعينه فارغه . .

كنت زمان في الأرض بعرف أعفقه ، لكن دلوقت
سايب على حل شعره . طول النهار يعط في السما ، ما انا عارفه
له قرار ، راح فين ولا جه منين ، لكن لما ييقع في إيدي
عينيك ما تشوف إلا النور . . لسه أقربها دلوقت كنت
طابقه في زمارة رقبتة ، مخلصوش مني غير الوليه صالحه
قاصين .. ما علينا . إيه أخباركم اتم . إزاي أختك خديجه ؟
الشيخ جاد — مبسوطه وأشيتهارضا . من يوم مامتي ،
وجوزها مهنيا وباسطها وما تخنقش معاها ولا خناقه .

عبد الصبور [يقرا] — الضلالى ابن الضلالى .. هو أنا
يعنى كنت ضبابه على عينه ، والا راكزه على نفسه ، يا حبيبتى
يا بنتى ، لازم مفيش حد قادر يسوِّدك عيشته زى ما كنت
باعمل . لازم راكبك وموريك الويل . وازاي خالتك زنوبه ؟
الشيخ جاد — بتدعى عليكى إن ربنا يحمك .. وكل
ما تشوفنى تقول : جاتها داهيه أمك مطرح ما راحت ..
من يوم ما ماتت والدنيا رايقه بلوزه . . . وأنا مش قادر
أكلها ولا أهب فيها .

عبد الصبور [يقرا] — أصلك مره طالع لابوك ..
وبتسكت لها ليه ؟ خايف منها ؟

الشيخ جاد - لا .

عبد الصبور [يقراً] - آمال إليه ؟

الشيخ جاد - الحقيقة إنى أنا شايف انها على حق . .
أصل انت يا ام كان لسانك زفر قوى ، ما كانش حد
يطيقك ، فاكره لما دلقتى حلة الملوخيه الحامضه على دماغ
الشيخ شوشه .

عبد الصبور [يقراً] - ما هو كان كان يستاهل أكثر
م اللى جراه ، مش كان هوّا اللى مخسر أبوك ، ومعلمه
السهر والبصبصه ؟

زكى [متعللاً] - يا الله بقى يا أخى قول لها تنصرف . .
إحنا ماعندناش وقت للكلام الفارغ ده [الكوب بهتز بشده] .
عبد الصبور - طيب ، طيب ، ماتزعلش حقتك على .
زكى [خائماً] - مالها ، بتقول إليه ؟

عبد الصبور [يقراً] - بتقول قول للواد الاقرع اللى
ينقرص فى لسانه يتلم ، لحسن والنبي ، واللى نبأ النبي
تدشدهش الكبايه على نفوخك .

زكى - لا مفيش لزوم ، وعلى إليه ؟ . . قل لها أنا
راجل غلبان ، وصاحب عيال .

الشيخ جاد - عايزه حاجه يا ام ؟

عبد الصبور [قرأ] — عايزاك تطلع القرافه على روجي
بحلتين مفتقه وحلة حله وربطه حنا بغدادى .

الشيخ جاد — من عنيّه يا ام ، بس المفتقه بقت غاليه
أوى اليومين دول ، ماتخليهم حله واحده ، هو اتى مبطلتيش
الفجعه دى ؟

عبد الصبور [قرأ] — لسه برضك مقرّم ، وتموت
ع المليم ؟ هوأ انا خساره فيّه حلتين مفتقه . ؟ إن شا الله
تنطس فى عينك ، ياما شلتك وياما ريبتك .. آدى آخره
تريبتى وتعبى ، تستخسر فيّه حلة مفتقه .

محجوب [وقد ضاق ذرعاً] — يا أخى أرجوك .. أنا
حاطع عليها باربع حلل .. بس قول لها تنفضل بقى ..
وتروح لحالها ، كفايه ، عايزين نشوف شغلنا .

الشيخ جاد — طيب يا ام ، انفضلى اتى بقى ، إبقى سلى
على ابويا ، وقولى له : التعميره اللي كان مخيها فى الطقيسى ،
لقيتها مغشوشه ومخلوطه بجنه وتراب .. هى دى اللي جابت
أجله .. الله يرحمه ويحسن إليه .. مع السلامه يا ام .

عبد الصبور [قرأ] — مع السلامه .

زكى [متنهذاً بارتياح] — مع ألف سلامه ، حلّى عنا بقى

دى أم دى يا شيخ جاد .. الله يكون فى عون عزرائيل اللى
قبض روحها .

عبد الصبور — دلوقت خلونا نخش بقى ع المهم ..
هيه .. نبتدى .. ؟

محجوب [بلهجة حزينة] — أيوه .. نبتدى .
الشيخ جاد [بفرك بديه مررراً] — أيوه نبتدى .. دى
الحكاية سهل أوى ، قولوا بس أنهى روح عايزين تنزلوها ،
وأنا أنزلها لكوا زى العصفوره .. طلباتكم ؟

عبد الصبور — أسكت إنت يا شيخ جاد .. كل اللى
عليك إنك تحط صباeck وتسكت ، إوعى تتكلم والاتنفس
لحسن تطرد الأرواح .

الشيخ جاد — أنا بطرد الأرواح . أمال أمى نزلت لى ليه ؟
عبد الصبور — علشان أمك من نفس النوع الواطى
بتاعك .. يعنى فيه توافق بين أرواحكم .. يعنى زى المتعوس
وخابب الرجا .. فاهم ؟

الشيخ جاد — عيب ياسى عبد الصبور .. تجيب سيرة
أمى .. دى برضه حرمه وميته .. وأنا ما احبش حد يجيب
سيرة أمى أبداً .

زكى — لا .. باين عليك متربى وابن ناس !

عبد الصبور — دلوقتی خطوا صوابعم علی الکبایه ..
عایز صمت .. وسکون .. سکون .. سکون .. ارتفعوا
بأذهانکم .. حلقوا بأرواحکم .. سمو .. وارتفاع ..
لا مادیات ولا أرضیات .

[یسمع بجانة صوت دقات شديدة بالهون فی المطبخ]
عبد الصبور [نزعاً] — إیه ده ؟ إیه الدق الفطیع ده ؟
إیه الضججه المزججه دی ؟ . واد یازینهم .. بت یا سنیه . ؟
[تدخل سنیه وهي تحمل اید الهون]
سنیه — یوه مالک یا سیدی .. بتصرخ کده لیه ..
حصل إیه ؟

عبد الصبور — إتم وحوش .. إتم بجانین .. إیه الدق
المربع ده ؟ !

سنیه — هوّه إیه أصله ده .. دانا بدق الکفته .
عبد الصبور [صائحاً] — کفته إیه .. وزفت إیه ..
وبلا أزرق إیه .. ده وقت کفته !! .. فیه أرواح تنزل
علی دق الکفته ؟ .. إنتوا إیه .. جنسکوا إیه ؟
الشیخ جاد — ومانزلش لیه علی دق الکفته ؟ .. أمال
روح العاجاتی .. وروح الشیمی حایبقوا یزلوا علی إیه ..
علی دق الطیل .. واللا علی دق الزار .. کل شیلله ویشبهله
کل شیخ وله طریقته .

عبد الصبور — أسكت يا شيخ هباب ، مين قال لك إني
عايز أنزل روح العجاق والاروح الشيمى . . إحناعايزين
روح ناعمه ، روح رقيقه .

الشيخ جاد — طب خلاص ، فهمنا كده ، روحى يابت
دقى على واحده ونص .

[سنيه تختق .. بعد حين يسمع دق مثل طبل الرقص على واحده ونص]
عبد الصبور [هاجعا] — بس يابنت الصرمة ، بلاش
مسخره فارغه ، عايزين سكون مطبق ، سكون خالص ،
ما فيش كفته ، ما فيش ثقليه ، ما فيش ملوخيه ، ما فيش ماده
فيه سمو ، فيه ارتفاع . فيه إحساسات فياضه . فيه عواطف
رقيقه . فيه تفكير سماوى . سكون . سكون . ياللا حظوا
صوابكم . وارتفعوا بأرواحكم . اسم الروح اللى انت
عايزها إيه يا أستاذ محجوب ؟

محجوب [يتهدد بحزن] — نعيمه .

عبد الصبور — أبوها .

محجوب — محمد .

عبد الصبور [فى ضيق] — محمد إيه .. لازم يكون محمد
حاجه .. هو فيه حد ما اسموش محمد .. دا اسم مشاع ..
زى سى .. وزى حضرة .. اسمه الكامل إيه ؟

محجوب — محمد محمد .

عبد الصبور — محمد محمد؟!!

محجوب — أيوه محمد محمد . . اسمه كده محمد محمد؟ .

عبد الصبور — محمد محمد كده حاف ، مافيش المنفلوطي

الأسيوطي ، الفيومي ، حاجه كده ميزه ، مافيش اسم تالت؟

محجوب — الاسم التالت مقدرش أقوله .

عبد الصبور — ليه؟ عيب؟

محجوب — مش عيب ولا حاجه .

عبد الصبور — أمال إيه؟ فيه إيه؟

محجوب — لا ولا حاجه ، بس برضك محمد ، اسمه محمد

محمد محمد . . أنا ماليش دعوه ، إنت اللي قلت لي قول!

عبد الصبور — طيب خلاص ، حصل خير ، اسمه

محمد محمد محمد . . ويمكن لو بحثت شويه كان في تاريخ العيله

تلاقي الاسم الرابع محمد والخامس برضه محمد ، على كل حال

من باب الاختصار نسميه محمد دايره .

الشيخ جاد — أيوه محمد بن الدايره .

عبد الصبور — إنتم ياشيخ قطران . أسكت انت بالتى

هى أحسن . . اسم أمها .؟

محجوب — عديله .

عبد الصبور — نعيمة بنت محمد دايره بنت عديله ،
كده مضبوط ؟

محجوب — أيوه مضبوط .

عبد الصبور [ناظراً الى السقف] — ياسيده نعيمة يابنت
محمد دايره بنت عديله .

محجوب — آنسه يا أستاذ ، ماتت قبل ما تتجوز .

عبد الصبور — عدم المؤاخذه ، يا آنسه نعيمة يابنت
محمد دايره يابنت عديله ، تسمحي بكلمه .

[الكوب لا يتحرك]

عبد الصبور — ياست نعيمة .

محجوب [في حدة] — آنسه يا أخي قلت لك !

عبد الصبور — آنسه ، ست ، أهو كله محصل بعضه ،
يمكن يا أخي بقت ست في السما .

محجوب — لا أنا واثق منها كويس .

عبد الصبور — طيب حقتك على ، يا آنسه نعيمة ،
انفضلي ، خمس دقائق ، عايزينك في كلبه بسيطه ، لو سمحت .

[الكوب لا يتحرك]

عبد الصبور — وبعدين يعني . . . ياست نعيمة لحظه
واحد ، مش حانأحرك كتير . [الى الشيخ جاد] خف

صباڪ شويه يا شيخ جاد ما تنقلش ع الكبايه .. بس لس .
فیش اڪتر من كده .

الشيخ جاد — أنا يدوبك لامسها .

عبد الصبور — يا ست نعيمه ، يا آنسه نعيمه ،
أرجوك ما عندناش وقت .

[الكوب بتحرك بيطة .]

عبد الصبور — بس .. الظاهر إنها جت ، ركزوا
تفكيركم فيها .. ابتعدوا بذهنكم عن الماديات [بقرا]
حاكبوش خاناكيك [بتكلم] ده إيه الكلام الفارغ ده .

الشيخ جاد [لمحجوب] — هي المرحومه كانت بتتكلم
بالجريجي .

محجوب — جريجي إيه يا جده . دي مصريه من ضره
مصري .

عبد الصبور — دي لازم روح شريره بتأوز . أصل
فيه أرواح كده فاضيه وتحب اللعب والمعاكسه .

الشيخ جاد — يا أخى وفيها إيه ، خليها تأوز من نفسها
شويه ، لازم مضيقين عليها فى السما . الظاهر إنهم جد
قوى فوق ، هات الروح الملعبانيه دي ، نلعب معاها
شويه خلينا نفرش ، حد واخذ منها حاجه .

زكى - هوّا ده وقت لعب باشيخ جاد ، إحناف إيه
والاف إيه؟

عبد الصبور - نجرب تاني ، ركزوا أذهانكم كويس .
اسموا بتفكيركم ، فكروا في الآخرة والملايكة والجنه
والنار . . سكون ، سكون .

سنيه [من المطبخ] - آى . . آى .

عبد الصبور - مالك يابت بتصرخي ليه؟

سنيه - زينهم قرصنى .

عبد الصبور - إتلم يازينهم لحسن أقوم أقرصك
في نافوخك ، اتلم أحسن لك . أنا قلت ميت مرّه مالكش
دعوه بسنيه ، لحسن أدبجك .

زينهم [مندفعاً من المطبخ] - هوّا إيه دا ، تدبجنى ازاي ،

هوّا ما فيش حريات ، أمال فين الحريه الخامسه؟

عبد الصبور - إيه هي الحريه الخامسه دى ياسى زينهم؟

زينهم - حريه البصبصه ، حريه تلعب الحواجب ،

والضرب باللسان ، ومع كلاً أنا غرضى شريف . . يعنى

بصبصتى شريفه . . أنا عايز اتجوزها . آه .

عبد الصبور - الظاهر انك عايز أجلك ينتهى ، أنا قلت

ميت مرّه مش عايزك تجيب السيره دى على لسانك ،

أنا مش عايز سيرة جواز هنا في البيت ده أبداً ، فوت
انجر من قدامي ، حلوف ابن حلوف .

[زبنيم يتجه اى المطبخ]

عبد الصبور — عدم المؤاخذه ، نبتدى من جديد ،
سكون ، سكون .

الشيخ جاد — سكون ، روحانيات ، سماويات ،
أبوك السقامات ، عارفين المنولوج كله ، ياللابق خش
على الجد ، انده لها وخلصنا ، هي إيه؟ السفيره عزيزه!!
عبد الصبور — انت يا شيخ قطران ، أسكت بلسانك
انت السبب في العطله دى ، الروح لازم مش عايزه تنزل
من تحت راسك ، لازم تفكيرك مش ولا بد . . كده
والا لا ؟

الشيخ جاد — والله من جهة مش ولا بد ، فهو صحيح
مش ولا بد .

عبد الصبور — بتفكر في إيه؟ قول لى ؟

الشيخ جاد — عايز الحق ، والا ابن عمه ، أنا أصلى
ماحبش الكذب . . بصراحه كده كنت بافكر في البت هانم .
عبد الصبور — هانم . هانم إيه ؟

الشيخ جاد — هانم زبده ، هانم قشطه ، هانم حلويات ،

هانم سكر نبات .. يا خسارتك يا هانم ، ضاعت من إيدى .
يا خساره ، يا ألف خساره .

عبد الصبور — إيه بس جرا إيه ؟

الشيخ جاد — كان مياعدها امبارح تيجي تشطف حتتين
الغسيل ، والبيت كان فاضى مفهش حدغيرى ، وقلت ياواد
أحسن طريقه عشان تبلغها ، اقعدع الطشت خد لك فستين
معاها .. وقعدت ، وهات يادعك لما إيدى بقبقت ، وبعدين
طلعت تنشر الهدمتين ، واستناها تنزل ما نزلتش .. أتأبها
زاغت من سطوح الجيران .. أنا أصلى غلطان ، الحق علىّ
أستاهل ألف صرمه .. كان لازم اطلع انشر معاها ، مش
أسيها تضحك علىّ وتزوغ منى .. أهو أنا عمّال افكر ..
لو كنت طلعت ونشرت معاها ، مكانتش قدرت تزوغ منى
وكانت نزلت معايا ، وكنا قعدنا فى البيت سوا .

عبد الصبور — إخص ، إخص ، إخص على التفكير
السافل المنحط .. شيل صباeck من على الكبايه ، جاك قطعته
دا السمو والارتفاع اللى باطلبه منك يادنى يارمرام . هانم
زبده ، وهانم قشطه ، وفمّين غسيل ، إخص ، إخص ،
شيل صباeck ، يادون يا بأف .

الشيخ جاد — طب خلاص شلته ، دا ماله محموق كده

ليه ، هي الدنيا طارت ، هو الغسيل حرم ، دا غسيل ، دا حتى
ربنا قال النظافة من الايمان ، وأنا كنت بعمل مع هانم شوية
إيمان ، هو إيه ، حرام ؟

محبوب [الى الشيخ جاد] - خلاص ، خلاص ،
اتهنينا ، شيل صباغك واسكت .

عبد الصبور - أنا حاحط صباغى معاكم .. إبعده
يا شيخ جاد ؟

الشيخ جاد - بعديت ، أما اشوف كده حاتعملوا إيه
بشطار تكم وتفكيركم السامى ، يا الله اتفضلوا .
عبد الصبور - سكون ، سكون .

الشيخ جاد - سماويات ، روحانيات ، يا خسارتك
يا هانم يا سكر نبات .

عبد الصبور - سكون ، سكون ، سمو وارتفاع ..
[ناظرآ الى السقف] يا نعيمه يا بنت محمد محمد محمد يا بنت عديله
اتفضلى انزلى شويه من فضلك وإحسانك [الكوب لا يتحرك]
ياست نعيمه وحياة والدك تنزلى شويه ، كله واحده بس
مفيش غيرها [الكوب لا يتحرك] طب إذا كنتى مش فاضيه
قولى لنا إنك مش فاضيه [الكوب لا يتحرك] لا ، دى حاجه
تفورّ الدم خالص [للجماعة] لازم فينا واحد وسيط مش كويس .

الشيخ جاد - إوعى يا شيخ كده ، شيل صباeck شيل ،
أنا حافر جك ازاي تنزلها .. آل من فضلك آل .. دى مَرّه
ياسى عبدالصبور ، والنسوان مايجوش إلا بالدق على دماغهم
آل إيه كلبه واحده من فضلك .. إوعى كده .. شيل إيدك من
على الكبايه ياسى محبوب ، وانت عمال بتترعش ووشك
أصفر زى الكرم ، سيدنى عليها بلا مياعه [بضع أصبعه على
الكوب بدل عجوب وينظر الى الكوب صائحاً] إنت يابنت يانعيمة
إنزلى جاكى نزله فى ركبك .. إنزلى وحياة املك بلا مرقع
فارغه .. إنزلى بقول لك يابنت لحسن أخلى أمى تجيبك
من شوشتك .

محبوب - لا .. أنا ما سمحشى .. دى وقاحه ..
دى قلة أدب .. أنا ما سمحشى لحد يخاطب نعيمة
باللهجه دى .

الشيخ جاد - طب بس اتلهى انت واسكت [لروح]
يا الله يابنت انزلى بالتى هى أحسن بدل ما خلى أمى تجر جرك
على ملا وشك وتفرج عليكى اللى مايفرج ! [الكوب بهتر]
شفتم مش قلت لكم النسوان مايجوش إلا بالدق [لروح] إزريك
يابنت .. إزاي املك .. إنتى نعيمة بنت عديله .. [الكوب
بتحرك يمينا وشمالا ، والشيخ جاد يقرأ] .. أيوه .. وانت مين؟

[لروح] محسوبك الشيخ جاد .. مأذون الصنادقيه ودرج
عجور وما بينهما [قرأ] وعاز منى إيه؟ [لروح] عاز
سلامتك .. عازن تسامر شويه .. فيه مانع؟ [لحجوب]
ماستلوهما تتوايق يا جماعه أنانز لتها لكم وانتوا عليكموا الباقي .
عبد الصبور [لروح] — ياست نعيمه .. فيه هنا واحد
قريب منك جداً .. عازن يكلمك [قرأ] هوّا مين؟ [لروح]
الأستاذ محجوب الور [قرأ] عازن منى إيه؟ [لروح] والله
عازن يقول لك شوية كلام كده [لحجوب] اتفضل يا أستاذ
محجوب .. كلم الست نعيمه .

محجوب [مرنجأ] — هي دي نعيمه؟! حقيق نعيمه !!
أنا مش مصدق .. أنا خايف قوى .. أنا مش حاقد
أكلها .. أنا كنت ما بقدرش أكلها وهي في الأرض ..
كنت لما بقعد معاها لساني ينعقد .. وقلبي يدق .. زي المي
حايظ من صدرى .. إزاي أقدر أكلها دلوقت .. مش
ممكن .. مقدرش أكلها .. أبداً .. أبداً .

عبد الصبور [في تبرم] — كلبها ياسى محجوب ماتخيلهاش
واقفه ملطوعه .. كلبها ما يصحش .

الشيخ جاد — كلبها كلبتك اجنابك .. أمال كنت
مسروع عليها ليه .. لما انت بسلامتك مش قادر تسكلمها؟

خایف من إيه ؟ . یعنی هئ حاتكون أقوی من أمی . .
كلها بلا نَسْوَنَه .

محبوب — طب بس استنوا علی شویه . . خلونی
أشم نَفْسِي وابلع ربيق . . حرام عليكوا ياناس . . دانانی
حال یعلم بها ربنا . . [هاما] نعيمه .

عبد الصبور — زعق شویه . . بلاوی إيه دی .
محبوب [لروح] — نعيمه .

[الكوب بتحرك]

عبد الصبور — بتقول ماله كده بيصوصو . . زی
ما يكون بيتكلم من تحت الأرض . . اتكلم زی البني آدمين .
محبوب — نعيمه .

الشيخ جاد [فيخرية] — إيه اللي نعيمه . . نعيمه . .
ماحنا عارفين انها نعيمه . وهي عارفه نفسها نعيمه . . إنطق
قول لها عايز إيه . . إنت فاكر إنها فاضيه لك .

محبوب [لروح] — أحبك يا نعيمه .

عبد الصبور [يقرأ] — حَبِّكَ بُرْص .

الشيخ جاد — تعجيبني يابت يا نعيمه يَسْمُ فُمَّكَ . . آل
أحبك آل ، ياخي حبك الضب و غضب عليك الرب .

محبوب — إيه؟ . هي بتقول لك كده؟ مش ممكن ..
هي ماتقولش كده أبداً !

عبد الصبور — أنا ما جببش حاجه من عندي ياغبى ،
إبقى اقرا بنفسك الحروف .. ياللا كلها هي مش فاضيه لك .
محبوب — حاضر ، حاضر ، حاكلها [لروح] نعيمه
أنا مش طايق الحياه بعدك يا حبيبتى ، مش قادر أعيش فى
الدنيا من غيرك ياختى .

عبد الصبور [يقرأ] — طيب وإيه اللي مقعدك فى الدنيا
إيه اللي مانعك من الموت ؟
الشيخ جاد — آه حقيقى .. لها حق ، إيه اللي
مانعك ؟

محبوب [مرتبكاً] — اللي مانعنى .. اللي مانعنى [لشيخ جاد]
أقول لها إيه ، إيه اللي مانعنى ؟
الشيخ جاد — قول لها أى حاجه ، ما دام حضرتك
لازم تتفلسف وتقول لها إنك مش قادر تعيش من غيرها ،
قول لها الغلا ؟
محبوب — الغلا ؟ ! ! غلا إيه .

الشيخ جاد — غلا الحانوته .. غلا الموت .. هو فى
حاجه مصبره الواحد على غلا المعيشه غير غلا الموت ..

كل حاجه دلوقت بقت متعذّره .. الزيت والفلول والسكن
والموت .. قول لها كده .

محبوب — ازای أقول لها كده ، عشان تفتكرنى
فقير .. شحات .؟ وبعدين تحتقرنى .. أنا طول عمرى
مفهمها ، إن اناراجل متيسر ، ومبجح ، ومتریش .
الشيخ جاد — طيب خلاص . حقك على . قول لها
الى يعجبك ، قول لها إنك متریش .

عبدالصبور — اتكلم بقی يا أخى خليت الروح زهقت .
إنت أصلك إيه ! انطق ؟

محبوب [لروح] — مش قادر أموت يا حبيبتى .. عشان
عایش على ذكراك .. اللى مهون على عیشتى إنى بشوف
طيفك فى المنام .

عبدالصبور [بقراء] — بيقول إيه دا يا ختى ده ؟
الشيخ جاد — سيك منه دا بيخرّف .

محبوب [لروح] — ذكراك هى كل حاجه لى ، طيفك
هو اللى مصبرنى ومسلينى . بافتكرك ليل ونهار ، بافتكر
عينك وبتك وكلامك الحلو .

عبدالصبور [الكوب بهتز] — ما فيش لزوم .
محبوب — بتقول إيه ؟

عبد الصبور — بتقول باسم .. يادم .. يا كُبة .
محجوب — كدّاب ما بتقولش كده .. هي بتجبنى زى
ما بجها [لروح] بفتكر كلامك الحلو وبتفكر وقتي في المنور
تحت شباك المطبخ ، وقشر البطاطس اللي كنت تحديه فوق
والتفاهه اللي كنت بتفها علي .. كان هزارك لطيف .
[الكوب بهنز] .

محجوب — بتقول إيه ؟

عبد الصبور — بتقول ما كانش هزار .. ده كان جد .
محجوب — كدّاب ما بتقولش كده [لروح] بفتكر
في الأيام الحلوه اللي قضيناها سوى ، وفي الأيام اللي كنت
بجلم بيكي ، وبتفكر ازاي سهيتي ، وموت نفسيك ، وسيتيني
في الدنيا لوحدي .. ليه يانعيمه تنتحري .. ليه يانعيمه ،
تسرعي ، حقيقي الظروف ما كانتش ملائمها لجوازنا ،
وحقيقي الأحوال العائليه كانت بطاله .. لكن كل شيء
كان مسيره يتصلح ، وكنا برضه مسيرنا نتجوز .. ليه
تنتحري عشان خاطري ، وأنا حياتي كانت فداكي ..
ليه يانعيمه ؟

[الكوب بهنز]

محجوب — إيه ؟ .. فيه إيه ؟ بتقول إيه ؟

عبدالصبور - بتقول المغفل دا بيخرف يقول إيه؟
محجوب - لا .. دى دسيسه ، انتوا عايزين توقعوا
بينى وبين نعيمه . حرام عليكم .. مش كفايه هم كانوا
يوقعوا بيننا وهى حيه .. انتوا كان بتوقعوا بيننا وهى
ميتة؟ حرام .. حرام عليكم .

[الكوب بهنز]

عبد الصبور [بقرأ] - حرام إيه .. حرمت عليك
عيشتك .. حب إيه وهباب إيه وجواز إيه اللي كان بيننا .
أنا انتحرت عشان خاطرك؟ . يا أخى هزلت ياسى محجوب
ليه الرجاله خلصم ، والاعدم .. أنا اللي زهقت من عيشتى ،
أنا اللي لقيت الدنيا ما تستاهلنى .. أنا اللي ينست من كل
حاجه مش لاقيه فيه عدل ولا رحمه حواله أبدأ فى الدنيا
بتاعتكم .. العدل فيها باللسان بس والرحمه بالكلام .
لاقيه نفسى محرومه من كل حاجه . أبويه بيربى تمانيه
زى ويياخذ اتناشر جنيه .. يعنى لو كان بيربى تمان
معيز ما كانش قضاهم أكل .. تمان معيز .. واحنا تمان
بنات ، لنا بق عايز ياكل ، وجسم عاوز يتغطى ، وعين
بتبص وتشوف وتقرأ المجالات وتفرج ع الصور ،
وتشوف الهدوم والصيغه والفلوس اللي بتتبعتر ، وتشوف

بني آدمين زينا متخومين ، واحنا يدوبك بتلاقى اللقمه ..
 كنت عايشه محرومه إلا من النظر والإحساس .. ياريت
 ما كانش عندى نظر ولا إحساس ما كنتش حسيت بالحرمان
 اللى أنا فيه ، ولما كان الحال يفيض بي كنت أقول يمكن
 تفرج بالجواز .. لكن لما افكر كنت ألاقى إن جواز
 المحرومين حا يكثر المحرومين ويزود الحرمان .. وكنت
 ألاقى إن أنا حاجنى على أولادى زى ماجنوا على
 أهلى .. قلت يابت أحسن حاجه .. سبى الدنيا ، ونقصى
 المحرومين محروم .

الشيخ جاد - لكى حق يا نعيمه يابنتى ، الله يرحمك .
 محجوب [لروح] - يعنى ما متيش ^و علسانى ؟ . يعنى
 ما كنتيش بتحيينى يا خاينه ؟

الشيخ جاد - بلاش لماضه بقى .. قالت لك ماتت من
 الجوع .. يعنى ماتت م الجوع .

محجوب [لروح] - وانا اللى كنت فاكر إنك انت
 انتحرت عشان خاطر مش قادر اتجوزك ، أنا اللى كنت
 مخدوع فيكى وفاكر إنك مت من حبي .. أنا اللى لايس
 عليكى بدله سوده وكرافته سوده ، وحالف ما اقلعهم أبدأ .
 عبد الصبور [يقراً] - كرافته سوده ، وبدله سوده .


إنت فإكر إن احنا هنا حاسين بالكرافته السوده والبدله
السوده . . دى تفاهة أحياء ، وهيافة بنى آدمين . . روح
ياخويا امضغهم .

زينهم [يفتى داخل المطبخ بصوت مسوع] :
فى ليله شفت الحبيب ساهى وباكى العين
وع الرصيف ماشى يبطوح على الجنين
قلت الهوى عذبه والبعد كان له فين
خبطته ورده لقيته طب مات م الجوع
ياريتنى يا حلو شقه وطعميه وقرص منين

محجوب [لروح] — إخص عليكى [يخلع الكرافته السوداء]
إخص عليكى ياخاينه . . ياخسارة حزنى عليكى . . ياخسارة
الكرافته السوده . . شارها بنص ريال . . خدى أهى . .
[يقذف بالكرافته السوداء على الأرض ثم يغمى عليه]

عبد الصبور [صائحاً] — زينهم . . سنه . . إلحقونا
بكباية ميه . . إلحقونا بنشادر . . ياناس . . ياهوه . . الراجل
سخرخ الحقوه . . حايموت .

(تسدل الستار)



الفصل الثاني

المنظر — [حجرة جلوس عتيقة بها بعض الأرائك والكراسي
ومكتب قديم ، في الركن ، وعلى جدرانها صور قديمة وآيات قرآنية ،
وعلى اليسار باب يفضي الى الصالة وعلى اليمين شباك وفي المواجهة باب زجاجي
كبير ذو أربع ضلقات تبدو منه حجرة نوم عبد الصبور افندي ، في
منتصفها سرير حديد ذو أربع أعمدة وضع كل عمود في صفيحة ، وأمام
السرير كرسي وعلى الحائط مشجب ورف عليه كتب صفراء وعلى أعلى
الباب الزجاجي علقت ساعة حائط تشير الى الثالثة والنصف .

[برقع الستار على سفيه وهي تنظف حجرة الجلوس]

المشهد الأول



[سنيه — زينهم]

سنیه [تغی] — وان كنت خایف من امی دی امی علی
ستوره . . وان كنت خایف من أبویا دا ابویا عدی
المنصوره .

زينهم [بدخل مندفا حاملا في يده مكنسه] — أنا أخاف
من أبوكي . . ليه ؟ هفييه . . دانا لو خبطته خبطه
حاجييه الأرض . . آل عدی المنصوره آل . . مايعددي
واللاينفلق . . أنا يمني . . دانا زينهم والأجر على الله . . أنا
زينهم صبي زكيه الملدنه . . قاهرة الوحش . . إيدك بقى يابت
ياسنيه . . قربي علي ياسنسن ياللي زى اللوز .

سنیه — خليك عندك بالتى هي أحسن . . إوعى تقرب
لحسن وسيدنا الحسين أخطك بالزهريه اللي في إيدي
أفتح قرنك .

زينهم [في غزل] — خشى علي خشى . . ياسنسن ياللي زى

المشبك اللى بيخر عسل .. إخطبني بالزهريه .. إفتحى
قرنى .. موتينى .. إدبحينى .. [مغنياً] وان دبحتيني بايديكى
عيب على إن قلت آه .. آه .

سنيه — إبعد يا زينهم واقصر الشر .. وقول اللهم
اخزيك يا شيطان . إبعد أحسن لك .. لحسن والنبي أرفع
بالصوت .. أجيلك سيدى عبد الصبور .

زينهم — يا باى .. بالطيف .. طب بس اخفيها سيره
بقى .. سيدك عبد الصبور .. جاتك نيله على سيدك
عبد الصبور .. إبقى خليه ينفحك .. بكره يضيع عمرك
زى ماضيع عمر المغفله الكبرى .

سنيه — هي مين دى المغفله الكبرى؟

زينهم — يعنى حاتكون مين غير ستك أم رتبيه ..
فضل يضيع منها العريس ورا العريس .. لغاية ما بلغت
أرذل العمر .. وحاططلع من الدنيا قفاها بقمر عيش ..
خليكى إنت ورا سى عبد الصبور لغاية ماتحصى أم رتبيه ..
يابت اعقلى .. حطى عقلك فى راسك واسمعى كلامى ..
طاوعيني يا سنيه لحسن تندى؟

سنيه — أطاوعه فى إيه الميتل على عينه ده ؟ . مانيش

عارفه أطاوعك في إيه . . واسمع كلامك في إيه ؟
زينهم — الكلام اللي قولتهوا لك اجمعه اللي فاتت لما كنت
بتنشرى الغسيل فوق السطوح .

سينه — مانيش فاكره قلت لي إيه . . أدبك طول
النهار بتقول كلام فارغ زيك . . هو انت وراك إيه غير
الكلام الفارغ .

زينهم — لا يا سينه دا ما كانش كلام فارغ . . دا كان
كلام جد . . كلام صحيح .
سينه — قوهولى تاني . مانيش فاكره .

زينهم — طلبت منك تتجوزيني .
سينه — أنا؟ أتجوزك انت؟ ليه . . انطسيت في عينه
انخبطت في نافوخي ، اتجنيت . خلاص . الدنيا صفصفت
عليك ياسي زينهم ، الرجاله خلصم ياروح امك . ومع كلاً
انت حقيقى بتتكلم جد ، والا هزار؟

زينهم — هزار ازاي ياسنسن . . هي الحاجات دي فيها
هزار . . الدنيا دي فيها حاجتين الواحد ما يقدرش هزار
فيهم أبدأ .

سينه — إيه هما؟



[زينهم وسنيه]

زينهم — أول حاجه الجواز .

سنيه — والتانيه ؟

زينهم — الموت .

سنيه — ياباى على ملافظك الوحشه ، صدق من قال

الملافظ سعد ، ولما انت عارف إن الجواز وحش كده

زى الموت . حتتجوز ليه ؟

زينهم — وحنموت ليه ١١٩

سنيه — قضا .

زينهم — أهو دا برضك قضا . لا بد منه ، بس قضا
عن قضا يفترق . قضا يحط في إيديك الكلبش .

سنيه — والقضا الثاني ؟

زينهم — يخلصك منه .

سنيه — ولما انت عارف كده . . بتجرى ورا

الكلبش ليه ؟

زينهم [يقترب منها] — أموت في الكلبش . . أموت في
طره . . يا وعدى ع العسل النحل اللي بيخر . . حا تحطى
الكلبش في إيديه امتى ياسنيه ؟

سنيه — إبعد عنى كده . . كلبش لما يطبق على
زمارة رقبتك . . آل كلبش آل . . ليه قالوا لك على
مأمور أبو زعبل . آل كلبش آل . . حقه بطلوا ده واسمعوا
ده ، ومع كل . . انت بتتكلم جد ، والا بتهر ؟

زينهم — قولتلك يا حبيبتى ياسنيه . الكلام دا ما فيش
هزار . دا جد وابن جد . أدى إيدى حطى فيها الكلبشات .
سنيه — ما كانش ينعر ياخويا . . ياريت كان عندنا ياسى

زينهم ، ومع كل سيني أشاور عقلي .. خليني أفكر ..
هي المسأله كده سهلي .. دا جواز .. دا عمر .
زينهم - تعجيني كده .. أهو كده بقيتي بت عاقله ..
مش .. أتجوزك ليه ؟ . انطسيت في عينه .. انخبطت
في نافوخي .. ما يصحش الكلام ده ياسنسن .. أنا برضه
بني آدم ، وليّ قيمه عند نفسي ، والا حاتعملي
زي المخبول الأ كبر .

سينه - دا يبق مين ده ؟

زينهم - أخو المغفله الكبرى .

سينه - بس .. عرفته ، والنبي راجل طيب ويستاهل
كل خير .

زينهم - طيب . طيب . لكن مخبول مخبول [مقلداً
عبدالصبور] خبي وشك لحسن ما بطيقوش .. غطي وشك
بسرعه .. شكلك يلبشني .. بخاف من عينيك .. بالذمه
دا كلام يتقال . أنا وشي ما ينطقش ؟ . عينه وحشين
[ينظر الي نفسه في مرآة في المائط .. ويلمب حواجبه] .

المشهد الثاني



[أم رتييه — سنيه — زينهم]

[تدخل أم رتييه]

أم رتييه — كان .. كان .. ياسي زينهم .. أدي
اللي كان ناقصنا، تقف في المرايا وتلعب حواجبك ..
خلاص .. كملت المعاني لما تلعب حواجبك في المرايا ..
عاجبك أوي شكك اللي زي بوز الإخص .. قال لو كان
القرد شاف ..

زينهم [مقاطعاً] — خلاص مفيش لزوم، يعني لازم
تسدَى نفسى .. قرد وما قردش .. هو يعني الواحد
كفّر .. لما يشوف وشه في المرايه ؟!
أم رتييه — ما كفّرش ولا حاجه .. بس قلبي عليك،
تغم قلبك وتسد نفسك . كان نفسى تتفرج على حاجه عدله .
ما علينا .. فوت انجر شوف شغلك .. إي وصل لعم شرف
هات منه قزازه كازوزه للضيف اللي جى .. ياللا فوت .

[يخرج زينهم بعد أن يقذف بقذبة في الهواء لسنيه]
زينهم [لام رتيبه وهو بهم بالا نعراف] — لامؤ اخذه ياست ..
دى حاجه كده ع الماشى .. دى دفعه أولى من إيجار السجن ..
دى عربون لئمن الكلبش [يصفق بيديه] أموت فى ابو زعبل
عقبال عندك ياست .

أم رتيبه — قَطْعِ لسانك .. قليل الحيا ما تحتشيش ..
إن شا الله انت وعشره زيك .. يسسلوك من رقبك
ويحدفوك فى أسفل سافلين .. آل سجن .. وكلبش .. آل ..
برّه وبعيد .

زينهم [لسنيه وهو بجوار الباب] — بقول لك على نيأتها ..
مالهاش فى الطيب نصيب . [لام رتيبه] إانت لو عرفت
السجن اللى قصدى عليه .. والكلبش اللى بالى فيه .. لو ديتى
نفسك فى طوكر .. آل برّه وبعيد .. قولى إن شا الله ألف
إنشا الله .. عقبال الحبايب .

[يخرج زينهم]

المشهد الثالث



[أم رتييه — سنيه]

أم رتييه — قصده إيه المهفوف في عقله ده . ؟
سنيه — ما تاخديش على كلامه ياست . . أهو عمّال
يخترّف . . حد واخدا منه حاجه غير كده .

أم رتييه — أمال كلبش إيه ، وسجن إيه اللي حياجره
ويدفع عربونه ؟

سنيه [تضحك] — ربنا يديكي ياستي .

أم رتييه — إنت كيان بتقولى كده ؟

سنيه — أيوه والنبي ياستي ، لو عرفت السجن اللي عايز
يخش فيه ، والكلبش اللي ناوى يحطه في ايديه . . لتدعى ييه
على الجبايب .

أم رتييه — ولا انا فاهمه حاجه .

سنيه — زينهم قصده بالكلبش والسجن . . الخطوبه
والجواز .

أم رتيبه — طيب وهو ما له وما الخطوبه
والجواز .. هو ما له وش الفقر ده ؟

سنيه [تضحك] — أصله ياستى عقبال عندك خطبى ،
والنبي ياستى بقاله كام شهر وهو ييزن على ودانى .

أم رتيبه [تبدو عليها الفرحه] — بقى كده .. المتيسل على
عينه أبو تعسونه كان بيخطب ويتجوز .. وقلت له إيه ؟
سنيه — قلت له .. لا .

أم رتيبه — لاه تسيب مفاصلك ، فيه حد تيجى له النعمه
لغاية عنده ويرفضها ، حد فى الدنيا يجيه عريس ويقول لا ؟
سنيه — مش بتقولى عليه المنيسل على عينه أبو تعسونه ؟

أم رتيبه — طيب وفيها إيه ، دى حاجه ودى حاجه ،
دى بشقه ودى بشقه ، مش راجل ؟ كفايه ؟
سنيه — بس ياستى حاله على أده .

أم رتيبه — بكره ربنا يعدل حاله ، والايعنى حاتكتر
على ربنا ؟

سنيه — أنا برضه ياست ماقلتش لا .. يعنى لا .. قلت
سينبى لما افكر .

أم رتيبه — وتفكرى فى إيه ؟ وليه ؟ هى دى حاجه
عايزه تفكير ، إرضى يابت .. إرضى به ، دا اللى ما يرضى

بالخوخ يرضى بشرابه .. وعريس في اليد ، أحسن من
عشره عند الخاطبه .

سنيه — بس ياستى خايغه من مى عبد الصبور .

أم رتبيه — وماله سيدك هباب ؟

سنيه — خايغه لا مايوافقش .

أم رتبيه — وهوأ ماله .. له عندك حاجه .. أبوكى ؟

أمك ؟ .. حقا بطلواده واسمعواده .

سنيه — أنا أصلى شايغاه دايمآ ساخط على زينهم

ومايطيقش يشوفه .. ودايمآ يقول لى إوعى منه يابت

دا أصله خسيس وخييث .

أم رتبيه — هوأ فيه حد عنده مش خسيس وخييث ..

هوأ كده دايمآ يكره العرسان ويطلع فيهم القطط الفاطسه ..

الود وده الجواز يحرم على العالم .. والناس تقعد كلها زيه

كده عزاب .. حقه عجائب .. مش كفايه مييل بختى ..

هوأ عايز يميل بخت اللى يعرفه واللى مايعرفوش .. إرضى

يابت إرضى واسمعى كلامى .. إرضى دا العمر مش بعزقه ..

والأيام بتجرى زى مايكون حد وراها بالكر باج .

سنيه — وإذا مارضاش ؟

أم رتبيه — هوأ مين دا اللى مايرضاش ؟ .

سنيه — سيدى عبد الصبور .

أم رتبيه — ولا يهملك . كل واحد يقول يا الله نفسى .
آل يا روحى ما بعدك روح .. شوفى مصلحتك يا بنتى ..
بكره لا ينفعلك ست ولا سيد .. ما حدش له عندك حاجه ..
الدور على انا اللى مسنسلنى معاه وبجر جرنى وراه .. وسادد
طريقى ويميل بختى .. ويطفش منى العرسان بوشه اللى
يقطع الخيره م البيت .. ربك يستر النهارده .. قادر يا كريم
تعقله وتهديه .. وتحلى فى عينه سى سيد افندى .. وتجعل
الخير على قدوم الواردين وتحلى نهارنا لبن .

سنيه — إن شاء الله يا ستى سليمه .

أم رتبيه — سليمه يا بنتى ياذن الله .

سنيه — ربنا يتم بخير .

أم رتبيه — خير وألف خير .. أنا عيني الشمال بترف ..

وعمرها مارفت إلا على خير .

سنيه — خير يا ستى خير .

أم رتبيه — وحكاية جوازك دا كان فال كويس ..

خلانى استبشر خير .. هوّا ياختى اتأخر ليه ؟

سنيه — ماتقلقيش يا ستى .. أهو زمانه جاي ..

هوّا معاده كام ؟

أم رتيبه — ست أم سيد قالتلى حاييجى الساعه أربعه .
سنيه — لسه بدرى قدامه ربع ساعه . . يكون سيدى
عبد الصبور شرب القهوه وشم النشوق ووزن دماغه . .
يقابله وهو فايق ورايق .

[يسمع صوت عبد الصبور افندى وتدور المناقشة بينه وبين زينهم
من الخارج]

عبد الصبور [مارخا] — القبقاب .
زينهم [يجيبه من الخارج أيضا] — حاضر . . حاضر .
حاجهولك .

عبد الصبور — يا باى .. يا باى .. يا حفيظ يا مغيث . .
خبي وشك يا خسيس يا إبليس يا خييث يا منحوس . . خبي
وشك لحسن بتلبش جتتى .

زينهم — أمال حاجيبك القبقاب إزاي وأنا مش لاقى
الوش قدامى عشان ألبسه . . خبي وشك إنت لغاية
ما جيهولك .

عبد الصبور — أنا حاغمض عنيه ؟

زينهم — يكون أحسن .

عبد الصبور — خلاص .

زينهم — لسه .

عبد الصبور — خلاص .

زينهم — لسه .

أم رتيه — الحقيه بالقبقاب ياسنيه يا حبيبتى . . إحقية
قبل ما يتلبس ويخلى يومنا زى بعضه . . شوفيهو له تحت
الكنبه اللي قاعد عليها ، ولا دورى عليه فى رجليه .. ماهو
اليومين دول خلاص عمى . . تبقى الحاجه فى إيده والا فى
رجله ويقلب الدنيا عليها .

زينهم [صائحاً من الخارج] — ياسلام . ياسلام . آمال
إيه اللي فى رجلك ده ؟

[عبد الصبور يدخل من باب حجرة النوم وهو يطرقع بالقبقاب
وقد ارتدى جلباباً وطرطوراً وظهرت أرجل السروال الطويل من أسفل
الجلباب] ..

عبد الصبور — مش قصدى على القبقاب ده .. قصدى
على القبقاب أبو جلاجل . . القبقاب الموسيقى . . هو اللي
بيهدى أعصابى ويريح جتتى .

أم رتيه — روحى يا حبيبتى ياسنيه شوفى له الحاجه
اللى هوا عايزها . طيبي خاطره شويه ياسنيه يابنتى . هديه
لاجل خاطرى ، وابعدى عنه المقروص زينهم ما دام
يلبش جتته .

[أم رتيبه تخرج من باب الصالون .. وسنيه تدخل الى حجرة النوم
من الباب المتسع حيث يجلس عبد الصبور افندى على فوتيل أمام السرير
وبجواره منضده صغيره] .

المشهد الرابع



[عبد الصبور — سنيه]

عبد الصبور — القبقاب أبو جلاجل .
سنيه — عنيّه ياسيدى . أبو جلاجل ، وابو صاجات ،
وابو سنه ذهب لولى .

عبد الصبور — اخلصى بسرعه .
سنيه — بس صبرك على ياسيدى ، أنا حاجيه هولك من
تحت طقاطيق الأرض .

[سنيه تبعت تحت المقعد وتحت السرير .. ثم تخرج قبقاب
منقوش بجلاجل] .

سنيه — اتفضل ياسيدى .. قبقاب العافيه .. قبقاب
السعد والهنا .

عبدالصبور — وخبیدنه لیه تحت السریر، هوامجیبه،
والامعیره .

سنیه — ابدأ . . یاسیدی ابدأ . . دازینه القباقيب . .
إحنا بس خایفین علیه م العین [تصدر بشفتها حركة منع الحمد
وتدور بأصابعها متجمعة فوق القباقيب] .

عبدالصبور — کلام فارغ، أنا ماصدقش فی العین . .
أنا عایزه ینحط دایماً وبوزه باین من تحت السریر ، عایز
اشوفه قدامی واتملی منه .

سنیه — اسم الله علی بوزه . من عنیه یاسیدی .
عبدالصبور — دلوقتی سیهولی قدامی ، وروحي
هاتی لی القروانه ، وابعتی لی ستک أم رتیبه عشان اقرا لها
شویه . . . أنورّ نخها .

سنیه — حاضر یاسیدی [تخرج وهي تنادی] ستی . ستی .
کلی سیدی عشان عایز ینورّ نخلک شویه . . الله ینورّ
علیه . . ویهديه کمان وکمان .
[تدخل أم رتیبه]

المشهد الخامس



[عبد الصبور — أم رتيبه]

عبد الصبور — أقعدى .. قدامى .

أم رتيبه — عايز إيه .. أنا مش فاضيه لك .

عبد الصبور — أقعدى يا جاهله .. أقعدى يامسكينه ..

يامضيّعه عمرك فى ظلمات الجهل .. ياتايه فى دياجير الحياه ..

أقعدى لما افتح ذهنك شويه يا بأسه .. ياتعه . أقعدى

لما اديك شويّة نور .. يخففوا عنك العتمه اللي انت فيها .

أقعدى يا غلبانه .

أم رتيبه — ياخويه اعتقنى شويه لوجه الله .. كفايه

بقى قلبت دماغى باللث والمعجن اللى كل يوم تصدعنى بيه ..

أنا مش عايزه نورك ده .. أنا مبسوطه كده من العتمه اللى

أنا فيها .

عبد الصبور — طبعاً ، طبعاً .. زى كل جاهل ، واخوا

الجهالة فى الشقاوة ينعم ، لكن أنا لازم أنورك غصب

عنك ، أنا مسئول عن إخراجك من الشقاوه اللى انتى

بترتعى فيها ، دا واجب على .. أنا لازم أعلمك كل حاجه
عشان حاجتلك فى وقت الزنقه ، من سوء البخت ، إنك
أقرب الناس لى ، ولا فيش حد حاعتمد عليه فى المهمه
الكبرى غيرك .. أقعدى .

أم رتيبه [تجلس متربته على سجاده صغيره على الارض] —
حلّ عنى شويه بقى .. مهمه كبرى إيه ياخويا وصغرى إيه .
عبد الصبور — بكره تعرفى ، بعدين تعرفى ، إنك
حاطكونى شريكه فى أكبر حدث فى التاريخ ، إنك حاتقوى
بدور ، مانتش قده ، ولا حملة ، لكن أعمل إيه مفيش
غيرك .. إنك حاتخدى فى التاريخ رغم أنفك حاتبقى عظيمه
غصبن عنك . يدى الخلق للى بلا ودان .

أم رتيبه — ياخويا اللى يفرّقه العويل يسفه .. أنا
لا عاوزه منك لالحلق ولا اسوره .. هو أنت من يوم
ماجبت لى الكردان الفالسو ، هان عليك تجيب لى حاجه
بعده ؟

عبد الصبور — كردان إيه ، وأسورة إيه ، يا وليّه
يا جاهله .. دا مثل ، دا مجاز .. أنا قصدى إنك حايقتى لك
شأن ، وانت بلا شأن . حاتبقى حاجه ، وانت مش حاجه .
حاتبقى عظيمه ، وانت تور الله فى برسيمه ، فهمت والا لا ،

عشان كده أنا عايز أنورك شو به ، عايز أخليكي تور ،
لكن متتور شو به .. عايزك تفهمي حاجه عشان خاطر
تساعديني .

أم رتبه — أساعدك في إيه بس ياخويا يا عبد الصبور؟
عبد الصبور — بعدين تفهمي .. بعدين حاتعرفي كل
حاجه .

أم رتبه — أنا ورايا شغل .. لازم أشوفه عشان
فيه ناس ضيوف جاين لك دلوقت .. وانت لازم
تقوم تلبس عشان تستقبلهم .

عبد الصبور — ضيوف؟ ضيوف مين؟
أم رتبه — جارنا سي سيد افندي .. الست أم سيد
قالت لي إنه حايجي يزورك .

عبد الصبور — عشان إيه ، عايز مني إيه؟
أم رتبه — أنا عارفه .. وهي الناس بيزوروا بعض
عشان إيه ، يمكن عايز يا تنس بيك .

عبد الصبور — أنا مش عاوز حد يا تنس بيّه ، أنا كده
كويس .. مئتنس بنفسي .. أنا بحب نفسي .. أكثر من أي
حد تاني .. خلاص .. مش عايز أقابل حد .

أم رتبه — والضيف اللي جاى ده نظرده ؟ مفيش

داعى ياخويا للحاجات دى ، أهو قابله برضك واقعد معا
شويه ، واجبر بخاطره .

عبد الصبور — ع العموم .. مش وقته دلوقت ، المهم
إنى اقرا لك دلوقت بقية الباب الرابع .. وبعدين يبقى يحلها
ربنا .. دلوقت اسمعى كويس ، وخلي مخك معايا .. إحنا كنا
بنقرا فى باب « أشباح الأحياء » .. ووقفنا لغاية « البحث
النفسانى » .

أم رتيه — حاضر ياخويا ، سامعك كويس قوى ..
اقرا فى عفاريت الأحياء .

عبد الصبور [يمسك كتاب ويأخذ فى القراءة .. وأم رتيه تنمس
أثناء القراءة] : « ولا يجب أن ننسى ، من جهة أخرى ، أن
المكان هو الذى يوجد التقسيمات الواضحة .. فأجسامنا
خارجية بعضها عن بعض فى المكان ، ونفوسنا من حيث هى
مرتبطة بهذه الأجسام ، تفصلها بعضها عن بعض مسافات
ولكن إذا لم تكن النفوس ملتحمة بالجسد إلا فى جزء منها
كان من الممكن أن نعتبر أن يكون ثمت تداخل متبادل فيما
عدا ذلك الجزء ، وكان الممكن أن يتم بين النفوس المختلفة
تبادلات شبيهة بظواهرات التداخل ، وإذا صح وجود هذا
التواصل كان لا بد أن الطبيعة قد اتخذت الاحتياطات التى

تحول دون ضرره ، ولعل هذا هو موضوع : « البحث
النفساني » لعل الرؤى الصادقة تتم على هذا النحو وكذلك
تظهر « أشباح الأحياء » . فاهمه يا أم رتيبه ؟
أم رتيبه [مستيقظه] — أبدأ ، مش فاهمه حاجه أبدأ .
عبد الصبور — ولا أنا .. على العموم الفهم مش مهم ،
الكتب دى معموله مخصوص عشان ما تتفهمش ، دا تلاقى
اللى كاتبها نفسه ، مش فاهمها ، فيه ناس اختصاصيين فى
الكتابة اللى ما تتفهمش .

[تدخل سنيه حامله قروانه نحاس وايريق ملىء بالماء الساخن]
سنيه — كلهى ياست .. ست أم سيد عايزاك من الشباك
[أم رتيبه تنهض]

عبد الصبور [باصرار] — خليكى قاعده لما أكل لك
الفصل .

أم رتيبه [نهزول خارجه] — هوّا إيه أصله ده .. هوّا
حكم قراقوش .. الوليه واقفه ع الشباك .. دا حتى
ما يصحش .

عبد الصبور [يضع الكتاب جانبا] — طيب بس ماتعيش
كله ورد غطاها .. أصل أنا عارفك وليه رغايه كثير ..
اللى انشال من سخك انحط فى لسانك .



[عبد الصبور يقرأ لأم رتيبه]

تسلسل.

[برقع عبد الصبور طرف جلبابه ، ويشمر سرواله ويضع ساقيه

في القروان]

المشهد السادس



[عبد الصبور — سنيه]

عبد الصبور — ياللا ادلقى .

سنيه — دى نار ياسيدى .. لما تبرد شويه .

عبد الصبور — مش مهم النار .. أنا أحب النار اللي

في الأرض .

سنيه — ليه بس ياسيدى ؟ . بعد الشر .

عبد الصبور — ما بعدش ولا حاجه .. لو مادقناش

النار في الأرض حاندقها في السما ، . بنى آدم لازم يدوق

النار .. يانار الحرمان في الأرض .. يانار العذاب في

السما .. ربنا قال كده ياسنيه .. حانعمل إيه ؟ أهو الواحد

منا قدّامه خمره ونسوان وفرفشه في الأرض .. وخمره

ونسوان وفرفشه في السما .. يياخذ اللي في الأرض ..

ياياخذ اللي في السما .. فيه ناس بينسرعوا على اللي في

الأرض وينسوا اللي في السما .

سنيه — وانت ياسيدى ؟

عبد الصبور — أنا معشَّم نفسي باللى فى السما .. أصل
العمر فى الأرض قصير يا سنيه .. دى فركة كعب ..
النهارده بنتولد وبكره بنموت .. أنا فاكر نفسي امبارح
لسه فى اللغه .. واتى يا سنيه .. ناويه تفرشى فى الأرض
والا فى السما؟

سنيه [تضحك] — هىء هىء .. فى الأرض ياسيدى ..
السما بعيده قوى .. وماحدث عارف إيه اللى فيها .. بعيده
بعيده .. واللى قبلنا ماحدث عرف مصيرهم إيه .. ييفرشوا
فى السما حقيقى والا بيدوبوا فى التراب .

عبد الصبور — الجسد هوّا اللى بيدوب فى التراب ..
لكن الروح بتنطلق حره .. طليقه زى النسمة الساريه .
سنيه — مين يعرف أهو كلام بيقولوه .. حد راح
هناك وقال لك؟

عبد الصبور — أهى دى المشكله .. دى الحاجه اللى
تبدد الإيمان .. البنى آدم عايز حاجه ملبوسه قدامه .. دى
العقده اللى عايز أحلها .. دى المسأله المستعصيه اللى انا عايز
أوصل لها .. أنا لازم أعملها .

سنيه — تعمل إيه ياسيدى بعد الشر؟
عبد الصبور — مش وقته ، بكره تعرفوا .. بكره

حامل لك المعجزه الكبرى .. بكره حاحكى لكم على
العالم الواسع المجهول ، واكشف لكم خبايا الظلمات المحيطه
بأجسادكم الفانيه .. ماعلينا .. مش وقته ده .. حطى كمان
شويه ميه .. فين علبه النشوق .. أنا مش قلت لك دائماً
حطها لى على الترايزه جنبي .
سنيه — والنبي ياسيدى كنت حطّاها مطرحها ..
يمكن حد شالها فى الدولار .

[تذهب لاحضار علبه النشوق من الدولار]

عبد الصبور — مافيش غير زينهم .. هوّا مافيش غيره
اللى بيدعبس فى حاجاتى .. هوّا اللى معكن على عيشتى ..
هوّا الخنيس الخبيث .

سنيه — والنبي زينهم مظلوم ياسيدى .. دا أمير وطيب
وابن حلال وقلبه أبيض ويحبك قوى .
عبد الصبور — لكن أنا ما حبوش .. منظره يلبش
جتنى ...

سنيه — والنبي ياسيدى دا دائماً يشكر فيك قوى ،
والنهار ده كان قاعد يقول إن هوّه مالوش حد غيرك ،
وكهنى فى موضوع وكنت عايزه استشيرك فيه .. حاكم
أنا مقدرش اعمل حاجه إلا لما آخدر أيك ياسيدى ..
أصل عقلك يعجبني أوى .

عبدالصبور — إيه هو الموضوع ده ؟

سنيه — أصل زينهم قالى ...

عبدالصبور [مقاطعاً] — قال لك إيه ؟

سنيه — قال لى إنه كان عايز ...

عبدالصبور [مقاطعاً فى دهش] — عايز إيه ماتنطقى ؟

سنيه — أنا أصلى مكسوفه أوى ياسيدى .

عبدالصبور — أنا مانا عارفه ماوراهش غير الكسوف

والسفاله وقلة الحيا .

سنيه — أبدأ ياسيدى المره دى ماقلش حاجه فيها

سفاله ولا قلة حيا .. دا قالى إنه عايز يتجوزنى على سنة الله

ورسوله .

عبد الصبور [متنفضاً من الغضب] — يتجوزك ؟؟!

الهفيه .. ابن الهفيه .. الضايح ابن الضايح ، والله عال ياسى

زينهم . بقيت بنى آدم وعايز تتجوز ، والنبي لاقطع دابرك

وابطلك تجيب السيره دى .. تتجوز .. ياخى جاك جنازه

حره .. يا مقطوع ، يا لمسام السبارس ، يا عرة العرر ..

مابقاش الا سى زينهم كان اللى يجيب سيرة الجواز فى

البيت ده . أهو ده اللى كان ناقص .. لكن معلش أنا

برضك استاهل اللى خليته يشم نفسه ، ويفتكر نفسه راجل .

لو كنت خلّيته زى ما كان دایر بشر شین الجزر وعودین
الملاّنه وعرقین الحلبه الخضرا . ما كانش اتفرعن وقال
اتجوز .

سنیه — یوه یا سیدی هدی نفسک هدی .. مانعکرش
دمک کده .. دا عشره زى زینهم فى صفر رجلیک .. خدک
تنشيقه وصلى على النبی .

عبد الصبور [يتناول تنشيقه ويمطس] — سى زینهم عایز
یتجوز .. الاقرع النزهی عایز یتجوز؟ . یاخی ینسم ..
وانتی قلتى له إيه؟ . مانفتیش فى وشه؟ . مارقعتهش صرمتین
على نافوخه؟ . مابلغیتیش القسم؟

سنیه — یوه یا سیدی .. لیه بس دا کله .. هوّا کفر ،
أنا قلت له سینى لما افکر ، وقلت لنفسى یابت استشیری
سیدک عبد الصبور ، راجل صاحب شوره وکله عقل .

عبد الصبور — هى دى عایزه شوره؟ هوّا الجواز ده
عایز شوره ، هوّا فيه حاجه جایه المصایب والمتاع
لخلق الله أجمعین غیر الجواز .. صحیح النبی قال ، تناکحوا
تناسلوا ، فإنی مباه بکم الامم یوم القیامة ، ولكن مش عشان
سى زینهم یتجوز والا الوحش والا زکیه الملدنه .. هم دول
حد یتباهی بیهم؟

سنيه — ليه بس كده ياسيدى .. ناقصين رجل
والا ناقصين عين . ماكل الخلق كده وحشين زينا . مافيش
حد أحسن من حد .

عبد الصبور — أبدا .. إحنا أوحش كثير من
بقية الخلق .. يعنى لو بقية الخلق فيهم خمسة فى المايه
وحاشه ، إحنا كده بالقليل خالص ، عندنا خمسة وتسعين
وحاشه .. ثم نفرض ان احنا وحشين زى بقية الخلق ، ليه
نتكاثرو و نتناسل ونعمل عقلنا بعقل بقية الخلق .. ليه نزود
الدنيا بلاوى .. كل المصايب جايه من الجواز .
سنيه — ياسيدى دا نص الدين .

عبد الصبور — نص أنهى دين ؟ الدين إالى نسيناه ؟ الدين
إلى مش موجود ؟ . يعنى نص المفيش .. يعنى مفيش .
إسمعى ياسنيه .. إنت زى بنتى ، ولازم أرسىكى .. إنت
زى كل النسوان قللات العقل ، إتم معذورين لأن ربنا خلقكم
كده من غير عقل ، لأن مفيش حاجه بتعملوها عايزه عقل .
إسمعى نصيحتى .. أنا راجل عندى عقل ، شوفى .. أنا
حاشرح لك حالتك قبل الجواز وبعد الجواز حاجيها لك
على بلاطه ... إنت دلوقت بنت شايفه كيفك ، فرحانه
بروحك ، خفيفه لطيفه ، شمه نفسك ، راسك لفوق ، صدرك

لقدام ، بطنك لجوّه ، مفيش عليكى حمل ولا عبء ، بعد
الجواز حاتبقى إيه ؟ . نَفْسِكَ اللى كنت شماه حايقطع ،
حاتبقى وليه غلبانه كحيانه ، صدرك لتحت ، بطنك لقدام ،
شايه فيها أول حمل ثقيل بارك على نفسك ، وهادد حيلك ،
وميل حالك . . . وبعدين تخلفي . . . يعنى تشيلي الحمل اللى
فى بطنك تحطيه على كتفك . . . وصدرك اللى كان لفوق ،
حايبقى زى الكتينه ، تلفيه على صابعك ، وبعدين تفضلي
كده مالسكيش شغله غير تجيبي حمل تحطيه فى بطنك وبعدين
تنقلي الحمل من بطنك تحطيه على كتفك ، لا نوم تشوفى ،
ولا راحه تدوتى . . النهارده الولد عي . . النهارده عطس . .
النهارده كح . النهارده بيسنن . النهارده سهل . . النهارده
حصبه . النهارده سعال ديكى . . يالطيف ، يالطيف . . وبعد
داكله ، جوزك اللى كان بيجرى وراكى ، وييدوب فى
دباديب رجليكى ، يبقى طهقان منك وزهقان من خلقتك
وتبقى أى واحده من الشارع أجمل منك فى عينه الفارغه
اللى ما يملهاش غير التراب . . آدى ياستى الجواز . . آدى
الهاب ، اللى بتجرى وراه كل واحده ، مبسوطه منه ؟
سنيه — لكن ياسيدى دا واجب لازم نأديه ، إذا كان
كل واحد حايتهرب منه . . الدنيا تعمر ازاي . . والولاد
ييجو مينين ؟

عبد الصبور — يا ستى عنهم ما جم .. ما فيش داعى
بيجو أبدأ .

سنيه — ولما نموت احنا او الدنيا تخلص ؟

عبد الصبور — يا ستى تخلص .. يعنى فيها إيه غير
العذاب .. هوّا إحنا مش حاسين بالعذاب اللى فيها ، هوّا
مش احنا اللى قابلين (تعب كلها الحياه) .. هوّا مش احنا
اللى قابلين أن (هذا جناه أبى على) .. ليه نجنى على
أولادنا إذا كنا عارفين إن مجايهم فى الدنيا جنايه ؟

سنيه — لكن يعنى قصدك كده ، الدنيا تخلص ولا
بيقاش فيها ناس ؟

عبد الصبور — أيوه .. ما يبقاش فيها ناس .. ويبقى
هوّا يشوف له تصرفه فيها .

سنيه — هو مين ده ؟

عبد الصبور — ربنا .. اللى نظمها وخلقنا فيها ، خلانا
عرضه لعذابها ، وعذاب الآخره . ما فيش داعى يسيننا فيها
حيرانين ، لاحنا عارفين جينا منين ولارايحين فين ، وورّانا
الخير والشر ، وقال اختاروا بين الاتنين .. نختار ازاي
واجنا نفوسنا كلها سفاله وقلوبنا كلها شر ؟

سنيه — أستغفر الله العظيم .. من كل ذنب عظيم ..

إنت جراك إيه يا سيدى .. إنت ما كنتش كدا أبداً ؟
إنت طول عمرك مؤمن وموحد بالله !

عبد الصبور — هوأ أنا قلت مش مؤمن .. أنا بس
حيران .. قلقان .. فيه حاجات كتيره عايز أعرفها ومش
عارفها .. أنا مش فاهم ؟
سنيه — مش فاهم إيه ؟

عبد الصبور — مش فاهم الحاجات اللي انت مابتحاوليش
تفهمها .. وعشان كده إنت مستريحه ومبسوطه .. أصل
الحاجات دى مش عايزه فهم .. دى عايزه جهل .. أو
تجاهل .. عايزه الواحد ياخذها كده عميانى .. يؤمن بها
بقلمه مش بذهنه .

سنيه — والله ماأنا فاهمه حاجه م اللي بتقوله ؟
عبد الصبور — أحسن .. أحسن كتير .. على العموم
سيدك م الكلام ده كله .. المهم عندى إنك ماتتجوزيش ..
وخصوصاً .. زينهم الكلب .. الخسيس الخبيث .. السافل
المنحط .. بوز الإخص .

[بدخل زينهم مصفقاً بيديه طربا من باب حجرة الجلوس منشداً]
زينهم — يا تلميت مرجه وسلامات ياخلى ، باللى
تكيد العوازل وانت داخلى .

عبد الصبور — يا باى .. يالطيف برضك داخلى
عريان ؟

زينهم — لاعريان ولا مكسى .. اللى مش عاجبه وشى
يغمض .. الوش الورق الست حطت فيه الملح .. ومع
كل .. أنا حاقل الباب اللى بينى وبينك .. عدم المؤاخذه
أصل فيه ضيوف جاين .. والست بتقول لك كفاياك بقى نقع
رجلين .. دول لو كانوا حجر كان باشوا .. قوم اتفضل
قابل الضيوف [يفتق الباب الزجاجى]

عبد الصبور [من وراء الباب] — مابا قابلش ضيوف ..
أنا مش فاضى للحاجات الأرضيه دى .. أنا مشغول فى
حاجات أكبر .

زينهم — الله يكون فى عونك .. الحقيقه مشغول قوى
بتتعب خالص من قروانة الميه السخنه ، وعلبة النشوق .

[يسمع طرق على الباب الخارجى وصوت سيد افندى من الخارج]
سيد افندى [يتجنح] — ياساتر .

أم رتيديه [من بعيد] — يا واد يا زينهم .. شوف مين
على الباب .

زينهم [لنفسه] — يعنى حايكون مين غير عريس هنا
[بصوت عالي] اتفضل .

[يدخل سيد افندى منتفخا وهو مستمر فى قوله ياساتر]

المشهد السابع



[زينهم — سيد افندى]

زينهم — ياساتر على إيه . خش ياسيد افندى خش ..
دا البيت بيتك .. أهلا وسهلا .. دا حنا زارنا النبي [لنفسه]
ماله كده نافش زى الديك الرومى .

سيد [يجلس] — أمال سى عبد الصبور أفندى فين ؟
[تسمع عطسة عالية من عبد الصبور]
زينهم [مشيراً الى اتجاه العطسة] — أهو .. هوّه بعينه
سى عبد الصبور .. دى البشاير بتاعته .. أهلا وسهلا ..
أشرفت الأنوار .. أجيب لحضرتك إيه . قهوه مضبوط ؟
سيد — لا .

زينهم — سكر زياده ؟

سيد — لا .

زينهم — ساده توزن دماغك ؟

سيد — برضه لا .

زينهم — كازوزه ؟

سید — لا .

زینہم — کرکدیه ؟

سید — لا .

زینہم — شای . قرفہ . ینسون . کراویہ . حلبہ ؟

سید — لا . لا . لا . لا . لا .

زینہم — أجیب لك لقمه بجنبه ؟

سید — متغدی .

زینہم — ماہو لازم أجیب لك حاجه . لحسن الست

أم رتبه تدبجنى .

سید — إذا كان ولا بد .. هاتلى . [ويشير بأصبعه السبابة

والإبهام إشارة الى كوب]

زینہم — لا . لا . لا . دا سى عبد الصبور يخرب

بيتى . . دا ما يطقش الحاجات دى أبدأ ، دا عمره ما دخل

البيت نقطة ويسكى .

سید — ويسكى إيه يا بنى آدم .

زینہم — شمبانیا .. فرموت .. نيت .. زيبب .. أمال

يعنى قصدك إيه بـ [ويشير بيده نفس الإشارة] .

سید — شوية مية دقّه .. بس حاميه خالص . لحسن

كلت في الغدا شوية مفتقه عامله حرقان على قلبي وعائز
أضيعه ...

زينهم — عائز تضيع الحرقان بمية الدقه .

سيد — أيوه .

زينهم — الحرقان يضيع بمية الدقه ؟ حقه بطلوا ده
واسمعوا ده .

سيد — أيوه يا أخي .. أنا كده .. خلقتي كده .. معدتي
كده .. الحرقان ما يضيعش عندي إلا بمية الدقه .. على
طريقة المصل الواقى .. أو على طريقة وداوها بالتى كانت
هى الداء .

زينهم — حاضر .. عيني الاتنين ، وعائز مية الدقه
كده ساده والا جنبها حنتين خيار .. حنتين جزر ؟
سيد — لا . لا . كفايه قوى الميه ، أنا معدتي مليانه
خالص ...

زينهم — وفيها إيه . تهضم بالخيار واللفت .

سيد — مافيش لزوم .

[تصع عطسة من الداخل]

زينهم — فاضل كان عطسه ، ويهلّ علينا .. عن
إذنك .

[يسمع صوت أم رتيبه تنسدى على زينهم . فيخرج لها . . .]
وبنهن سيد افندى لمشاهدة الصور ويقف أمام صورة صبي وصبيه [
سيد [لنفسه] — ياسلام . . هيّ بعينها . النص الثاني ،
نص اللفته . نص الخياره . لازم دلوقت استوت ، وبقت
حاجه طعمه . . حاجه تتاكل . . ياسلام عليكي ياست ام
رتيه ، وعلى وقفنك الحلوه . . بس الوردہ اللي في إيدك
ما كانش لها لزوم ، لو كان بدالها حزمة جرجير . أو فجل .
حاجه كده تفتح النفس مش كانت بقت أفكہ ؟

[زينهم يمود وعليه سبأ الالتهام والعجله]

زينهم — سيد افندى . سيد افندى . فيه حاجه مهمه
خالص .

سيد — حاجه إيه ؟

زينهم — حاجه مهمه خالص . حاجه خطيره . حاجه
يتوقف عليها مستقبلك .

سيد — مستقبلي أنا ؟

زينهم — أيوه مستقبلك انت وهيّ .

سيد — هيّ مين ؟

زينهم — الست أم رتيبه .

سيد — آه . . مستقبلنا المشترك . . مستقبلنا الجميل . .

مستقبلنا المنتظر ، مش تقول كده ياغبى عشان أفهم .
زينهم — معلش ، عدم المؤاخذه . ما كنتش عارف
انك واقع بالشكل ده .

سيد — إيه هي الحاجه المهمه دى . قول . انطق !

زينهم — الست عاوزه تطمن .

سيد — على إيه ؟

زينهم — على إسمك .. إسم الله عليك ، اسم النبي
حارسك .

سيد — ماله اسمى .. عايزه تطمن عليه ليه .. هو آ كان
وقع اتكسر ، والا قالوا لك اتشرخ منه حرف ..
ولا انصاب بشده ، والا همزه .. ماله إسمى .

زينهم — طب بس وطى صوتك لحسن سى عبد الصبور
يسمك .. الست أم رتيه كانت وصت الست والدتك
خالتي أم سيد .. انها تقول لك عشان تغير اسمك ..
أصل سى عبد الصبور ده دماغه ترلى ، وبعض ساعات له
تلاكيك على حاجات فارغه ، فهي خافت لا ما يعجبوش
اسم السيد بنجر .. يقوم بتلكك عليه ، والحكايه كلها تبوظ
من تحت راس حاجه لا راحت ولا جت . حقيق السيد بنجر

بيني وبينك — إسم مش حاجه .. لكن فيها إيه يعنى ياما فيه أسامى أبوخ من كده ، فقالت من باب الاستحراس تغير اسمك عشان مانديلوش فرصه يحرن فيها ، ويقول كافي وماني . وهى باعتاني دلوقت عايزه تطمن غيرت الإسم والا لا ؟

سيد — وهو أنا أقدر أخالفها فى طلب ؟ . أنا أرفض لها حاجه ؟ آل إسم آل .. ميت إسم فى ضفرها .. ست رتبتب الحلوه .

زينهم — يعنى غيرته ؟

سيد — طبعاً ودى عايزه كلام .. امبارح ماكانش لى شغله غير كده ، طول اليوم فى المحكمه الشرعيه . لعمل الترتيبات اللازمه .

زينهم — الحمد لله .. الله يطمئنك .. لا والله شهم وذو همه ، أهو كده الخطأ والابلاش .. عن إذتك بقى أما أروح أطمئن الست .. لحسن دى قلقانه أوى .

سيد — روح طمنها خليها تحط فى بطنها بطيخه صيفى . قول لها إن السيد بنجر ، اللى قعد طول عمره السيد بنجر ، وبقاله خمسه وأربعين سنه .. الناس يقولوا له سيد بنجر خلاص ما بقاش سيد بنجر .

زينهم — أمان بقى إيه؟

سيد — بقى .. على بنجر .

زينهم [صانحاً فدمش] — على .. إيه ؟ ۱۱؟

سيد — على بنجر .. فيها إيه .. مالك بتصرخ كده

زى ما تكون قرصتك حيه؟

زينهم — على بنجر ۱۱؟

سيد — أيوه .. كنت سيد بنجر .. وبقيت على بنجر ..

فيها إيه ؟ عجيبه ۱۱؟

زينهم — لا .. ولا حاجة !

سيد — أمان مالك كده بتبخلق فيّه؟

زينهم — وانا مالى ياعم حاجلق فيك وتبخلق فى ..

أنا أروح أقول لصاحبة الشأن .. وذنبا على جنبها ..

لو وقعت من طولها والاصابها حاجة أنا مش مسؤول !

سيد — وقعت من طولها والاصابها حاجة؟ إيه الكلام

اللى زى السم ده .. عشان إيه دا كله؟ قلنا سيد وحش .

كخه .. كان على مش حايعجب .. أمان يعنى كنت أخليه

إيه؟ زنوبه؟ زنوبه بنجر؟ كان يعجب كده؟

زينهم — يا أستاذ المسألة مش مسألة محمد ولا سيد

ولا زنوبه ولا خدوجه .

سيد — أمال مسألة إيه ؟

زينهم — مسألة بنجر .. بنجر .. ياسى على بنجر .

سيد — بنجر ؟

زينهم — أيوه بنجر !؟

سيد — ماله بنجر ؟ . فيه أحلى ولا أغلى ولا أطعم من
البنجر .. أنا أغير بنجر .. ليه ؟ مجنون ؟ حد فى الدنيا بيق
اسمه بنجر ويغيره .. إانت عارف طبق البنجر يقف بكام ؟
زينهم — إيه يعنى .. مش بالكثير قوى بقرش ابيض ؟
سيد — إخرص .. دا البنجر المغشوش .. دا اللفت
المصبوغ اللى بيبيعه على انه بنجر . لكن البنجر الأصى ..
زينهم [مقاطماً] — يا أستاذ إحنا مالنا ومال البنجر
الأصى والبنجر المغشوش .. إحنا عايزين عريس .. مش
سلطنة طرشى .. البنجر يمكن له قيمه وسط الطرشى ..
لكن وسط البنى آدمين .. حاجه تبقى ما لهاش معنى .

سيد — يعنى إيه .. مانيش فاهم .. يعنى كنت عايزين
أغير اسمى ، بدل سيد بنجر ، بيق سيد جزر ، سيد لفت ،
سيد جرجير ، سيد قشه ؟

زينهم — وهو يعنى الدنيا ضاقت بالأسامى . اشمعنى فضيلة
المخلل دى اللى انت ماسك فيها ، أصل ما فيش لزوم أبداً بيقى

بني آدم اسمه على أسماء أصناف المخلل ، دي حاجه ودي حاجه .
سيد — أمال يعني فيه لزوم علشان بني آدم يبقى اسمه
خشبه ، والا حمام ، والا اجل ، والا ظاظا ، والا الفار ،
كل دي يعني حاجات لها لزوم ، والا لها علاقة بالبني آدمين ؟
على الأقل البنجر حاجه لها قيمه في عالم الحلو ، وعالم الحادق .
إنت ماتعرفش إن البنجر يبقى

زينهم — [مقاطعاً] يبقى والا مايقاش .. أنا مالي ..
ذنبك على جنبك .. خليك بنجر بنجر .. إبقى قول لسي
عبد الصبور إن اسمك بنجر .

سيد — يعني يعمل فيّه إيه ؟

زينهم — ولا حاجه .. بالقليل خالص .. حايثف
في وشك .

سيد — إيه الكلام البارد ده .. اللي يسم البدن ..
هوّه ماله إذا كان اسمي بنجر والا عفريت ازرق ؟
زينهم — أدبني قلت لك بقي .. خليك على كيفك ..
الظاهر إن دماغك ناشفه قوى .

سيد — على العموم إحنا فيها .. خلاص إذا كان مش
عايز بنجر .. مش ضروري بنجر .. مادام مالوش

فی الطیب نصیب .. حاتمعل له إیه .. خلینا کده سید
حاف .. والا سید علی .. والا سید قشطه .. والا سید
أی حاجه .. کده کویس ؟

زینهم — تعجینی .. أهو کده بقیت راجل عاقل ..
بناقص البنجر ده .. اللی تغلبه إلبه .. بس فیہ حاجه تانیه
عایز أوصیک علیها .. علشان الشغلانہ ماتبوطش وتطلع
فشوش .. الراجل سی عبدالصبور زی ماقلت لك بنغزه ..
نخده علی هو اه .. وطاوعه أوی .. إوعی تقول حاجه کده
والاکده .. تلبشه وتفور دمه .

سید — یعنی إیه حاجه کده والا کده ؟ مانیش فاهم ؟
زینهم — یعنی مثلاً هوّه ما یحبش الکرنب المحشی ..
فمتجیبش سیرته قدامه .. وإذا جت سیرته إعمل إنک
ماقدرش تدوقه علی لسانک .

سید — لکن أنا بجم الکرنب المحشی خالص .
زینهم — یاأخی معلش .. استحمل .. إبقى حبه بره
لکن قدامه إعمل انک ماتحبوش .

سید — بسیطه .. حاجه مش صعب .. وإیه کان
سی عبدالصبور ما یحبوش ؟
زینهم — ترمای نمره ۵۰ .

سید — ترمای نمره ۵؟. إيه المناسبه؟ يكره الكرنب
المحشى معقول، كل واحد وكيفه، أنا مثلاً ما حبش السباخ
ولا احبش التقلية على البصاره، لكن ترمای نمره ۵ ده .. إيه
العلاقه بينه وبين سى عبد الصبور؟ يحبه ليه ويكرهه ليه؟ هوأ
داقه؟ قطع حته من السلم مثلاً لقاها متقله، والا داق السنجه
لقاها دلعه؟ .

زينهم — سلم إيه اللى لقاها متقل، وسنجه إيه اللى لقاها
دلعه، فيه حد ياكل ترمای؟

سید — يمكن، ما هو سى عبد الصبور بتاعك ده
ما يستبعدش عليه حاجه أبدأ.

زينهم — لا مش للدرجه دى .

سید — أمال إيه المناسبه، إنه يكره ترمای نمره ۵
بالذات؟

زينهم — مافيش استلطاف .. العلاقه بينهم وبين بعض
سيئه، أصل سيدى عبد الصبور دائماً يحب يركب الترمای
من غير مؤاخذه، سفلقه، طول عمره بارع، فى التزويغ
من الكمساريه، يفضل سنين وايام، يتنقل من ترمای ۱۰
ل ۲۲ ل ۳، مافيش حد يقول له إنت فين، هوأ يحط رجله

في نمره ه والكمسارى والمفتش يكبسوا على أنفاسه ، عشان
كده مايجبش حد يجيب سيرة الترمای نمره ه أبدأ .

سيد — لامعذور ، وإيه كان مايجبوش سى عبدالصبور
فيه حاجه تانيه العلاقة بينه وبينها متوتره أو مقطوعه ، غير
الكرنب المحشى وترمای نمره ه ؟

زينهم — راس العبد .

سيد — برضك بينها وبين سيدك عدم استلطاف ؟
زينهم — لا ، دى بقى عداوه مستحكه ، حرب دايمه ،
خصومه مخيفه .

سيد — وعلشان إيه ؟ ، وبمناسبة إيه ؟ ، يعادى سى
عبد الصبور افندى راس العبد ، ويعمل عقله بعقلها ؟
زينهم — الحقيقه ، فى الحكايه دى ، هوّه مش غلطان ،
هى السبب .

سيد — إزاي بقى ياسى زينهم ؟
زينهم — هى دايماً المعتديه ، كل ما يكون رايح كده ،
والا جاي كده . . تروح متزحلقه من على الأرض وواقعه
على نافوخه .

سيد — طيب ياأخى مايعمل معاها معاهدة عدم اعتداء .
زينهم — عمل .

سيد - والنتيجة؟

زينهم - زى كل معاهدة عدم اعتداء ، بعد المعاهده

على طول راحت واقعه على نافوخه مسيحه دمه .

سيد - يستاهل . . فين هي راس العبد دى عشان

أبوسها من هنا ومن هنا . . دى مش راس عبد ، دى راس

منصر ، اللي قدرت تعمل فى سى عبد الصبور كده . . وفيه

إيه كان ما يجبوش سى عبد الصبور غير الكرنب المحشى

وترماى نمره ه وراس العبد ؟

زينهم - العدس اللي من غير جبه .

سيد - وابو جبه ؟

زينهم - يجبه .

سيد - وإيه كان خصوم سيدك عبد الصبور . . قلمهم

مره واحده وخلصنا .

زينهم - زكيه الملدنه ، وسنيه القرعه ، وابو على الأحول

والكسبه ، والزيت الحار ، وابو قردان ، والسملك البكلاه

وبراغيت الست ، وعبد الحليم القرد ، والكرات ابو شوشه

والسجق اللي من غير فلفل .

سيد - وأبو فلفل ؟

زينهم - يموت فيه ، والكسبريه ، وحشيش الأرانب .

سید - وغیر الارانب ؟

زینہم - يتعاطاه أحياناً ، والمنجه ، والفيل أبو زلومه ،
واللبان الذكر ، والحلاوه السمسيمه .

سید - ديهده .. ديهده .. دا ماله عامل زى الحكومه
المصريه .. مخاصم طوب الأرض .

زینہم - والرز أبو شعريه ، وسكارش بتاع الجاز ،
وقسم السيده .. و ..

سید [مقاطعا] - طيب .. بس ، وانا حاجيب دماغ
منين احفض كل الخصوم دول .. أنا أحسن طريقه أقعد
ساكت مافتحش بقی لا بطيب ولا بردى .

زینہم - ماينفعش .

سید - ليه بقی ؟

زینہم - ينام منك .

سید - ينام منى ازای ؟

زینہم - أيوه ينام منك .. لوسيته شويه كده من غير
كلام .. تلاقية فقر ونام .. ولو نام منك يا حظ ، لازم تفضل
متسمر فى مطر حك .. لاحس ولا حركه .. لحسن تقلقه .
سید - أفضل قاعد كده قدامه ؟

زينهم — لغاية ما يصحى من نفسه .
سيد — ودى مصيبة إيه دى اللي طَبَّلتْ على دماغى .
زينهم — أهو على أد ماتقدر ماتجيبش سيرة الحاجات
اللى قلتها لك .
سيد — على العموم .. بسيطه .. ما فتكرش إن حايبقى
فيه أى مناسبة لها .. يعنى مش شايف إن الواحد حايزنق
لها قوى .

زينهم — وفيه حاجة تانيه .
سيد — حاجة إيه كان ؟
زينهم — شكك ، وقيافتك .. ورينى كَسْمَكْ .. إعدل
الكرافته شويه .. والطربوش مِئِلَهْ لَقَدَّامْ شويه .. أصل
هواً دقيق قوى فى حكاية الملابس دى .. دايمًا يحب القيافه
والحفظله .

[تسمع عطسة من داخل حجرة النوم فيقفز زينهم من محله ويفتح الباب
الزجاجى ويدخل عبد الصبور وقد شمر الجلباب ووضع ذبانه فى عبه وشمر
أرجل السروال ولبس القبةاب ذو الجلاجل والطرطور وحمل فى بده كتابا
ضخما وفى الأخرى علبة النشوق ووراءه سنيه تحمل القروانه بالماء
الساخن]

المشهد الثامن



[عبد الصبور — سيد — سنيه]

سيد [لنفسه] — الحقيقه باين عليه يحب القيافه قوی .
 عبد الصبور [يصرخ في زينهم] — يا لطيف ، يا مغيث ..
 برضه واقف بوشك عريان .. أخرج بره يا خسيس .. دم
 لما يلفك .. دم لما يلحس بك قعره .. عايز أتجوز !! آدی
 اللي انت فالخ فيه .. تتجوز بوشك العكر ده .. تودی
 نفسك من ربنا فين ؟ .. يا حيوان يا حلوف [يخرج زينهم
 ويبدو كأن القول موجه الى سيد افندي فيزداد خجله وارتابه]
 آل يتجوز آل .. ياخي جاك جنازه .. جاك مصيبه ..
 جاك وكسه .. جاك نيله حزم .

سيد [لنفسه] — لا .. دی مش حاله دی .
 عبد الصبور — آل جواز آل .. هي الدنيا ناقصه
 مصايب [يلتفت الى سيد] . وانت إيه ؟
 سنيه — دا الضيف ياسيدي .. جارنا سي السيد افندي

بنجر ...

سيد — ما بنجرش ولا حاجه .. بنجر ما فيش ..
خلاص راح ، عليه العوض .

عبد الصبور [باشمزاز] — بنجر .. انت بنجر . اسمك
بنجر ؟ بنى آدم اسمه بنجر ؟ . أمال البنجر الحقيقى يسموه
إيه .. على ؟ . والخيار يسموه محمد ؟

سيد — قلنا مش بنجر .. أنا مش بنجر .. ياسيدنا
أنا سيد ، سيد بس ، سيد حاف ، متبرى من البنجر .
عبد الصبور — وتبرى منه ليه .. بينك وبينه إيه ؟
سيد — علاقات مش ولا بد .. من نوع العلاقات
الى بينك وبين الكرنب المحشى والترماى نمره ه ، وراس
العبد ، ما فيش استلطاف أبدأ كده لله فى لله .
[يجلس عبد الصبور وتضع سنيه الفروانه أمامه ويضع قدميه فى الماء
وتأخذ سنيه فى تدليكهما] .

عبد الصبور — اقعد ياسى سيد افندى . ياعدو البنجر .
اقعد ، اتفضل [يمد يده بعلبة النشوق] تاخذ تنشيقه ؟
سيد — متشكر ما بتعاطهوش .
عبد الصبور — علشان إيه ما بتعاطهوش ؟
سيد — والله ما جرّ بتوش .
عبد الصبور — وليه ما تجرّ بوش ؟ يخس عليك إيه ،

مش يمكن تلاقيه كويس وتقعّد نادم على العمر اللي ضيعته
دا كله من غير نشوق ؟
سيد - والله ما افتكر شي .

عبد الصبور [بفضب] - يعني إيه ما تفتكرش ؟ انت
باين عليك مقاوح ؟
سيد [يستدرّك نادماً] - أبدأ أبدأ ، أنا بس مناخيري
تعبانه شويه ؟

عبد الصبور - أهو دا اللي يسلكها لك ويفوقك
ويجلى راسك . . أهو دا الحاجه الوحيده اللي تعدلك ،
كان لازم انت تقول لي هات تنشيته ، انت مش صغير
عشان أوريك مصلحة نفسك ، وأنا مش ولي أمرك . .
إنت راجل كبير .

سيد - ما فيش لزوم للزعل . . أنا غلطان ، هات
تنشيته ياسي عبد الصبور . . هات .

عبد الصبور [بنظر الى العلبه فاحصاً وقلب شفته السفلى] -
مفيش ، متأسف . اللي فاضل يدوبك تنشيتين ليه . طلبك
متأخر ، ماللكش في الطيب نصيب .

سيد - معلش ، معلش ، حصل خير . [بصوت منخفقض]
ربنا ستر .

عبد الصبور [بميد النظر في العلبه] — والا أقول لك .. تقدر
 تاخذ لك تشيقه . بس صغيره ، ماتكترش ، خدى ياسنيه
 ودّى له العلبه .

[سيد افندي يتناول العلبه خائفاً وبأخذ تشيقه فتصبيه نوبه
 عطس مزعجه] .

عبد الصبور — عضمك طرى .. لسه بدرى عليك ،
 دى حاجه عايزه تمرين .. مش كل واحد يقدر عليها .

المشهد التاسع



[عبد الصبور — سيد — سنيه — زينهم]

[يدخل زينهم وهو مرتدباً الوجه وحاملاً بين يديه صينية
 عليها كوبتين بهما مشروب أحمر اللون ويتقدم الى سيد افندي]
 سيد [مندهشاً ومذعوراً] — إيه ده بسم الله الرحمن الرحيم ،
 انت إنس والا جن ؟

زينهم — لا إنس ولا جن .. أنا زينهم .. انفضل
 اشرب ...

سيد [مستغرق في الضحك] — زينهم ، ومالك عامل

كده ليه في نفسك ؟ ياسلام يازينهم . . دا انت بقيت
زينهم حقيقي ، أهو كده الجمال .

زينهم — إشرب ياسيدافندي . اشرب بلاش نقوره .

[يشرب سيد افندي الكوب مستتما مستطما ويمس شفتيه في لذة]

سيد — ياسلام . حاجه حلوه . بديعه .

[يتقدم زينهم بالكوب الآخر الى عبدالصبور فيأخذه ويرفمه اليه

ولا يكاد يتناول منه رشفة حتى يقفز من مكانه ملسوعا وهو يتأوه وينفخ]

عبدالصبور — إيه ده ؟ دي مية نار ؟ !!

زينهم — لا . . دي مية دقه .

عبدالصبور — مية إيه ؟

زينهم — دقه .

عبدالصبور — دقه ؟

زينهم — أيوه مية دقه . عمرك ماسمعت على مية الدقه .

عبدالصبور — وإيه اللي يخليك تقدم مية الدقه

للضيوف . يا حلوف ، يا ابن الحلوف . . اتجنيت .

زينهم — اتجنيت ليه ، وأنا مالي . أنا عبد مأمور . .

يقولوا لي هات مية دقه ، أجيب مية دقه . هات سم هاري

أجيب سم هاري ، أنا مالي .

عبدالصبور — سم لماهرى جوفك . أنا لازم أشوف
قصدك إيه ، أنا لازم أكشف نواياك الإجرامية . أنا لازم
أوديك فى داهيه ، مين الحيوان اللى أمرك تحرق جوفنا
بِمِيَّةِ الدَّقَّةِ ؟

زينهم — الحيوان اللى بتسأل عنه قاعد جنبك لزق .
هو سيد افندى .. هو الضيف بتاعك .

عبدالصبور — هو اللى طلب منك مِيَّةِ الدَّقَّةِ [الى سيد]
انت اللى طلبت مية الدَّقَّةِ .. يا أخينا ؟

سيد — أيوه أنا .. أصل كان فيه حرقان على قلبي ،
وخلص راح ، والحمد لله .. الحقيقه نوع ممتاز .. نوع
اكسترا .

عبدالصبور — إيه هو اللى ممتاز ؟ وإيه هو اللى اكسترا ؟
النار الآيده دى .. فيها ممتاز وفيها اكسترا ؟. ليه ؟ هو انت
من زباين جهنم والامن صبيان إبليس ؟ وإذا كنت انت
عندك حرقان بتطفيه بِمِيَّةِ النار دى .. أنا ذنبى إيه ؟ . إسمع
وحياة والدك ياسى سيد افندى ، إذا كنت ناوى تيجى هنا
تانى ، وناوى تحس بحرقان على قلبك ، إبقى اشرب مية
اللهايب دى بره . مفهوم ؟

سید — علی العموم الحرقان دا ما بیجیلش کثیر .
عبد الصبور — کثیر والا قلیل ، المهم ترضعه قبل
ماتیجی . فاهم ؟

سید — حاضر .. من عنیه یاسی عبد الصبور ، ولا یكون
عندك فكر من نواحي مية الدقة ، مع انك لو أخذت عليها
مش حاتسلاها أبدأ ، زى النشوق تمام ، تروق المخ وتسلك
الزور .

عبد الصبور — إيه دا يا أخى الكلام الفارغ ده .
حد يقول مية الدقة زى النشوق ، دى دقة ودى دقة .
سید — أيوه برضك معاك حق . . إيش جاب دى
لدى ، أنا غلطان خالص ، غلطان قوى .
عبد الصبور — معلش حصل خير ، انت شرفتنا ياسى ..

سید [مقاطعا] — سید ، محسوبك سید .

عبد الصبور — سید إيه ؟

سید — اللي يعجبك ، اللي ييجى على مزاجك ، أناسا يها
مفتوحه .

عبد الصبور — يعنى إيه . مانيش فاهم ، السيد والدك
مالوش إسم ؟

سید — أبدأ . نزل كده ، من غير اسم . مارضیوش
یسموه ، لغایة ماتسمیه انت الاسم اللى یریحك !!
عبد الصبور — أنا أسمی أبوك؟ وهوّ أنا فاضی عشان
بسلاّمته أبوك یقعد لی خمسین سنه من غیر اسم . . ویبجی
دلوقت عشان أسمیه . . أنا فاضی للهیافات دی ؟ . أنا
ورایا حاجات کثیر أهم من كده .

سید — علی العموم . . ما تتعبش نفسک ، دی حاجه
مش مستجمله . . أنا کفایه علیّ سید بس . . سید حاف ،
أهی حاجه مأمونه وما منهاش ضرر . . واللى خلاه یقعد
خمسین سنه من غیر اسم . . یقعد . .

عبد الصبور [مقاطعاً] — طیب . . طیب . . فضنا
بقی من حکایة اسمک دی . . انت شرفتنا .
سید — الله یشرف مقدارک .

عبد الصبور — فیہ حاجه أقدر اعملهاک . عایز مشوره
فی علم الروح . . عایز تحضر جلیسة . . عایز . .
سید [مقاطعاً] — لا . لا . أبدأ . . کتر ألف خیرک .
أنا مش عایز حاجه من دی أبدأ . . أنا کنت عایز . أقول .
أقول . أصلی کنت عایز أقول . . .

عبدالصبور — تقول إيه ؟ اتفضل . قول وخلصني
ياسى سيد و حياة أبوك اللي ما يتساشى .

سيد — أنا أصلى كنت عايز أقول ، أنا طول عمري .
عائش كده عازب . ووحدانى ..

عبد الصبور [مقاطعاً فى حدة] — خير ما عملت ، عين
العقل . ربنا يديهما عليك نعمه .

سيد — لكن أنا شايف العمر ينفوت والحياه بتنقضى
والشيب ملاً راس الواحد ، والعجز دب فى مفاصله .

عبد الصبور — شىء لا بد منه وبكره كان تشيب أكثر
وتعجز أكثر ، الزمن بيدوب الحجر مش عايزه يدوب البنى
آدم ، لازم تشيب ، ولازم تعجز هى دى حاجه غريبه .
سيد — لأ مش غريبه ، بس الغريبه إن الواحد كده
يخرج من الدنيا ، صفر اليدين .

عبد الصبور — وهو آفيه واحد يا أخينا ما يخرجش
منها صفر اليدين ، الدنيا عامله زى البلد الموبومه ، وباب
الآخره زى باب الحجر الصحى ، لازم يجرّ دوك فيه من كل
حاجه ، لازم تخرج من الدنيا زى ما دخلت فيها ، صفر
اليدين والرجلين والراس والعينين ، ماتتاش شايلى معاك
غير ذنوبك ، دى الحاجه الوحده اللي ماتقدرش تسبها .

سيد — مفهوم ، مفهوم ، ياسى عبد الصبور ، لكن
الواحد برضه ، لازم يكمل نص دينه .

عبد الصبور — نص دين إيه ياخويه اللي طالعين لى
فيه ، هوا نص الدين مايكملش إلا بالجواز ؟ دالوكان عندك
نص دين ، الجواز حايطيره .. الجواز اللي انتو فاكرين انه
يكمل نص دين يضيع دين بحاله . . دا يكفر بلد ، إتم إيه ،
مغفلين ، مهايف ، ملاحيس ؟ ومع كلا ، أنا مالى أنا ومال
نص دينك ، تكمله ما تكملوش ، أنا ماليش دعوه ، دى
حاجات متخصصينش .

سيد — لأ ، من جهة الاختصاص ، مافيش حد مختص
غيرك ، إنت لوحدك جهة الاختصاص المسئولة عن تكلمة
دينى .

عبد الصبور — يعنى إيه ، مانيش فاهم ؟

سيد — يعنى نص دينى موجود عندك هنا ، معاك ،
إنت المتحكم فيه ، إنت الأمر الناهى فيه ، أرجوك رده لى ،
رد لى نص دينى ، ينوبك ثواب فى .
عبد الصبور — إنت إيه يا جدع أنت ؟ إنت مجنون ؟
اختصاصى إيه ؟ ودين إيه ؟ إحنا هنا مش مشيخة الأزهر ،
أرجوك قول لى قصدك إيه ؟

سید - قصدی آتجوز .

عبد الصبور - یامغیث یالطیف ، أنا اصطبحت بوش
مین النهارده ؟ کل ما أقابل حد یقول لی عاوز آتجوز ،
مافیش غیر زینهم الکلب ، هوا صبحنی بوشه ، اللی زی
القطران ، إسمع یاسی سید افندی ، أنا عايز أعرف ، إذا کان
انت بعد طول العمر اللی ضيعته فی هنا وراحه اتخبطت فی
راسک وعايز تتجوز ، تقدر تقول لی أنا ذنبی إيه تعکنن
مزاجی وتضیع وقی فی المسأله البایخه دی ، إنت عايز
تتجوز ، وانا مالی ؟

سید - اصلی عايز اتجوز .. اتجوز ..

عبد الصبور [فی حده] - تتجوز إيه .. انطق ؟ فلقنتی ؟

سید - عايز اتجوز . أم رتیبه .

عبد الصبور - بتقول إيه ؟ .. أم إيه ؟ .. إنت لازم
مجنون ؟ . أنا نظرتی ماتخيش أبداً . من ساعة ماشفتک
وشفت عینک المبحلقه وراسک المبططه ووشک المناویشی
قلت الراجل ده مجنون .

سید - لیه بس یاسی عبد الصبور ؟ مجنون لیه ؟ عشان
جی أخطب الست المصونه أختک ، عشان جای أتشرف

بقر بك . هما برضه الناس يعملوا في جيرانهم كده . دا النبي
وصا على سابع جار .

عبد الصبور - النبي حر يوصى زي ما هو عايز . .
على سابع جار . . على تامن جار . . إن شالله على عاشر
جار . . لكن أنا ما احبش الكلام في موضوع الجوازده
أبدأ ، خلاص . انتهىنا .

سيد - طيب بس حللك على . خد ودي معايا
شويه . . اسمع كلامي كله يمكن تقتنع .

عبد الصبور - ولزومه إيه ، وعشان إيه ؟ . إنت تبق
مين . علشان أضيع وقتي الثمين معاك في كلام مالوش فايده ؟
سيد - أيوه . . كده تعجبني . . قلت لي تبق مين ،
أنا محسوبك سيد . : باشخير في معمل شبرا .

عبد الصبور - باش إيه ؟

سيد - باشخير . . يعني كبير الخبراء .

عبد الصبور - طيب يا أخي مش تفهمني كده من
الصبح ، أنا فاعم إنك راجل . على أدك . فاعم إنك حمار ،
من ضمن الحمير اللي ماليا البلد ، ما عنديش أقل فكره عن
إنك راجل خير ، فني ، بتفهم . ياسلام . ليه تسبيني كده
على عمای یاسی سید ، یا باشخیر ، وحضرتك درست فين ؟

اكتسبت الخبره الفنيه بتاعتك دى منين؟ من أنهى جامعه؟
سيد - أنا مدرستش فى جامعات ، خبرتى موهبه
إلهيه ، من عند ربنا .

عبد الصبور - ما شاء الله . ما شاء الله ، يعنى خير
بالفطره ، يعنى عبقرى .؟
سيد - بالظبط .

عبد الصبور - يا سلام ، أنا من زمان وأنا عايز
أشوف واحد عبقرى ، أصل أنا كان عبقرى ، ودايمآ
العبقرى يحب العبقرى .

سيد - مضبوط ، مضبوط .

عبد الصبور - وحضرتك خير فى إيه؟

سيد - خير فى فى الذوق .

عبد الصبور - فى فى إيه؟

سيد - فى الذوق [ويخرج لسانه] - عندى لسان ،

مايخطيش أبداً ، ماينزلش الأرض .

عبد الصبور - وهوأ فيه لسان ينزل الأرض ياسى

سيد يا باشخير ، غير لسان الكلاب ، لكن أنا برضه مانيش
فاهم . حضرتك خير باللسان؟

سيد - مضبوط ، أدوق باللسان وحكى لايعلى عليه .

عبدالصبور — و حضرتك بتدوق إيه . إيه المواد الرفيعة
اللى بتحتاج لذوقك الحكيم ؟
سيد — كل الأصناف .

عبدالصبور — مانيش فاهم ، يعنى مثلاً بتدوق الشرابات
النيلون ، بتدوق الخرسانه المسلحه ؟
سيد — لا . لا . مختص بس فى صنف الحادق .
صنف المخلل .

عبدالصبور — يعنى حضرتك باشخير فنى فى الطرشى ؟
سيد — تمام . مضبوط .

عبدالصبور — باشخير فنى فى الطرشى ؟ ياخى دم لما
يلهفك . . باشخير طرشى ، وجى تناسبنى ، ليه قالوا لك
علىّ وقيع ، هفينه . قليل الأصل . . خلاص ، هىّ
ضاقّت علىّ الدنيا ، مالمقيتش غير انت اللى أناسبك ، ليه
اتجننت .. اتخبط فى عقلى ، أنا أدخل بيتى ، باشخير طرشى ،
وأنا ما طيقش طعم الطرشى ، دا انا لما باشوف دكان طرشى
من بعيد بيغمى علىّ ، دا انا بينى وبين الطرشى تار بايت
وعداوه متأصله ، أقوم آجى على آخر الزمن ، أناسب
باشخير طرشى ؟ أنا اللى محرّم عليهم ما يدخلوش فى
البيت حتة لفت . أقوم أدخل برمى طرشى متحرك ؟

سید — طب بس حلسك شويه ياسى عبد الصبور ..
ما تتحمقش كده ، هدسى نفسك وخلينا نتفاهم .

عبد الصبور — نتفاهم على إيه؟ وهى دى حاجه عايزه
تفاهم؟ أنا والطرشى عدوان لدودان ، بيتقى نتفاهم على إيه؟
المسأله ما لهاش إلا حل واحد .

سید [بلهفة] — إيه هو؟ إلحقتى بيه؟

عبد الصبور — إنك تقلب .

سید — أقلب؟

عبد الصبور — أيوه تقلب .

سید — أقلب ازاي مانيش فاهم؟

عبد الصبور — زى الناس .. يعنى بدل ما انت باشخير

فنى طرشى ، تبق باشخير فنى ، حلاوه طحينيه مثلا ..

أو باشخير فنى غزل البنات . أو باشخير فنى براغيت الست

أو باشخير فنى حلاوة زمان .

سید — حلاوة زمان؟

عبد الصبور — أيوه حلاوة زمان ، مانتاش عارفها .

الحلاوه اللى يلفوها على حته خشبه طويله فى آخرها كوز

زى الشخشيشه والراجل يشد فيها ويمط ، ويعمل لك

حصان وعروسه زى ما انت عايز ..؟

سيد — أنا أبقى باشخير فنى حلاوة زمان ؟
عبد الصبور — فيها إيه ؟ . يعنى مش أحسن ما تبقى
باشخير فنى فلفل . . أقل ما فيها تبقى خبير فى حاجه حلوه ،
ما تحرقشى ، ما تشويش . مش خبير هاليب .

سيد — لكن دى
عبد الصبور [مقاطعاً] — مالكنش ولا حاجه ، أنا بجب
غزل البنات ، وبراغيت الست ، والحلاوه الطحينيه ،
وحلاوة زمان .

سيد — أنا ما قولتش حاجه ، حب اللى تجبه . بس
أنا ما قدرش بعد خمسة وأربعين سنه خبره فى الطرشى ،
أقلب فى آخر الزمان ، وأبقى خبير حلاوة زمان ،
والا حتى حلاوة دلوقت . . دى حاجه ما تعقلش ، دى تمام
زى ما تقول للفسخانى اللى طول عمره فسخانى . تعالى بيع
روايح عطريه ، يموت منك ، الريحه اللى انت فاكرها
كويسه تأثر على نخاشيشه اللى واخده على ريحة الفسيخ تموته .
والا مثلا زى لما تاخذ الفحام ، اللى قاعد طول عمره زى
حتى الهبابه ، وتقول له اشتغل فى حمام ، يدوب منك ، يبوش
فى الميه زى فص الملح ، الوساخه اللى على جتته اللى هى حلت
محل اللحم تنزل ويسيح وما ييقاش فيه حاجه .

عبد الصبور — حَافٍ ، حَمَامِي ، فَسَخَانِي ، دَاكَلَه
مَاهِمْنِيش ، كَلَه وَاحِدَه مَا فَيْش غَيْرَهَا ، أَنَا مَا أَحْبَش
صَنْف الطَّرشِي أَبْدَأُ ، حَلَاوَه مَعْلَهش ، عِنْدَكَ جَمِيع
أَصْنَافِ الحَلْوِيَّاتِ ، كَلَهَا مَقْبُولٌ ، أَنَا مَا بَدَقُّشُ إِنْ شَاءَ اللهُ
تَبَقِي خَيْرٌ فِي المَصَّاصَه ، كَلَه يَنْفَع .

سید — یاسی عبدالصبور الله لایسیتک .

عبدالصبور [فِ عِدَة] — خِلاصِ اِتْمِینَا .

سید [نَائِرًا] — هُوَ إِيَّاهُ أَصْلَه دَه ؟ دَا اسْتَبْدَاد . . دَا

ظَلَم . . دَا تَحْكَم !

عبدالصبور — تَحْكَمُ مَش تَحْكَمُ ، أَنَا قَلْتُ كَلْتِي خِلاصِ

مَا فَيْشِ غَيْرَهَا .

سید — دَه حَرَامٌ . اتَقَى اللهُ يَا شَيْخُ . دَا رَبَّنَا مَا يَرْضَاش

بَكْدَه أَبْدَأُ .

عبدالصبور — إِذَا كَانَ مَا يَرْضَاش . خَلِيَه يَجُوزُهَا لَكَ

أَهِي قَدَامَه ، لَكِن أَنَا مَش حَاجُوزُهَا لَكَ أَبْدَأُ .

سید — دَه جَبْرٌ ، دِي قَسْوَه ، دَا اَنْتَ رَبَّنَا مَش

حَاطِرِيكَ نَصْفَه .

عبدالصبور — مَش مَهْمٌ ، النِّصْفَه الَّتِي عِنْدَه ، ابْقِي

خَدَهَا اَنْتَ .

سيد - روح يا شيخ ، ربنا يرزقك بحلة كرنب محشى .
عبدالصبور [فى فرع] - آى . . أخرج بره .
سيد - والا بمفتش نمرة ه يكبس على أنفاسك .
عبدالصبور - إلحقونى ياهوه .

سيد - والا براس عبد تطب على نفوخك .
عبد الصبور - جاى يا عالم .

سيد [مستراً] - زكبه المدنه ، سنه القرعه ، أبو على
الأحول ، كسبة زيت حار ، أبو قردان ، سمك بكلاه .

عبد الصبور - جاى ، جاى ، إلحقونى . . ابعدوا
المجرم ده ، أخرج بره يا مجرم [يتشنج وينمى عليه] .

[سيد يهرول هارباً الى الخارج . . تدخل أم رتيبه والخدموراها]
أم رتيبه - فيه إيه ؟ جرا إيه كفا الله الشر ؟

سيد [وهو يهرول الى الخارج] - آل باشخير حلاوه
طحينيه آل . . دا انا حتى ابقى قليل الأصل ، بعد العمر
الى قضيته مع الطرشى . . انضم فى الآخر . . لمعسكر
الأعداء ، دى تبقى خيانه ، دى تبقى نداله . آل إيه
باشخير مَصَّاصَه ، أصلها هزلت . . حد الله بينى وبينكم .

[أم رتيبه منهكة فى تويق عبد الصبور ، وزينهم يهجم عليه بكوب ماء
ويضربه فى وجهه] .

عبد الصبور - المجرم ، ابعده . . باشخير الطرشي
المولع . . او عوا تَدْخُلُوهُ بَيْتِي ، آل كرنب محشي ، وراس
عبد ، السافل المجرم .

سنيه - سلامتک ياسيدى ألف سلامه ، روق دمك
ما عاش اللي يزعلك .

زينهم - شفت ، عشان ماتبقاش تعايب على وشى .
اللى مايرضى بالخوخ يرضى بشرابه ، أهو جالك اللى جابلك
الكافيه [ينادر المجره] .

المشهد العاشر



[أم رتييه - عبد الصبور - سنيه]

أم رتييه - إيه يا خويا؟ . جرى إيه بس فهمنى؟ . إيه
بس اللى لهلها كده؟

عبد الصبور - باشخير الطرشي ، الدون ، المنحط .
ما يعتبش بيتي أبداً .

أم رتييه - بس اهدى ياخويا ، وقول لى إيه اللى
جرى؟

عبد الصبور — آل عايز يتجوزك آل .
أم رتييه — ودي فيها حاجة تزعل ، دي حاجة تشرح ،
حاجة تبسط .

عبد الصبور — دا باشخير طرشي ؟

أم رتييه — وفيها إيه !

عبد الصبور — طرشي حرّاق ؟

أم رتييه — حرّاق والامش حرّاق ، هوّه قال لك
تعالى دوق بدالى ؟

عبد الصبور — خلاص ، أنا قلت كلبه واحده ..
أنا ماحبش لا الطرشي ولا ريحة الطرشي ولا سيرة الطرشي
قلت كلبه واحده وانتهينا .

أم رتييه — يامية بختك يا ام رتييه [تهنه] .

سنيه — معلش ياست ، ما تزعليش ياست .

عبد الصبور — بس خلاص ، بلاش عياط . اقعدى
قدامى هنا . لما أقول لك على المهمة الكبرى ، أنا حاسس
إن وقتها جه . اقعدى قدامى ، وفتحى ودانك كويس ،
أنا نازل على الإلهام ، والوحى يقوللى عشان استعد من
دلوقت وافهمك كل حاجة .

أم رتييه — ياخويا سيني فى حالى . كفايه ميلة البخت

اللى انت جايها لى ، مهمه كبرى إيه ؟ وسخام إيه ؟
وهباب إيه ؟

عبد الصبور — اقعدى يعنى اقعدى ، دا مش وقت
أخذ وعطا .. الوقت ضيق .. اقعدى وفتحي ودانك ..
واسمعى كويس الكلام اللى حاقول هو لك ده .

[تجلس أم رتيه أمامه وهى تتهد يائسه] .

أم رتيه — يارب .. توب علىّ بقى م الغلب ده .
سنيه [تجلس على الأرض] — معلش ياست .. استحلى
ياست .

عبد الصبور — خدى بالك كويس م اللى حاقول هو لك .
فتحي ودانك خالص وحضري ذهنك ، ماتخلش يتشتت
لاهننا ولاهننا .. أنا عارف انك غيبه ، لكن حاولي انك
تفهى ...

أم رتيه - ياخويا قول ، علّتى .

عبد الصبور — بقى أنا عايز أعقد اتفاق بينى وبينك .
أم رتيه — اتفاق ؟

عبد الصبور — أيوه .. اتفاق .

أم رتيه — بينى أنا ، وبينك انت ؟

عبد الصبور — أيوه ، اتفاق بيني وأنا وبينك اتى ،
حاجه غريبه ؟

أم رتبيه — أبدأ ، هو فيه حاجه منك غريبه ، بس
إيه المناسبه ، تعمل اتفاق بيني وبينك . . ليه ؟ وعلى إيه ؟
عبد الصبور — أيوه ، قلتي لى ليه ، وعلى إيه ؟ بقى
يا ام رتبيه يا حتى أنا حاسس إن الأجل قرب .
سنيه — بعد الشر ياسيدى .

أم رتبيه — بقى اسمع يا عبد الصبور يا خويه ، إذا
كنت بتقعدي عشان تقول لى الكلام الفارغ ده . أنا مش
فاضيالك ، انت بقالك عشر سنين وانت تقول إنك
حاسس إن أجلك قرب وأديك قاعد زى قرد قطع ، لايك
ولا عليك .

عبد الصبور — لأ ، المره دى حاسس إنه قرب قوى .
أم رتبيه — قرب والا ماقر بش ، إالى انت عايزه إيه ؟
عبد الصبور — عايز نعمل اتفاق مع بعض إن اللى
يموت قبل التانى ينزل يقول له شاف إيه فوق .

أم رتبيه — هوّا إيه أصله التخريف ده ؟
عبد الصبور — معلش ، واحده ، واحده ، أنا عارف
إنك غيبه ، ولازم أفهمك حتّه ، حتّه ، بقى يا ام رتبيه

يا اختى . الواحد منا لما يموت روحه بتطلع فى السما
وجتته بتفضل فى الأرض تعفن وتتاكل وتدوب . يعنى
لما انت تموتى مش حايفضل منك غير روحك .
أم رتبه - يا باى على كلامك اللى زى الضرب .

عبد الصبور - فروحك ، وبقية الأرواح بتطلع
فى السما ، وتبقى عايشه فى عالم كبير خالص أكبر من العالم
اللى احنا عايشين فيه ده وتبقى مقسمة لدرجات ، وإحنا
دلوقت بنقدر نستدعى بعض الأرواح ، ونتكلم معاها ،
إما بطريقة الكتابة والإشارة ، أو بالصوت . يعنى الروح
تحتل جسم بنى آدم اسمه الوسيط . . أو فى الأحيان النادرة
تتجسد الروح ، فأنا عايز اللى يموت منا قبل التانى ، يبقى
يتجسد وينزل ويتفاهم معاها ، ويديله المعلومات اللى يعرفها
عن عالم الأرواح .

أم رتبه - اسمع يا خويه يا عبد الصبور ، بلاش
الكلام ده ، انت لبشت جتى ، أنا لا قدر لانزل ولا اطلع
عافينى يا خويه م الاتفاق ده . . أنا لما أموت حاستكن
فى تربى لاحا هوّب لاهنا ولاهنا ، كل اللى أنا عايزاه
إنكم تبقوا تزرعوا على تربى صباره ولبلاه . . حاكم أنا
أحب اللباب .

عبد الصبور — لبلابه إيه
 وبتاع إيه . إيه الكلام الفارغ
 اللي انتى بتقوليه ده ، انت
 مش حاتبقى فى التربه . انتى
 حاتبقى هايمه فى السما ،



[أم رتيه وعبد الصبور] ولازم تنزلى لى .

أم رتيه — مانزلش ولا روحش ولا جى . بلا قلبه
 دماغ ، هو انت ورايا فى الحيا وفى الموت .

عبد الصبور — عنك ماجيتى ، إنت أصلك راسك
 ناشفه .. على العموم أنا متأكد إن أنا اللي حاموت قبلك .
 لأن أنا حاسس إن أجلى خلاص قرب خالص ، يعنى
 يمكن أموت الليله دى .

سنيه — يوه ياسيدى .. تف من بقك سبع تفات .
 عبد الصبور — ولا سبع تفات ولا تمانيه ، الواحد
 لما قضاه بيدجى ، ماينفع فى ردّه حاجه . على العموم أنا
 مش زعلان إن انا حاموت لأن دى مسأله مفروغ منها .
 لانا أول اللي حاي موتوا ولا آخر اللي حاي موتوا .. الحياه
 قنطره ، أو نفق ، والزمن دازى القنطره الاكسبريس ..

الروح تركب فيه شويه لغاية ماتعدى من ناحيه للناحية الثانيه ،
 عمر الاكسبريس ماكسكس ولا هدى ولا وقف ، يعنى
 واصلين للنهايه . عزنا والا ما عزنناش . . كل حاجه فى الدنيا
 بتخلص ، إشمعنى احنا اللى مش عايزين نخلص ، أناحاموت ،
 ومش زعلان اللى أناحاموت ، أنامش خايف من الموت ،
 لكن اللى أنا خايف منه ، إن أنا أروح كده هدر ، زى
 كل الحمير اللى ماتوا قبلى . . أنا عايز استغل موتى ، عايز
 أعمل حاجه ما عملهاش حد قبلى . . عايز ارجع تانى ، عايز
 اموت وارجع ، أروح وآجى .

أم رتيبه [تضرب بيدها على صدرها] — يا مصيبتى !
 عبد الصبور — مالك كده . . بتضربنى على صدرك ،
 زى المخايل . خضتبنى . يا مصيبتك ليه ؟ عشان حاموت ؟
 أم رتيبه — لا . . عشان حاترجع . . موتك حقيقى
 مصيه ، لكن رجوعك مصيه أكثر . عايز تموت ،
 ويرجع عفريتك ينط لنا كل شويه ، بالطيف . بالطيف
 ودى مين تستحمل الغلب ده . . اللى ما حنا طايقينك وانت
 بنى آدم . . نطيقك وانت عفريت ؟

عبد الصبور — برضه الوليه بتقول عفريت ، إفهمى
 يا بخ راكب . يا بجم . أنا مش حارجع عفريت ، أنا حارجع

زى ما انا كده ، حارج روح مجسده ، زى ما انت شايفانى
تمام ، بس اكون بقى عرفت كل حاجه ، اكون كشفت
الستار وهتكت الحجاب ، ونورت العتمه اللى بتخبي
العالم الواسع . اكون لقيت فى السما شويه ، واطلعت
على المستخبي ، وعرفت الاسرار المخفيه ، وعرفت تركيب
السموات ووضع الكون ، وجليت سر الموت ، والروح .
كل ده اللى حار فيه الفلاسفه والعلماء . بشويه لف فى السما ،
حاعرفه ، وبعدين حارج لكوا ، واكشف لكوا
المستخبي ، واشرح لكوا المستتر .

أم رتيه — يعنى حاتعرف مثلا .. أنا حاتجوز امتى ؟
عبد الصبور — اتى جنسك إيه ؟ مخلوقه من إيه ؟
أقول لك أسرار الكون ، والعالم المجهول .. تقولى حاتجوز
امتى ؟ يا بجهه يا ام عين فارغه ؟ . إيش يكون جوازك ،
فى المهمات الكبرى اللى حانكون ورايا .. اتى فاكرانى
حاشتغل فى السما خاطبه ؟ . انت فاكرانى حاكون فاضى
لل كلام الفارغ بتاعك ده ؟ ثم انت مالك ملهوفه على الجواز
كده ؟ . أنا قلت لك انك مش حاتجوزى يعنى مش
حاتجوزى لا وانا حى ولا وانا ميت .. مبسوطه .
أم رتيه — ياباى على ملافظك اللى تسد النفس ..

طيب عرفنا وانت حى مش حاتجوز ، طيب ولما تموت ،
يبقى شأنك إيه بقى فى جوازى؟ هوّا انا حافظل مربوطه
لك كده حى وميت؟ حافظل متسنسله فيك؟. حقه دى
مصيبه وطلبت على دماغى .

عبد الصبور — اللى حاصل .. قسمتك كده ، بختك
كده .. المهم خلىنا فى اللى احنا فيه ، بلاش السفاسف دى .
خلىنا فى الحاجه المهمه ، بقى انا قلت لك إن انا لما اموت
حاضر بلطه فى السما ، و ابرم فيها برمتين ، وارجع .
أم رتبه — ترجع ازاي بس ياخويا؟

عبد الصبور — أيوه .. كده عجبتنى ، قولتلى حاترجع
ازاي ، بقى احنا دلوقت بنقدر نستدعى الروح اللى احنا
عايزينها ، وبتفاهم معانا وتقول لنا على احنا عايزينه يا إما
بواسطة الإشاره .. أو بواسطة الصوت ، عن طريق
وسيط شاطر ، فأنا دلوقت حاطلع وانا مصمم على الرجوع .
بس عايز وسيط أتفاهم معاه على الرجوع ، وسيط يكون
بين أرواحنا تجاذب وتفاهم ، وما افتكرش فيه تفاهم
وتجاذب بين روحى وروح تانيه أكثر من روحك ،
حقيقى روحك غيبه وحماره ، وروحى زكيه وراسيه وعاقله .
لكن دا ما يمنعش التجاذب والتوافق اللى بينهم .. انتى

أقرب الناس وأحبهم لي ، رغم السخافة التي انت فيها ،
واحنا الاتنين بقالنا خمسة وأربعين سنة ما فارقناش بعض ،
وعمر روجي ما تظمن وتهدي إلا لروحك ، وعشان كده
حخليكي الوسيط . . اللي حانزل بواسطته .

أم رتيبه [تنهد يئاس] — ولا أنا فاهمه حاجه ؟ وسيط
إيه وتوافق إيه ؟ وكلام فارغ إيه ؟

عبد الصبور — عارف . . عارف إنك مش حاتفهمي
حاجه أبدأ . . لكن اصبري عليّ لغاية ما فهمك كل اللي أنا
عايزه منك . أنا مش حاظلب منك حاجه أكثر من طاقتك ..
انت حا يكون دورك بسيط خالص ، وأنا حا يكون عليّ
كل الحمل . إلی أنا عايزه منك . . إنك تستعدى لاستقبالي
في يوم معين . . في ساعه معينه ، ويكون اليوم دا يوم الأربعاء
في نص الليل مثلا . .

أم رتيبه [نمز رأها أسفا] — قصدك تقول إنك
حاتموت وترجع في يوم الأربعاء . . يعني حاترجع تاخذ
بخاطرنا ؟

عبد الصبور — لا . . بس الفكره إنكم تدون في وقت
عشان ألف شويه فوق ، أنا مش عايز أبقى مكروش ،
وأظن الأربعاء يوم مش كتير عشان جوله في السما . . يمكن

أحب أروح هنا والأرواح هنا ، حد من الأهل يعرفني ..
يعمل حفلة تكريم بمناسبة صعودي للسما .. برضه الواحد
لازم يعمل حسابه على المشاوير اللي زي دي .

أم رتيبه [فخرية] — أيوه برضك لازم تعمل حسابك .
عبد الصبور — المهم ان احنا نتفق مع بعض من دلوقت .
عايزك تستنى ليلة الأربعاء الساعة ١٢ بالليل ، وتبقي الجو
الملائم لاستقبالي .. يعني تقعدى لوحدك في أودتي في صمت
وسكون .. لاحس ولا حركه ، وعايز كل حاجه في الأوده
تبقى زي ما هي .. كل حاجاتي تبقى حاضره ، الطرطور
بتاعي والعبايه وعلبة النشوق ، والطشت والابريق والميه
السخنه ، والكتب اللي على الرف ، وما تنسفش القبقاب
أبو جناجل .

أم رتيبه — حاضر من عيني الاتنين .. مش خلاص
بقي ؟ أقوم أشوف شغلي ؟

عبد الصبور — استنى شويه .. مستعجله على إيه ؟
بكره تقعدى لوحدك لما تشبعي .. فيه حاجه كمان عايز
اقولها لك .

أم رتيبه — إيه تاني ؟

عبد الصبور — أنا عايز التلامذه بتوعى زي الشيخ جاد

والأستاذ زكي والأستاذ محجوب ، يكونوا موجودين
عشان يشوفوا التجربه وينشروها على العالم . بس يقعدوا
هنا ، وما يخشوش الأوده دى إلا لما انزل . . علشان
مايشوش علينا ، انت لو حدك بس اللى تستنى فى الأوده
بتاعتى . أنا أصلى ما عنديش فكره حانزل ازاي ، يمكن
أنزل بجتتى عريان مثلا ، تبقى عباره قدام الناس الغرب ،
عشان كده بقول من باب الاحتياط تحضرى لى غيار .
وانت قاعده مستنيانى . . عايزك تركزى ذهنك فى ماتخلىش
حاجه فى فكرك غيرى .

أم رتيبه — حاضر ، مش حاخلى فى فكرى غيرك . .
سيبنى بقى . اعتقنى لوجه الله .

عبد الصبور — إخص عليكى يا خاينه . . بعد العشره
الطويله ، أقول لك أنا حاموت الليله دى . تقولى سيبنى
بقى اعتقنى لوجه الله !

أم رتيبه — يا خويا أصل أنا شبعث من موتك ده ،
بقى لك اتناشر سنه وانت تقول انك حاتموت .

عبد الصبور [فى تأثر] — لا . . المره دى يظهر إنه
جد ، صحيح ، مش هزار .

أم رتيبه [يهز عليها الفرع] — يانداهمه . إيه الكلام اللى

انت بتقوله ده .. انت حاسس بحاجه ، أجيب لك دكتور ؟
[تنهض وتضع يدها على جبينه] .

عبد الصبور — مافيش لزوم للدكتور ، عمر الدكتور
ما يمنع الموت .. إلا لما يكون المريض من نفسه ،
مش ناوى يموت ، لكن أنا قلت لكم خلاص ، أنا ناوى
أموت .. أنا دلوقت حاقوم أدخل فى السرير وأرخي
الناموسيه ، وإذا كنتم تحبوا تقرأوا الفاتحه على روحى ،
مافيش مانع .. يمكن تفيد .
[ينهض ويتجه الى السرير] .

سنيه [تنهه] — يا عينى عليك ياسيدى ، بعد الشر عنك
ياسيدى ، ما كان بدرى عليك ياسيدى .

[يدخل زينهم منزعجا]

زينهم — فيه إيه ؟ جرا إيه ؟ فيه إيه يابت ياسنيه ؟
كفا الله الشر ؟

سنيه — سيدى عبد الصبور حا يموت .

زينهم — يموت ؟!! ها أو ، أنا كان أموت فى المهليه .

[سنيه مستمرة فى البكاء]

أم رتيه — بس يابت بلاش كهنُ وبدع .. إيه

المسخره دى ؟ . دا بقاله . . أربعتاشر سنه ناوى يموت ،
مايموتش . . دا عمر الشقى بقى .

[يصعد عبد الصبور الى السرير] .


[تقف أم رتيبه وزينهم بجوار السرير . ويحدقان بأنظارهما
إلى عبد الصبور]


سنيه [وهي تبكي] — ما كانش يومك ياسيدى .. والله
حاتو حاشنا ياسيدى !

عبد الصبور — نشوف وشكم بخير ، حدش لازمه
حاجه من فوق ، حدش له حبيب عايز يبلغ له السلام .

[يشبر بيديه تحية الوداع ويرخى الناموسيه]

يسدل الستار





الفصل الثالث

المنظر [نفس منظر الفصل الثاني بعد أربعين يوماً . . الساعة تشير الى الثانية عشرة الاثنا عشرية وحجرة الاستقبال رصت بها مقاعد خيزران ومنظرها غير مرتب بمد أن انقض المعزين في الأربعين . الباب الزجاجي المفضى الى حجرة نوم عبد الصبور مطلق . . يبدو زينهم وقد أمسك بمقشة يد وأخذ يكس الحجر ويجمع المقاعد الخيزران في أحد الأركان] .

المشهد الأول



[زينهم — سنيه]

زينهم — والله عملتها وخلت ياسى عبدالصبور .. هو
 انا كان داخل عقلى انك حاتموت حقيقى ، اربعتاش سنه على
 رأى أم رتييه وانت كل يوم بتقول انك حاسس إن أجلك
 قُرب ، وتصبح زى الحصان . صاغ سليم . يعنى اشمعنى
 المره دى اللى صدقت . اشمعنى المره دى اللى حليت عنا .
 لازم فيها سر ، لازم محضّر لنا مكيده ، لازم مدبر لنا مقلب .
 انت مش ممكن تسيننا كده بالساهل ، مش ممكن تحل عنا
 كده لله فى الله .. ياما انا خايف لتكون ناوى ترجع حقيقى ..
 ما انت أصلك ما تستبعدش عليك حاجه أبداً ، أهو كده
 تبان طيب وعلى نيّاتك .. لكن فى الحقيقه قرم ابن قرم ،
 مين يعرف يمكن تعملها من دون الأموات ، وتقل عقلك
 وترجع لنا تانى ، وانت أصلك بنغزه ، وتعملها
 صحیح .. تزوغ من عزرائيل زى الحربايه .. أنا بقالى خمس

سنين معاشرتك ، ما شفتلكش حاجه كده تفوت زى بقية
الخلق حتى موتك ، هي دي موتة دي . تفضل ملبشنا
كده أربعين يوم ، وكابس على أنفاسنا ولا كأنك مت ..
كنا عايزين نشم نفسنا .. كنا عايزين نحس انك مت حقيقى .

[تدخل سنه وقدارتت ملابس سوداء]

سنه — ماتيا الله تشهل شويه يا زينهم . . إنت عمال
تحسوك فى إيه ؟

زينهم — مش لما أوضب الأوده ، عشان اللى
بيتسمموا دول يرجعوا يقعدوا تانى . . أنا مش عارف
لزومه إيه الأكل فى الميتم ؟

سنه — وأكل إيه ؟ هو أكل بعقل ؟ دا انت لو شفت
الشيخ جاد وهو هابش فى حته الفخذه اللى فوق الفته تقول
دا عمره ما حضر ميتم أبداً ، والا الأستاذ محبوب وهو
يلحس السمن اللى فى صوابه ، وياين عليه الفرحة كده ،
زى اللى نفسه كل يوم يكون فى ميتم .

زينهم — إلحق مش عليهم ، إلحق على اللى سمهم ،
ماكانش ضرورى نعمل لهم اللى عملناه ده .

سنه — أمال يعنى فكرك كده يبجوا يعزوا مجاناً .
يقعدوا يسمعوا القرآن كده لوجه الله ، على العموم .

أهـى رحـمه ونور عـلى روح
المرحوم .

زینهم — مرحوم؟ أنہی
مرحوم ده؟ هو اده تنفع فیہ
رحمه والا نور . دا تلاقیه
دلوقت مشا كل طوب السماء .
تلاقیه مخلص حد ماتخا نقش



[زینهم — سنیه]
معاه ، أنا متأكد إنه وهو ا

طالع مع عزرائیل خلا عزرائیل ندم على أخده ، وانه
لورجع لنا زى مايقول مش حايكون راجع بكيفه ابدأ
دا يكون راجع مطرود بناء على طلب الأرواح ، حايكون
راجع مضروب ثلاثين ألف برطوشه ومكسور وراه
أربعين ألف قلّه ، لكن لزومه إيه يرجع؟ وهو سابنا
لما يرجع لنا . . بذمتك انتى حاسه إنه مات؟

سنیه — ابدأ والنبي ياخويا يا زینهم ، أنا متيألى إنه
فى كل ساعه قاعد قدامنا ، وكل ماجى أخش أودته ألاقیه
مدلدل رجليه فى الطشت زى عوايده ، وكل ما بص
لطرطوره يتيألى إنه قاعد تحته .

زینهم — إنت برضه كده؟ دا انا كنت فاكرا أنا لوحدى .

أناكل ما فكر .. تهباً لي إنه هوّا ماطلعش لاسما ولا حاجه
وانه قاعد تحت الناموسيه زي ماشفتناه آخر مره ، وكل
ما اسمع عطسه .. تهباً لي إنها بتاعته .

سنيه - وستى أم رتيه . ألعن وألعن ، متلبشه ،
ومرعوشه ، وعاملا له حساب زي مايكون حي .. أصل
حكاية رجوعه تاني مخلياها زي الفرخه الدايجه .. مش
مصدقّه أبدأ إنه خلاص مات ، وانها حرّه تعمل اللي هي
عايزاه .. حاسه إنه زي ما يكون في سفر وراجع ، وإنه
لسه بارك على أنفاسنا .

زينهم - على العموم .. كلها نص ساعه ، وننتهي ،
والمسأله تفوت بالطول والا بالعرض ، وإذا كان ناوي
ينزل حقيقى .. أهو ينزل له شويه من نفسه ويحل عنا
مايورناش خلقتة بعد كده أبدأ .. نص ساعه ، ونبقى
أحرار .. نص ساعه ونخلص منه خالص ، ونقطع دابره
من هنا ، ونعمل زي ما حنا عايزين .. اتى فأكره ياسنيه
الطلب اللي طلبته منك ؟

سنيه - فأكره ياخويا .. بس المرحوم .. خوفنى
م الجواز قوى .. .

زينهم - وهوّه المرحوم كان وراه حاجه غير كده ..

أنا عارفه كويس .. نوع أنا في ما يحبش إلا نفسه فضل مقعد
أخته كده من غير جواز لغاية ماضع عمرها .. عشان
عارف إنه ما يقدرش يعيش من غيرها .
سنه — طب وانا؟ . ماله ومالي؟

زينهم — نفسه فيكي ومش طايبك .. نفسه يتجوز
ومش قادر ، خايف وموهوم ، وعشان كده ضيع عمره
عازب وعازب كل الناس تقعد زيه .

سنه — لا يازينهم حرام عليك ، الراجل كان يقول
إنه صاحب مبدأ ...

زينهم — مبدأ .. سلامات يا مبدأ ، مبدأ إيه بقى
ياست سنه .. داتنى على نياتك قوى .

سنه — كان يقول البنى آدم قدامه نعيمين ، نعيم
الأرض ، ونعيم السما ، وانه هوا حارم نفسه من نعيم
الأرض عشان قصير وزايل ، ومستنى نعيم السما عشان باقى
ودايمة .

زينهم — ها أو ، ها أو أو أو . دا قصر ديل يا ازعر .
كلهم بيتقولوا كده .. الواحد لما ما يطولش النعمة ، يقول
عليها زايله ، ويعزى نفسه بالدايمه باللى فى السما .. خليه
بيقى يقابلنى فى السما . فيه حد يزهد فى النعيم بكيفه ، ما يزهد

في الحلق إلا اللي بلا ودان ، ما فيش في الأرض زهد . .
إلا بالإكراه ، والزهد في النعمة كُفْر ، دا انا لما اديكي حته
ملبن وترفضيها أنكسف ، تبقى عيبه في حقى . أنا البنى آدم
الغلبان ، إيش حال بقى ربنا ؟ . يصح يدينا حاجه ونقول
لا . . يصح نكسف ربنا ؟
سنيه — أستغفر الله العظيم .

زينهم — تستغفرى ليه ، هو أنا قلت كُفْر ؟ . الكُفْر
هو اللي قالوه لك الله يرحمه سى عبد الصبور ، أنا لازم
اتجوزك ، ربنا ادا فى حته ملبن . حته قشطه . أكسفه ؟
أقول لا أنا عايز م اللي فى السما . . دى حتى تبقى لماضه .
[يفتح الباب الزجاجى وتبدو منه أم رتيبه متشحة بالسواد ويبدو الفراش
والمقعد والطرطور وعلبة النشوق ، وكل الاستمدادات لاستحضار روح
عبد الصبور]

أم رتيبه — مش تخلصوا بقى وتخلوها ليله تفوت على
خير . الساعة قربت على اتناشر . . مش تقولوا للنراغيف
اللى بيتسمموا ييجوا يقعدوا بقى . . مش كفايه أكل . هم إيه
بياكلوا فى آخر زادهم . . ماشافوش مياتم قبل كده . .
[ترفع رأسها الى السما] يارب انهينا بقى . . خلصنا م الدوخه اللي
احنا فيها . الناس كلهم بتموت لهم أموات ويحزنوا عليهم

ويخلصوا . . ما فيش حد موته عجب غيرنا إحنا ، لازم سي
عبد الصبور يروح وييجي . . أصله واخذ السكه قياسه ،
إلهي يعدلها له .

[بدخل سيد افندي من باب الصالة وهو بمصمم بشفتيه ويسلك
أسنانه ويقاها بوجود أم رتيبه فيتراجع]

المشهد الثاني



[أم رتيبه — سيد]

سيد — ياسا تر . . عدم المؤاخذه .

أم رتيبه [يبدو عليها الخجل وتحجب وجهها بطرف الطرحه] —
اتفضل ياخويا . . ما فيش حد غريب . اتفضل .

سيد [يتقدم ويصاها وهو يتمتر من الكسوف] — أهلا ،
وسهلا . . أهلا وسهلا .

[يخرج زينهم وسنيه ويتركان سيد افندي وام رتيبه في الحجره] .
أم رتيبه — أهلا بك ياسي سيد ، والنبي ياخويا . .
مش عارفه أودي جميلك فين .

سيد — على إيه ياسا . . على إيه ؟

أم رتيبه — على التعب اللي تعبته في جنازة المرحوم .
هوا انت تعبت شويه ؟

سيد — دا الواجب ياست .. احنا ما عملناش حاجه
أكثر م الواجب .

أم رتيبه — أبدأ والنبي ياسى سيد افندى .. دا انت
عملت أكثر وأكثر .. إنت أصلك طيب وابن حلال ..
ربنا يقدرنى على رد جميلك .

سيد — ياستى ما فيش فرق .. إحنا برضك أهل ..
أنا مش غريب .

أم رتيبه — غريب ازاي ياسى سيد .. دا البيت بيتك .
هوا احنا فاضل لنا مين بعد سى عبد الصبور غيرك انت
والست أم سيد .

سيد — أنا تحت أمرك .. أنا خدامك .. إأمري
ياست أم رتيبه .. أنا ماللياش برکه الا انت .. هوّه
لو كان الله يرحمه حط عقله في راسه ، ووافق على المسأله
إياها . مش كان بقى زيتنا في دقيقنا ، وكان هدى سرنا .

أم رتيبه — ربنا يتمم بخير ياسى سيد .. ربنا مايخيش
رجا مؤمن .. إحنا برضه مسيرنا لبعضنا .

سید — آیوہ . برضہ مسیرنا لبعضنا . . أنا مؤمن
وربنا ما یخیلش رجا ابدأ .. إن شاء الله أحلامنا حانتحقق
وحانتجوز . وبسرعه أسرع مما تتصور .

أم رتیبہ — ازای ؟ ..

سید — زی الناس .. هوّا فیہ مانع اننا نتجوز
دلوقت ؟ . العقبه الی كانت موجوده زالت .. السد الی
كان بیننا انشال .

أم رتیبہ — مانشالی ولا حاجه .. دا السد حاینزل
تانی الساعه اتناشر .

سید — انت برضك بتصدقی كلام الجماعه بتوع
الأرواح دول .. هوّا برضه معقول إنه ینزل ، وینزل
لیه ؟ وعلشان إیه ؟

أم رتیبہ — قال عشان یکشف لنا السر .

سید — سر ؟ سر بتاع إیه ؟

أم رتیبہ — أنا عارفه یاخویا .. أهو قعد یقول لی
كلام کثیر مافهمتش منه حاجه ابدأ .. غیر إنه حاینزل تانی
الساعه ۱۲ لیلۃ الأربعاء ، وإن أنا لازم أحضر کل حاجه
واقعد لاستقباله فی أودته ما فیش حد معایه ابدأ .. علشان
یقول لنا علی الی شافه فوق ...

سيد — وهوّه كان حد طلب منه يقول ع الى شافه
فوق .. حد كان سألّه ؟ . أما عجيبه على الجدع ده !

أم رتيه — معلمش ياسيد افندى .. فات الكثير
مايقاش إلا القليل .

سيد — أنا مقدرش استنى .. أنا حاسس بفرحه
عجيبه .. أنا حاخرج أدور على مأذون .

أم رتيه — يادى النايه ياسيد افندى .. الناس يقولوا
ليه ؟ اتجوزت ليله الأربعين بتاع أخوها ، وهوّ الو نزل
وشاف المأذون .. حاينخلى ليلتنا تفوت كده بالساهل ؟ .
داينخليا ليله زى الطين .

سيد — طيب معلمش .. أنا حاصر علشان خاطر ك .
حاقعد استنى أشوف بسلامته حايعمل إيه بنزوله ، حايجيب
الديب من ديله ؟

أم رتيه — والنبي دانا حتى خايفه من قعادك ساعة
نزوله .. أصل الله يرحمه ماكانش يطيمتك أبدأ ، كان يقول
عليك فيك شبه من الخريت .

سيد — الإيه ؟

أم رتيه — الخريت .

سيد — والخريت ده بيتقى إيه ؟

أم رتيبه — لازم حاجه شكلها وحش قوی .

سید — انت شفتیه ؟

أم رتيبه — لا . . أبدأ ، وانا مالی أشوفه .

سید — هوأ شافه ؟

أم رتيبه — ماظنیش .

سید — أمال یعنی منین عرف إن أنا شبه الخريت ؟

أم رتيبه — ما انا برضه سألته نفس السؤال فقال لی

إنه هو لما يحاول يتصور الخريت ما فيش صوره تيجی فی

دماغه غير صورتك ، وما دام كده يبقى لازم يكون

الخريت شبهك ، وما دام الخريت شبهك يبقى لازم انت

شبه الخريت .

سید — ما شاء الله . . أما استنتاج بدیع . . معلش ،

الله يسامحه ، كان عليه لسان زى العقربه ، وكان . . لكن

على إيه . . النبي قال اذكروا محاسن موتاكم . . الله يرحمه

مطرح مراح .

[يسمع صوت الشيخ جاد من الخارج يصيح]

الشيخ جاد — ماتيا لله بقى يا جماعه . . دى الساعه قرّبت

على اتناشر .

محجوب — أيوه . . يا اللا بينا .

أم رتيبه — طيب أسيدك أنا بقى ياسى سيد . . لحسن
الجماعه جاين . . أنا حاخش اقمعد استنا، ياما أنا خايغه قوى ،
كل ماالساعه بتقرب أحسن إن روحى سايخه وركبى ملخلخه .
أنا أصلى عمرى ما قابلت أرواح قبل كده .

سيد — شدى حيلك، ما تخافيش .. أنا قاعد لك بره ..
لو كان ناوى على أزيه إبقى ازعقنى على وأنا أخش
أكسر لك نافوخه . . أنا عارفه جنس بطال ما يجيش غير
بضرب الصرم .

[تنصرف أم رتيبه وتنفق وراءها الباب الزجاجى ثم يدخل الشيخ
جاد وزكى ومحجوب تباعا من باب الصلاة]

المشهد الثالث



[سيد — محجوب — جاد — زكى]

محجوب [ينظر الى ساعة الحائط] — الساعه اتناشر لإلا
عشره . فاضل عشر دقائق .

[يجلس كل منهم على مقعد وعيونهم متنقلة ما بين الساعه والباب
الزجاجى] . .

زكى — لو كان صحيح الأستاذ عبد الصبور حايقندر
يوفي بوعدده وينزل . يبقى معجزة قرنه .

محبوب — قرنه بس ، دا يبقى معجزة ميت قرن ،
لو كان يقدر ينزل بجسمه زى ما كان بيتقول دائماً فى الجلسات
بتاعتنا ، ويقول لنا عمل إيه فى الأربعين يوم ، وشاف
إيه . . دا يبقى الحدث الأكبر من عهد آدم .

سيد — عبد الصبور يبقى معجزة قرنه ؟ يبقى حدث
أكبر ؟ . دا إيه الكلام ده ؟

زكى — أمال . . هوّا فيه حاجه محيرة البنى آدم ، غير
جهله باللى بعد الحياة .. البنى آدم اللى طار فى السما .. البنى آدم
اللى غاص فى البحر ، البنى آدم اللى اتكلم فى لندن سمعوه
فى القاهره ، واللى اتحرك فى أمريكا شافوه فى طوكيو . .
البنى آدم اللى نطق الجهاد وحرك الحجر .. البنى آدم اللى
ما عجزش عن شىء أبداً .. البنى آدم اللى فهم كل حاجه
وكشف كل سر . . عجز عن أبسط الأشياء وأقربها له ،
عجز عن فهم نفسه . جى منين ، ورايح فين . أصله إيه ؟
وفصله إيه ؟ بيتولد ليه ؟ ويموت ليه ؟ البنى آدم عرف كل
حاجه فى الدنيا إلا نفسه .

محبوب — مذبوط . فهم الشمس والكواكب .

فهم فيه إيه في باطن الأرض ، وفيه إيه ورا السماوات ،
لكن ما فهمش فيه إيه في بطنه ، والافيه إيه ورا نفسه .
زكى — فهم كل حاجه .. ماعدا روجه . روجه .

اللى همى كل حاجه عنده ما عرفش عنها حاجه أبدأ ، بتطلع
ازاى ؟ بتنزل ازاى ؟ بتعمل إيه ؟ بتروح فين ؟

سيد — حقيقى معاكم حق .. لكن لزومه إيه
يعرف .. وحايعمل إيه لما يعرف ؟ . ما دام ما يملكش من
أمر روجه حاجه .. ليه عايز يعرف عنها حاجه ، لا هوّا
اللى بيحجب روجه ولا هو اللى بيطلعها ، يبقى ماله هوّه وما لها
هوّا كل اللى عاينه إنه يعيش ، إنه يمشى ، إنه يسبب نفسه للى
خلقه ، هوّا اللى منزله ، وهوّا اللى بياخده .. ماله هوّه ومال
روجه ، عرف والّا ما عرفش .. لا حايقدر يوقف طوعها
ولا يمنع نزولها .. يا شيخ انت وهوّه ريحوا نفسكم
بلاش فلسفه فارغه ، كان غيركم أشطر ..

زكى — هوّه حقيقى مش حايقدر يوقف طوعها لكن
على الأقل يبقى عارف همى طالعه فين ، يبقى عنده فكره ..
مش يفضل في حياته داير تايه حيران ، كل اللى يعرفه عن
روجه حاجات ما يقبلهاش عقله ، ويضطر يصدقها من غير

تفكير ، لأنه لو فكر مش حا يصدق ، وهو حاسس إنه لازم يصدق في حاجه ، ولازم يؤمن بحاجه ، ليه ما يقاس المصير واضح ومعروف ؟ ليه ما نعرفش إننا لما حانموت ، حانبقى كذا ، وحانتهى لكذا . . ما دام مصيرنا مقرر ومعروف . . ليه يستخبي علينا ؟ ليه نفضل في ضلاله وفي ظلام ؟

محبوب -- أبوه حقيقى ليه العالم الواسع دا كله ، اللي بتفاوت عليه الأجيال ، ما يعرفوش معمول ليه وفائدتهم فيه إيه ؟ ليه يفضلوا يتخطوا في عقائد مختلفة ، وأوهام متناقضة . . وأجيان تروح ، وأجيان تيجى ، ولاحد عارف ده راح فين ولا ده جه منين ، والا إيه فائدة وجوده في العالم ، ولمصلحة مين العالم موجود ؟ . إذا كان اللي عايشين فيه هم أشقى ما فيه ، من ساعة ما يتولدوا وهم مهديين بالموت وإيه هو الموت ما هماش عارفين . . يقولوا لهم ده انتقال من حياتهم الوحشة الفانيه لحياة حلوه ، حياه دايمه ، حياة خالده ، طيب أmaal جم للحياه الفانيه الوحشه ليه ، لما فيه حياة حلوه ، وحياة دايمه ، وحياه خالده ؟ لزومه إيه التعب والشقا في الحياة الفانيه دى ؟ الحياة اللي بياكل فيها الكبير الصغير ،

واللى عمره ما داق فيها الإنسان سلام ولا شاف هدوء ،
ولا استريح باله ، إيه قيمة الفتره القصيره اللى بيقتضيا
الإنسان فى الحياة الأولى مغمور فى الشقا والتعاسه والظلم ؟
زكى — مين يعرف ؟ يمكن لو كان عرف الإنسان
مصيره المجهول ، وتأكد أن الفتره اللى بيقتضيا فى الحياة دى
فتره موقته ، وأن له مصير طويل آخر ، ما كانش طمع فى
الدنيا وجرى ورا المتع وانكب على الملذات ، وحب
ياخذ أكبر كيه ممكنه منها قبل ما يموت ، ويضيع كل شىء
من إيده فى الآخر . . لو كان حقيقى يعرف إن حياته لسه
لها بقيه طويله ، كان صبر فى الحياه دى واستحمل وكان كل
الناس حبوا بعض وتقاسموا اللقمه سوا ، بدل ما كل واحد
يخطفها من بق التانى . يا أخى دا الواحد متالمما يكون وراه
عزومه ما يبرضاش يرمم عشان نفسه ما تنسدش . . ليه ؟
لأنه ضامن العزومه . . وكان لو كان العزومه الموعود بيها
فى الآخر . . مش ممكن كان يرمم فى الدنيا . . لكن
المصيه انه حاسس انه مش ضامن حاجه .

سيد — أيوه تمام ، لو كان الواحد ضامن إن الدنيا
— زى ما قال سيدنا على — سفر ، والآخره غايه ، كان
قضى السفره زى ما تكون .

زكى - لكن هو ماش شايف الغايه أبداً ، هوّه فاكر
إن السفر هوّه كل حاجه ، شايف الغايه غامضه ومجهوله ،
مش عارف هوّه رايح فين ، وعشان كده يقول يفوز
بالسفره أحسن له ، وعصفور قدامه خير من عشره مش
شايفهم ، يقولوا له إن في آخر السفره حاتلاقى كل الحاجات
الخلوه اللى بتشوفها في المحطات وأحلى منها ، إذا كنت
بتلاقى في المحطات جنبه وسميط ، حاتلاقى في آخر السفره ،
كنافه وقطايف ، وشهد ، ولبن . . لكن أهو كلام
بيقولوه له . . حد وصل لآخر السفره وجه قال له ،
أبدأ . . ومع ده كله كان تلاقى واحد مثلاً ميحبش الكنافه
والقطايف والشهد واللبن ، واحد نفسه حاوه ييجب الطعميه
السخنه ، والبني آدم بيتغير والناس أذواق ، مش معقول
إنه حايفضل باستمرار كل أمانيه ، لبن وشهد وخمر وكل
حاجه ولها أوان . . كان زمان ركوب الحمير زينه . . لكن
دلوقت بقى مهزأه . . عشان إيه ؟ عشان فيه جنب الحمير
كاديلاك وبكار .

محبوب - وليه اللف دا كله يا أخى ، البني آدم دلوقت
بيلاقى في المحطات اللى انت بتقول عليها حاجات أحسن من

اللى بيتوعد بيها فى آخر السفره ، دلوقت الناس ، اللى
 يقولوا عليهم كفار ، ولا هم ماش مسلمين ، ولا عايشين فى
 أرض الرسول ، عايشين عيشه أحسن من اللى اتوعدوا بيها
 المؤمنين والمسلمين اللى دلوقت بيتمرغوا فى التراب ، دلوقت
 كل واحد منهم عنده فر يجدير فيه الشهد واللبن والخمر وكان
 فوقها جاتوه ، ومر تدلا ، وبسطر مه ، وديك رومى ، وعنده
 تلفزيون ، وعنده حاجات كتيره قوى ، إخواننا المسلمين
 لسه ما عندهمش فكره عنها ، وعمرهم ما ينتظروها حتى
 ولا فى آخر السفره .



[الشيخ جاد]

الشيخ جاد [وهو منهمك فى تسليك أسنانه] — وحدوده

يا جماعه .. إيه أصل الكلام اللي بتقولوه ده .. [ينادى زينهم
الذي ظهر بجوار الباب] شوف كده يازينهم وحياة أبوك قشايه
أسلك بها اسنانى .. حته اللحمه اللي كتها كانت متفله قوى .
إيه أصل الكلام اللي عمالين تكفروا بيه ده .. أسرار إيه
اللي عايزين تكشفوها دى ، هو ه كل من أنعم عليه ربنا بحتة
مخ ، خلاص صابه الغرور ، واستكبر على خالقه .. دا فيه
حاجه اسمها ربنا ، سيدى وسيدك ، وسيد الكون .. اللي
منظمه ، واللى مساويه .. هو العامل اللي فى المصنع ، مش
بيشتغل الحاجه اللي ف إيده ؟ ورئيس المصنع ، مش بيديره كله
وهو قاعد فى الأوده القزاز الصغيره بتاعته ؟ يعنى لو كان
كل عامل ساب اللي ف إيده ، وقال أنا عايز أعرف المصنع
ده ماشى ازاي ، والحته اللي يعملها رايحه فين وحايعمل بيها
إيه ، والخامات دى بييجيوها منين ، وأصلها إيه ، كان مشى
المصنع ؟ . أبدأ وحياتكم ، كان خرب . بقى إذا كان الكلام
ده صحيح فى المصنع اللي قد كده ، يبقى مش صحيح فى العالم
الواسع ده . إذا كنا مستكترين على العامل إنه يتدخل فى
شؤون ريس المصنع اللي هو بنى آدم زيه ، يبقى مانستكترش
على المخلوق الضعيف إنه يتدخل فى شؤون ربنا .. إذا كان

العامل يخفي عليه سر المصنع ، يبقى ما يخفّاش على النبي آدم
سر الكون؟ يا جدد انت وهو عيب اختشى .

زينهم — أيوه والله يا شيخ جاد ، يسلم بقك ، دا العبد
برضه له حدود ، أسرار إيه وبلاوى إيه اللي عايز يعرفها؟
كفايه عليه يعرف ربنا كويس ، كفايه عليه يؤمن بضميره ،
وبقلبه . . دا الواحد مهما اتفرعن ، وكفر ، ونسى ربنا ،
لما بتصديه مصيبه ، أو تجرا له حاجه ، غصبن عنه ، ومن غير
ما يفكر ، يقول يارب . . يارب .

[بذهب زينهم ليحضر المنقه]

الشيخ جاد — أصل النبي آدم ضعيف ومغرور ،
وعقله مهما كبر برضك عاجز ، ولو ساب نفسه لعقله العاجز ،
حايضله ، عشان كده ربنا وضع الإيمان في القلوب ،
القلوب بتهدى أكثر من العقول ، والمغرور مهما اتنفخ ،
حيقتي برضك زى البللونه أقل شكه تنزله على فشوش .

محجوب [بنظر الي الساعه ويبدو عليه الاهتمام] — بس بقى
ياجماعه ، كفايه كلام . . خلونا ننتظر الساعه قربت على
الاتناشر ، مافضلش غير دقيقه والا دقيقتين ، والأستاذ
عبدالصبور ينزل ، يعني زمان روحه دلوقت عماله تحوم
حوالينا .



سید — اتوا برضك مصدقین إنه حاینزل ، برضك
بتصدقوا الكلام الفارغ ده ؟

زكى [الی سید] — إیه ده یاسیدنا ، وطی صوتك
كده ، وانت زى المدب ، حد یقول كده والروح نازلہ ،
إنت عاین تطرد الروح ، دى حاجات مجرّبه ومدروسه فى
أكبر الجامعات ، ده فىه عندهم صور لأرواح . عاین إیه
أكثر من كده ؟

سید — وانا مالی تنزل تنزل ، أهی عندكوا . امضغوها
واشبعوا بیها . . بلوها واشربوا میتها .

محبوب — بس بقى یاجماعه ، كفايه كلام . أرجوكم
عاین سکون خالص .

الشیخ جاد — وبرضه ، سماویات ، روحانیات ؟
محبوب — طبعاً ، طبعاً ، ركزوا فكم في الأستاذ
عبد الصبور ، ما حدش يفكر في حاجه تانيه .

سید — ودى مصيبة إيه دى كان .. أفكر فيه بتاع
إيه ؟ هو دا حد يفكر فيه ؟

محبوب — يا أخينا .. يابنى آدم ، وطى صوتك .. اتكلم
بهدوء .. إذا كنت مش عايز تفكر فيه .. عنك ما فكرت ،
بس اقعد ساكت .

سید — سكت ياسیدی .

زينهم [بدخل حاملا الغشه على كفته منشدآ] — اللبارق ،
اللبارق ، اللبلا لا بارق ..

عبد الصبور الله يحازيك

ما تقول لى بس لمن اشكيك

مالحقنش أبدأ افرح فيك

تموت وترجع تانى تنق ..

اللبارق . اللبارق .

محبوب [ناهراً زينهم] — إيه ده يا حيوان ده . إنت

عايز تطفش الروح ؟

زينهم — ماتخافت ، دا كان يحب الغميوه دى قوى .

دى يمكن هى دى اللى حاتنزه . . قولوا معايه قولوا ،
اللبارق ، اللبارق .

محبوب — إنت حاتسكت والا أقوم أكسر دماغك؟
زينهم — مافيش لزوم خلاص سكت .. خدياشيخ جاد
المقشه . سلك سنانك زى ما انت عايز .
زكى — بس بقى يا جماعه ، اسكتوا ، خلاص ، دى كلها
دقيقه بس .

[يسود السكون وتمضى فترة دقيقة فى صمت عميق .. والشكل واجم
سام محلق فى الساعة التى أخذ يقترب عقرب الدقائق فيها من ١٢] ..
[تدق الساعة ١٢ دقه ، وفى كل دقه يزداد نور أعصاب الجميع ،
ويزداد ارهاقهم ، ويبتوا فى أماكنهم كالتماثيل]
[تمضى دقيقة أخرى بعد دقائق الساعة . ثم يسمع صوت جبر الطشت
على الأرض وسكب المياه من الأبريق فيه]

زينهم [يبدو عليه فرح شديد ويمسك بيده كتف سيد افندى وهو
أقرب الموجودين اليه وهمس فى خوف] — يأنهار اسود داينته
عملها ونزل ؟

سيد [هامساً فى فرح] — هوّا مين ؟
زينهم — هوّا ، هوّا بعينه .. سامعين رجليه
بتتحرك فى الطشت ، يأنهار مهيب وزى الطين ، سامعين
ياجدعان ؟
[الجميع ينصتون ويملو وجوههم الفرع] .

محبوب [في خوف] - سامعين .

الشيخ جاد - أنا سامع كويس . . صوت الطشت
يبتجر جر على الأرض .

زكي - اصبروا شويه يا جماعة بلاش قلق ، إيه أصله
ده ؟ اسكتوا خلونا نسمع ، دي مصايب إيه دي ؟
[يسمع صوت وتم أقدام القبقاب ذو الجلال ، وتبدو سنيه على الباب
مصفرة الوجه]

سنيه [هامة زينهم] - سامع يازينهم .

زينهم - سامع ياختي .

سنيه - سامع القبقاب أبو جناجل .

زينهم - سامعه كويس .

سنيه [فزع] - أنا خلاص يازينهم ، زكي سابت ،
مش قادره أقف ، أنا كنت فاكره الحكاياه كلها تهويش
في تهويش .

زينهم - أنا كان كنت فاكركده .. لكن ابن الأروبه
عملها صحيح .

الشيخ جاد - فيه إيه ؟ . . بتوشوشوا بتقولوا إيه ؟

زينهم - مانتش سامع ؟

الشيخ جاد - سامع إيه ؟

زينهم - القبقاب أبو جناجل ؟

الشيخ جاد — ماله القبقاب أبو جناجل ؟
زينهم — هوّه فيه حد كان يقدر يلبسه غيره .
محبوب — أهه .. أنا سامعه كويس ، وسماع
شخسخة الجناجل .

سيد — لا .. أنا ماقدرش على كده أبدأ ، دى الحكايه
بقت جد خالص .. دى مصيبه وطبّلت ، وبعدين نعمل إيه
لو عمها وبلط هنا ولا رضيش يطلع تانى ؟
زينهم — طيب بس ماتفسرش بقى .. أهى دى تبقى
حقيقى المصيبه الكبرى .

سنيه — الله يكون فى عونك ياستى ، يا ترى عامله إيه
معاها دلوقت ؟

[بسمع صوت تصنيق]

زينهم — يانهار اسود ، أنا مالياش دعوه ، ولا انا
منقول من هنا ، خشى له انت ياسنيه ، بينده لك اتى ،
الصققتين دول يعنى لكى ؟

سنيه — أخش ؟ ليه ؟ اتجنيت ؟ أنا أخش ؟ دانا
عقبال ماوصل للباب ، يكون دى نشف .

[يعاد صوت التصنيق]

زينهم — خشى بقى ياسنيه ، اتى بتعرفى تهديه .

سنيه — أبدأ .

[يعاد التصفيق]

زينهم — خشى ياسنيه ، لازم عايز علبة النشوق .

سنيه — وانا مالي ، أهي عنده اخته تجيبها له .

[بسود الصمت فترة]

الشيخ جاد — لازم لقاها .

[تصدر عطسه عاليه]

سيدافندى [وهو يحتضن الشيخ جاد] — يالطيف ، هوا بعينه ، مافيش غيره [يبدو الخوف على الجميع] هي عطسته ، اللي تطلع تشرخ الودن ، يامغيث ، ياناس إلحقوني ، حد يشيلني يطلعني برّه ، ودي كانت وقعة إيه المهيبه دي ، ياناس حرام عليكم ، دانا بيني وبينه تار بايت ، أنا حاكون أول ضحيه له ، دا مش ممكن ينسالي حكاية الكرنب المحشى وراس العبد .

زينهم — طب بس بقى اخفيها سيره ، لحسن يسمعك ،
يطلع يمر مط بك الأرض .

[تستمر الجماعة فترة جالسين في أماكنهم بلا حراك ، وكما صدرت عطسة اتنضوا في أماكنهم وظهرت عليهم علامات الرعب والفرع]
محجوب — وبعدين يا جماعه ؟ وإيه آخرتها ؟ إحنا حانفضل كده متلبشين .. مش نشوف إيه اللي حصل ، دا حتى

حرام علينا نسيب الوليه الغلبانه جوّه كده لوحدها ، دى
مش رجوله ، دا احنا دلوقت بنعمل تجربه ، والتجربه فى
طريقها للنجاح ، فايه مخوفكوا كده ، هوّا احنا مش كنا
أكثر ما بنتمناه إن الأستاذ عبد الصبور ينزل لنا روحه
متجسده ، طيب أهو ده اللى حصل ، ياالله واحد منا يقوم
يشوفه ويسلم عليه ويكلمه .. ياالله يا شيخ جاد .

الشيخ جاد — أنا؟ ولا أعرفه ، ولا لىّ دعوه ييه .
حد الله بينى وبينه ، أنا لا انا عايز أرواح ، ولا لىّ دعوه
بالأرواح .

زكى [ناهضا من مكانه] — أقعدوا بقى اعزموا على
بعض لغاية ما الراجل يزهب ويسدنا وتنه طالع .

سيد — ياريت ، ربنا يسمع منك .

زكى — أيوه دلوقت نقول ياريت ، وبعدين نرجع
نندم ، خليكوا قاعدين ، أنا حاقوم أشوفه [بنهض متردداً
ويأخذى الاقتراب من الباب الزجاجي]
الشيخ جاد — حاسب على نفسك .

زكى [يتقدم] — العمر واحد والرب واحد ، إحتال لازم
نستمر فى التجربه إلى النهاية .

[يقف أمام الباب متردداً ، ثم ينحني ويضع احدى عينيه على ثقب
الفتاح فلا يكاد ينظر ما وراءه حتى يتراجع مبهوتا مذعوراً]

زکی — یا لطیف ، یا لطیف ، أطف بنا یا رب ، هوّه
بعینه ، بطر طوره ، بعبایته ، بنضارته ، یا لطیف یا لطیف .
سید [وقد تراخت أعضاءه] — یا ناس حرام علیکم . .
حد یشیلنی یرمینی برّه ، أنا جتتی نملت ، ومفاصلی خلاص
سابت .

الشیخ جاد — وأنا زیک ، ما بقاش فی نفس .
زینهم — بس کان مالنا ومال الغم ده .
[سنیه تنهاوی الی الأرض]

محجوب [نهض واقفا] — وبعدين یا جماعه ، والولیه
اللی جوّه دی نعمل فیها إیه ؟ دی ذنبا فی رقتنا ، إذا کان
احنا واحنا برّه الأوده جرا لنا کده ، إیش حال هی بقی ،
اللی معاه فی أوده واحده ، هی دی برضه أصول ؟ خمس
رجال طوال عراض یقعدها کده زی الولا یا ، ویسیبوا
الولیه الغلبانه دی لوحدها جوّه .

زینهم — آیوه حقیقی ما یصحش دی أمور نسوان اللی
احنا عملینها دی .

سنیه — یا عینی علیکی یا ستی .

الشیخ جاد — أنا مالیّاش دعوه ، لو قتلونی ما انتقلش
من مطرحی . . أنا لا قلت له انزل ولا اطلع .

سيد — وأنا زيك . لو كان على كنت وصيت
عزرائيل يسئله في السما بحديد .

محجوب — أقول لكم أحسن طريقه .. ولانك ولا
هو [يتقدم بجرأة وبدفع الباب الزجاجي فيفتحه على مصراعيه]

[تبدو حجرة النوم في ضوء باعت تماما كما كانت في الفصل السابق ،
وعلى المقعد أمام الفراش جلس شيخ يرتدى الطرطور والعباءة والمنظار
على أرنبة أخته وقد وضع ساقه في الطشت]

[الجميع يهتفون بفرح ويحدثون في الشيخ في دهش شديد]
زكي [هامسا الى سنيه] — بسم الله الرحمن الرحيم ..
هو بعينه الخالق الناطق ، بس باين عليه تخن شويه ، الظاهر
إن صحته جت على السما .

سنيه — لكن أمال فين ستي أم رتيه ؟ راحت فين ؟
سيد — لازم أكها ، هو اذا تستبعد عليه حاجه أبدأ .
محجوب — ما تكلمه ياسي زكي .. ما تسأله .

زكي — إسأله ياشيخ جاد .

الشيخ جاد — أنا اسأله ؟ بتاع إيه ؟ وعشان إيه ؟ أنا
ماكيش الأرواح شفوى ؟ مقدرش عليها إلا لما تكون
في الكبايه بس ، لكن كده سايبه .. حد الله بيني وبينها .
محجوب — طيب بس ، بس ، أسكت انت وهو .

جنتی ، مش حرجت علیک تیجی قدامی من غیر وش .

زینهم — ولا کله ، هوہ بعینه .

أم رتیبہ [لڑکی ومعجوب والشیخ جاد] — وانتوا إیہ ؟ .

قاعدین لغایة دلوقت تعملوا إیہ ، یاللا ورونی عرض کتافکم .

محبوب — یادی الخساره ، الولیہ انصابت ، یامسکینه

یا ام رتیبہ ، عقلها راح بلاش ، وهی دی حاجه بسیطه ..

دا انا کنت بره وحاجتجن ، إیش حالهی ، هی المسکینه العیطه

الطیبه اللی لا تعرف لا روح ولا عفاریت ، روحتی بلاش

یا ام رتیبہ ، الله یجازیک یا عبد الصبور یاللی کنت السبب .

سید — یعنی خلاص .. أخرج کده من المولد بلا

حمص .. مافیش جواز ولا حاجه ، ده برضه یرضی ربنا .

أم رتیبہ — جواز فی عینیک یا خلصوص یاوش

الخرتیت یاوحش .. إیاک أشوفک تعتب هنا تانی .

[ینخرج سید وهو یضرب کفأ بکف]

[أمرتیبہ تجلس علی المقعد وتضع ساقیها فی المیاء وتتناول غلبه الفشوق]

سنیه — وبعدين یازینهم .. نعمل إیہ فی المسکینه دی

اللی عقلها راح ؟

زینهم — راح ؟ ولا راح ولا حاجه ، أنا عارف

الحکایه .. عارف اللی جرا [ینظر الی أمرتیبہ وبهر رأسه] .

آه يا عبد الصبور افندي يانمس . . برضك عرفت تستكر
الوليّه الغلبانه وتنزل مطر حها ، أنا عارفك كويس وعارف
الأعيك ، طول عمرك واكل عقلها وضاحك عليها ،
طبعاً نزلت وقعدت تدر دش معاها وتأخذ وتدى ورحت
مسها ونازل بروحك فى جتها ومطلع روحها ، الله يرحمك
ياست أم رتيه . . منك الله ياسى عبد الصبور . . يامغالط
عزرائيل . . طبعاً مبسوط عشان فسخت الجوازه بتاعتها ،
مش دى اللى كنت بتحرب عليها ، طفقت الراجل بلسانك
اللى زى المبرد وفضلت تقول له ، وش الخريت ، وبوز
الإخص ، وطبعاً عايز تفسخ جوازنى أنا كان ، لكن بعينك .
والنبي لنا متجوزها غصب عن عينك . . وابقى تعالى بقى
خدها منى بجتك المفشوله . . جته أم رتيه ، جته الوليه ،
تقدر تاخدها منى ؟ تقدر تتجوزها ؟ بعينك . . [الى سنه]
خشى على ياسنسن يالى زى اللوز ، تتجوزينى والالآيات ؟
سنه — أتجوزك يازينهم .

زينهم — سامع ياسى عبد الصبور ، حاتجوزها ، غصبن
عن عينك لتين .

أم رتيه [فى غضب] — إخرص ، ياخسيس ، يا إبليس
ياتعيس يا منحوس .

زینہم - ولو . . برضہ حاتجوزہا ، ابقی خلی جتہ
أم رتیبہ تنفعک .

الشیخ جاد - إیہ أصلہ دا یا جماعہ ، انتوا حاتجننونا
معاکم زی الولیّہ ماتجننت ، إیہ أصلہ ده یا وله یازینہم
ماتسیب الولیّہ فی حالہا ، عبد الصبور دا إیہ وبتاع إیہ ؟
مش کفایہ الی جرالہا . . کلہ دا من المسخرہ الی
انتوا عاملینہا . . مالکم ومال الأرواح ، والأسرار . .
یعنی لو کان کل واحد یمشی علی أده ، ویعرف الی علی أده
مش یمتی أحسن . . دا لازم یکون فیہ فرق بین الی یعرفہ
ربنا والی یعرفہ العبد . . دا الی ماشی علی الأرض مایشوفش
زی الی فوق السطوح ، إیش حال أمال الی فوق ، فوق
فوق ، یا أخی منک له ، خلی الی لله ، واتقی الله ، واخش
الله ، وقل هو الله أحد ، الله الصمد ، لم یلد ، ولم یولد ،
ولم یکن له کفواً أحد [بصوت عال ممدود] وحدّوه .

الجمیع [بما فیہم أم رتیبہ] - لا إله إلا الله .

[أم رتیبہ تہز رأسہا منتفضة وتتم بضع کلمات غیر مفہومہ ثم تغمض
عینہا برہة . . وتقیق الی تمسها وتری الطرطور والنظارہ]
أم رتیبہ - یاندامہ . . یا عیب الشوم ، أنا إیہ الی
لبسّی اللبس المشوّم ده ؟ . أمال فین سید افندی ؟ راح
فین ؟ إلحقونی بسید افندی .


زينهم [متهجاً الى الباب] — سيد افندى ، سيد افندى .
سيد [يعود مهرولاً ويقبل على أم رتيبه] — أم رتيبه .. مالك
ياختى .. قلبي عليك ، حمد الله على سلامتک .. يا ألف نهار
أيض .


زينهم — أيوه كده .. أهي طلعت روحه تانى ...
ونزلت أم رتيبه مطرحها .. هي إيه ؟ سايبه . [ناظراً الى
السقف] اطلع يا عبد الصبور الكلب ، خليك فوق عندك ،
إياك تهوَّب هنا ، إلحقونا يا جماعه بمأذون قبل ما ينزل
يفشكها تانى .

الشيخ جاد — ويلحقك ليه .. أمال أنا هنا باعمل إيه ؟
دانا أدها وأدود ، هاتوا ايديكم في إيدي .. قال يا بخت من
وفق راسين في الخلال ، وأنا حاو فوق أربع روس ، منهم
راسين عجالي [يجلس الجميع وتسمع زغاريد] المأذون لما يسعد ،
يجيله جوازتين في ليله ..

تسدل الستار

(تمت)







المساعدي، يوسف

أم رتيبة

AMERICAN UNIVERSITY OF BEIRUT LIBRARIES



01029014



AMERICAN
UNIVERSITY OF BEIRUT

